

Pangajaran sejate

Pangajaran 1

Allah Angandhika

Para tretan Pamereng

Tarema salam kaula edhalem Asmana Allah se maha taresna sarta kakaseh. Allah samanina ngandhi' pangaterrowan dha'ka sadaja manossa ngenal tor tekun dha'ka jalan kasalameddan, jalan se nojhu ka Sowarga se ampon e siapaghi Allah. E jalan kaissa' Allah se maha kakaseh sarta taresna karsa sadaja manossa odhi' e dhalam restuepon, saniyab lebat jalan kasalameddan, manossa bisa'a dhepa' ka karatonah, dhalem katentreman se sajete. Dhalam acara jalan kasalameddan paneka, **kaula sadaja bekal areng sareng nalete kitab-kitab se etoles sareng para Nabbi se ajarna'agi jha' jalan molja se ampon e teptepagi Allah saengga ommat manossa ngaolle edhadiagi oreng bhander e ajunana Allah.**

Para tretan , acara panika kaula nyamaen **jalan kasalameddan**, seka'dhima edhalem pangajaran-pangajaran paneka sadaja sami nitenih tolesan para Nabbi se anyataagi kadhi ponapa oreng-oreng se odhi' dhalem kata'saeen bisa'a dhadi sesae e ajunan Allah.

Jalan se ka'dhima se panjenengan toro'a jalan kabendharen otaba kasesadhan. Ponapa poron panjenengan ngataoen parkara jalan kabendharen se asala dhari Allah. Allah angandhika: "Pojur oreng se ce' terrona ajalannagiya kasokanna Allah; oreng jareya bakal epacokoba bi' Allah."

E dhalem kitab Jabur Nabbi Daud noles dhu'a, "duduwagi ka abdi dalem se daddi kasokannepon Junandalem, GUSTE, sareng abdidalem etoro'a kalaban esto; ajari abdidalem daddi oreng alem seta' nga-satengnga." Edhalem acara panika kaula sadaja bakal ajerra ayat-ayat socce dhalem urutan bile sadaja enyataagi, enggi kadhinto e saat parmola'an sabelluna sadajana bahda selaen Alla se maha kodhus se nyepta'agi sadajana.

E dhalem jalan kasalameddan, kaula sadaja bhakal ngaolle pangataowan bhab Allah sarta pangandhikaNa . Ponapa panjenengan ngaoningin kadhi ponapa Allah kadhissa, otaba dhari kadhima asalla setan? Ponapa Allah nyepta'agi manossa? Kadhiponapa dunya samporna se Allah cepta'agi bisa rosak? Ponapa ampon mereng kisah luar biasa Ennoh nabbi Allah sareng banjir se raja e jaman Ennoh odhi'? Ponapa panjenengan leres ngaoningin napa se etoles sareng para nabbi Allah e dhalem kitab socce? Ngaoningin panjenengan anapa Ibrahim e sebut sahabat Allah, bisa'a para tretan apareng panjelasan se sae dha'ka para ca kanca otaba na'kana'en panjengan pessena para nabi?

Ebhuen taon se tapongkor, nabbi Ayub atanyah kadhipanekah:"kadhiponapa sa oreng manossa ta'sala e ajunana Allah. Ngaoningin ponapa jawaben Allah dha'ka Ayub? Kadiponapa ngaolle edhadiagi oreng bhander e ajunana Allah? Manabi para tretan terro ngaoningin anggebna Allah atas pertanya'an paneka ban bhanya' pertanya'an laenna, kaula angonjang kaangguy merengagi acara jalan kasalameddan. Pangandhikana Allah paneka dhalem, ajaib, odhi' sarta kobhasa. Dhalem Alkitab Allah ta'settonga se anyerreb. Nodhuagi kadhiponapa sabbanderra manossa, jugan kadhiponapa Allah kaissa'. Guste paneka Allah se maha kakase ban Maha Pemurah, Allah Maha Raja!.

Para tretan, badha settong kabendharen se penting ban bajib kaula pahami, enggi paneka: Allah ampon angandhika! Allah se maha tenggih ampon angandhika dha'ka para omat manossa bhan Allah terro adhabu ka kaula sami. Saompama bhai panjenengan ngaolle sorat dhari oreng se sanget berkuasa, kaula

bisa ajamin paste terro oninga napa essena sorat paneka ban bekal ageteagi paponapa se dhadi oca'na. kadhiponapa sikap panjenengan , manabi se adhabu dhe'ka panjenengan enggi kaissa' Allah se maha tenggi se kagungan bhumi sarta langhi', masa' panjenengan ta' gateaggi dhabuna otaba pessenna Allah?

Kadhiponapa Allah adhabu ka manossa, Alketab noduagi dha'ka kaula sami, "E masa dhimin Allah ampon angandhika ka manossa kalaban cara acemacem. Sala settong cara Allah adhabu ka manossa lebat para nabbi. Allah makon oreng-oreng khusus kaangguy madhapa' dhabuNa bhan noles bhudhabuna kaissa' ka dhalem Alketab. Pangandhika Allah adhabu : "Sapean kodhu ngarte jha' sobung nubuatan edhalem ketab socce dhateng dhari pemahaman nabbi dhiri', sabbab nubuatan dhateng dhari Allah karna e ilhami sareng Roh Allah."

Tamtuepon Allah maste bisa noles dhiri' ketab socceNa, otaba parenta de'ka malaekatta sopaja nolessagi. Namong Allah ta' ngalakoni. Allah mele oreng biasa kaangguy nolesagi dhabuna. Reng-oreng kaissa' enggi ka'dhinto Nabbi. Allah apareng dhabu ka dhalem pekerana para nabbi paponapa se kodhu etoles, para nabbi noles sadajana kalaban ca'ocana dhibi'. Allah apareng ilham dha'ka sadaja ca'ocana, namong jugan aparing perhatian ka pribadina para nabbi se ampon noles pessen panika. Alketab ta' langsung aesse ca'oca' secara langsung dhari Allah otabe kalimat-kalimat Allah, namong jugan wa-buwa pame'kerran sarta dhu'a, jugan masalah-masalah dhari reng-oreng kaadhi kaula sareng panjenengan. Lebat careta-careta Allah se orosan sareng manossa, Allah karsa nodhuagi kadiponapa kepribadianNa ban kadhiponapa ja' molla olle semma' dha'ka Allah.

Anapah Allah ngilhamin para nabbi kaangguy nolesagi ketab socce. Allah ngilhami para nabbi saengga saniap generasi angaolle pangataowan napa se Allah karsa'agi. Allah angandikah dhe'ka para nabbi polana terro angandikade'ka kaula sami lebat ponapa se etoles sareng para nabbi paneka. Sadaja se ampon epangandikaagi Allah de'ka para nabbi bisa bermanfaat dha'ka kaule sami se ghi' odhi' e jaman mangken. Allah karsa sopaja kaule sami ngaoningin pesen apa se ebaktah paranabbiepon.

Tantona sadaja se etoles para nabbi sanget bernilai, sabba salerana nolesagi ka'issa sopaja sadaja oreng ngaolle jalan kaleressan seampon e teptepagi Allah. Allah terro kaula sami ngaoningin ca'oca'na, parcaja tor ta'at ka Allah! Bhada sapona oreng ta'parduli dha'ka sabhagian dhari tolesan para nabbi, namong hal ka'dhinta sanget bahaya, sabba pangandika Allah ta'kerra bhaobha, Allah ngarep sopaja kaula sami ngaoningin ban asor ate dha'ka sadaja se ampon e nyataagi Allah. Pangandhikana Allah ta'perna aoba ban e saat kiamat dhagi' kaula sami kodhu bertanggung jawab dha'ka Allah. Allah angandikah: "Langnge' ban bume bakal mosna'a, tape Tang oca' bakal teptebba salanjengnga."

Bhanyak oreng se berusaha nentang pangandhikana Allah sabba pangandika ka'issa nodhuagi kabhada'an se sabendharra atena. Edinggagi ponapa se edabuagi bab pangandikana: "Dhabuna Allah paneka dhabu se odhi' ban kowat, atajemman dhari pedhang se amata dhuwa'. Dhabu ganeka nyoddu' kantos ka bates e antarana so-resowan ban lang-tolangnga somsom, kantos oneng salem-dhalemna ka pekkeran ban neyadda monossa."

Ketab socce kompolan tolesan se paleng towa e alamdunya, maskea se kadhinto sampe' are paneka gi' *relefan* kalaban kaodhi'an saneap oreng. Sobung se lebbi penteng ebanding pangandhikana Allah. Pangandikana Allah saompama nase' ban juko' , kaula ngaoningin ja' se kadhuwe' bhani coman nyaman e dha'ar, namong jugan bermanfaat dha'ka bhadan. Dha'aran paneka bisa bermanfaat dha'ka bhadan manabi kaula dha'ar. Kalaban cara se sami kaula kodhu mondut bagian dhalem pangandika Allah, mon kaula terro ngaollea kaontongan dhari pangandika Allah kaula kodu marengi dha'arren dha'ka ate kaula. Paneka sabbabe Allah adhabu, "Manossa ta' bisa odhi' pera' dhari roti malolo, tape laen dhari jereya

dhari pa-apa se edhabuwagi Allah.” Saongguna pangandhika paneka dha’arren se nikmat. Bhani dha’arren kaangguy badan namong dha’aren dha’ka ate ban jiba. Kaula mondhut bagiaan dhalem pangandhika Allah kalaban merengngagi, arenungngagi, ngoladhi paponapa se Allah dhabuagi. Ponapa panjenengan kerong de’ka pangandikana Allah?

Kaula nyampaiagiya dha’ka sadaja reng-oreng se tako’ ka Allah sarta gentar dha’ka pangandikana. Usaha se gu-onggu kaangguy tep-tep noro’ acara pangajaran sejate. Kalaban cara sapanika sampean olle namba pangataowan bab ponapa se ampon Allah dhabuagi molaen jaman lamba’ lebad para nabiepon ban ajar kadhiponapa panjenengan bisa’a etarema minangka oreng bendher e ajunanna Allah se maha socce. Allah ampon adhabu ban Allah terro adhabu dha’ka panjenengan!

Para tretan, dhalem acara paneka kaula sami ta’ kerra nojuh kapasera’a otaba napa’a bhahi kecuali bhada e dhalem tolesan para nabbi Allah, kaula sami ampon nyeapagi acara paneka ta’ ngataoen kabendheran allah se laen se tapesa dhari ponapa se ampon Allah dhabuagi e dhalem kitab socce se ampon nyataagi sareng nabbi Yahya Ibdul Zakaria e dhalem Injil”Manossa reya ta’ kera andhi’ pa-apa mon ta’ epareng Allah.” Kaula sami ta’ bhangkal nojuh dha’ka pangataowan kaula dhibi’ kaula coma’ nojuh dha’ka dhabuna Allah bisaos. Pangaterrowan kaula sami apareng oning napa se ampon Allah nyata’agi e dhalem dhabunna lebat para nabbi.

Ponapa panjenengan oning napa se ampon e dhabuagi Allah e dhalem tolesana para nabbi? Ponapa panjenengan bagian sala setonga dhari salerana se lapar tor pelka’ dha’ka pangandhikana Allah ban kabendheran se sejati? Dhalem kitab soccena Allah ampon ngatonagi salerana ban apareng oning jalan kabendheran. Nyara areng-sareng kalaban kaula sami abang-nembang kitab socce dhalem acara pangajaran sejate saengga guonggu ngarte ponapa se ampon edhabuagi Allah.

Ma’le kaula sami sadaja adhadiagi yakin de’ka bab ka’dhinto: Allah ampon adhabu ban ngagungin pangaterro saniab oreng kaangguy merengngagi dhabuna kaissa’ ban odi’! Towa, ngode, lalake’ ban babine’, miskin otaba kaya , Allah ampon adhabu dha’ka passera’a oreng:”Edhingagi! Buka kopenga bha’en pas mara dha’ enna’, bi’ Sengko’ ba’na eberri’anna odhi’ se saongguna.”

Para tretan, mator sakalangkong ampon merengngagi siaran bhadan kaula. Manabi panjenengan kaagungan pertanyaan bab ponapa’a se ampon eperengagi, toles pesan dha’ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 2

Kadiponapa Allah Panika?

Para tretan Pamereng sadaja

Sadaja ampon ngoladi e dalam siaran pangajaran sejate sabeluna, je' banyak nabi se ampon noles tab-ketab namong coma' badha setong pengarang enggi ka'dhinto Allah diri'. E dalam siaran tapongkor gi' badha setong parenungan, gipaneke : Allah ampon dhabuwagi pangandhikaNa. Allah se maha kobasa ampon adhabu dhe'ka omat manosa lebat bi-nabi ban Allah karsa kaula sami kodu merengagi ponapa se ampon e dhabuagi. Alla karsa adhebu de'ka kaula lebat ponapa se ampon etoles sareng bi-nabi kaisa' e dhalam ketab soce. Allah ta' kera aoba, napa pole pangandikana. Saniap agante generasi, Allah teptep ajaga pangandhikaNa. Enga'a se edhabuagi ketab soce, "dhabuna Allah e dhalam ketab socce, ta' kenging e battalagi, badha pangandika se sapaneka:"langi' ban bume bekal sobunga, nanging dhabuna Alla tep-tep badha samanina."

E are mangkin kaula bekal masok de'ka bagian pertama dari ketab socce. Bagian paneka e sebut Taurat. Ra-kera telo ebu lema ratos tahun tapongkor Allah ampon ailhami sala setong oreng se anyama Musa sopaje noles buku paneka. Taurat paneka a ese 5 bagian. Bagian se pertama e sebut ketab kadaddiyan. Ketab paneka esebut kadaddiyan karana a ese kadiponapa bume e cipta'agi. E dalam Ketab paneka bada 50 bab.

E bhakto kaula ngoladi ketab Kadaddiyan paneka, kaula bekal ngoladi bab kabendharen se penting se ekarsa'agi Allah sopaja kaula sami oning otaba mereng. Kaula ajar bab Allah, ban kadiponapa sifat-sifaTa. Jugan ajar bab kat-malaikat sareng setan, langi' sareng bumi, manossa sareng kebban. Kaula badhi oningah kadiponapa dunya se samporna bakto e cipta'agi panekah bisa rosa' ban saterrosa e possaen panyake', kasangsaraan sareng kapatean. Enggi jugan bakal nalektea jalan se lurus se ampon e gabay sareng Allah diri' sopaja manossa bisa'a abhali dha'ka saleraNa.

Para tretan sadaja, ampon saleressa kaula kodhu ngowasaen ketab se pertama paneka, sebbab paneka dhasar Allah nyaba' dhiri' kaangguy sadja pangandikaNa e dhalem bhagiyan se laen dhari ketab Taurat sarta tolesan para nabi se laen se dhateng saampona Musa. E dhalem sah-kisah se dha'ade', kaula bekal mereng caretana sa-manossa se dha'adha', caretana bilan manossa ta' ta'at dha'ka Allah, sarta caretana se dha'adha' kadaddiyan manossa mate'en manossa se laen, kaula mereng bab agama palsu se dha'adha', bi-nabi se dha'adha', sarta sa-bhangsa se dha'adha' se badha e atas bumi. Kaula ngacah dha'ka caretana Adam ban Hawa, Nuh kalaban banjir se raja, nabi Ibrahim Otosana Allah ban anapa nabi kaissa' e sebut sobat Allah. Enggi jugan kaula sadaja mereng caretana bab Ismail sareng Isak, Esau sareng Yakub, jugan Yusuf sareng para tretana se kejem. Paneka gambaren dhari essena Taurat bagianse adha' ban gi' badha caretana se laen.

Dhalem buku se pertama ketab Taurat bab 1:1 esebutagi: "E bakto Allah nyepta'agi alam dunya." Panika kenengan se ka'dhimma kaula koduh mamolan pangajaran bab ketab socce, sebbab Allah dhiri' se mamolan e dhalam ketab socceNa : "E bakto Allah nyepta'agi alam dunya."

Napa se ampon bhada e bhakto Allah nyepta'agi alam dunya? Ponapa se ampon badha e alam dunya panekah? Ketab socce ngajeragi sobung ponapa bisaos kajaba Allah. Paneka sebabba ayat se

pertama dhalem buku pertama ketab socce anyata'agi "E bakto Allah nyepta'agi alam dunya." Ayat paneka ta' ngoca' E bakto Allah ban kat-malaikata otaba e bakto Allah ban manossa. Ayat ketab socce ngajarin dha'kaula, sabeluna badha panapa, sabellun bhada malaekat otaba manossa . coman badha settong kaodi'an enggi paneka Allah se maha kobesa.

Hal laen se kaula sami ajaren enggi kadhinta: Allah paneka sobung parmola'ana. Allah ta' ecipta'agi sebbab Allah paneka maha langgeng. Sadaja se badha e alamdunya badha parmola'anna, kajaba Allah. Allah paneka sobung asal usulla, sobung se ngalaheragi otaba se nyipta'agi. Pokokna Allah sobung bandinganna coma Allah bisaos se badha ban odhi' sanimanina. Kadhiponapa Allah panika e saat samangken, enggika'dinto Salerana sedhimin, kadiponapa salerana sedhimin, enggika'dinto Allah kaangguy sanimanina. Allah ta'perna aobe.

Dhari ayat ""E bakto Allah." Kaula sadaja ajar bab Allah se Agung. Allah se nyipta'agi sadajana, tantona lebbih molja, lebbi agung dhari sadajana manossa sareng sadaja cipta'anna se lain. Salerana lebbi molja dhari tasse', angin, are sarta tang-bintang. Allah lebih agung ban molja dhari roh-erroh. Allah maha penciptah. Ka'dhinto sebabba kalaban guonggu kaula olle ngako sareng ngaminin, Allah se maha Raja! Akadi roma se bagus, oreng se aggabay roma paneka tanto lebih molja dhari bangonan romana. Allah ta' tagantong ka pasera'a bisaos; diggal manossa napa pole keban otaba bharang. Salerana tong-setonga se maha Agung.

Kaula sami banya' kabutowanna. Sabban are kaula kodhu ngakan ban nginom, kaula buto tedung sarta angen kaangguy anyabeh. Kaula marloagi sonara are sareng ojen, kakanan, aeng, angguyen, ban roma, kaula marloagi oreng laen, eppa', ebu, lakeh, bineh, kanca, ban obeng. Namong Allah se nyepta'agi sadajana, se ta'marloagi paponapa. Allah ta' aromasa lapar, ta' aromasa pelka', ta' aromasa moggu'. Salerana jagan ta' abujud se bisa kaula oladi ban e tegu' akadi manossa. Allah sobung batessa, sobung se awal ban akher kaangguy Allah, sabab Allah langgeng. Salerana Allah se Maha kobasa.

Badha pertanyaan penting. Manabi Allah paneka ta' akadiya manossa, ta' ngagungin badan akadi kaula sami, kadiponapa otabe akadiapa Allah panika bisa e gambaragi?

Ketab socce ajawab kalaban tegas ban jelas: "Allah paneka Erroh, ban se nyemba'a kodu nyemba salerana edhalem Erroh sarta kabenderan." Daddi mon badha pertanyaan akadi ponapa Allah paneka? Jawabna sapanika Allah panika Erroh badhana. Manabi manossa paneka ebagi dhari badan, jiba ban erroh, namong Allah coman e bagi dhalam Erroh bisaos. Errohna Allah sobung batessa. Errohna Allah bedhe e mandiman; Salerana mosa'en ban ngatasen sadajana. Erroh Allah sapaneka Allah diri', sanggub ngoladin sadajana, salerana oning pekeran kaula sami, lamala bisa ngaoningin essena ate kaula sami.

Dhadi kadiponapa Allah egambaragi? Allah ta' bisa epapadha sareng paseraa bisaos. Allah paneka Allah se ta' bisa e ding-bandhingagi. E dhalam siaran-siaran saterosa kaula bakal lebih dhalam pole kenal de'ka Allah. E dhalam Alketab Allah ngagungin atoson lok-olokan. Misala Maha Tinggi, Maha Kobasa, Maha kodus, Maha Raje, Maha taresna, ban en-laena, Salerana Allah se Odhi' ban sajate.

Ongguan Allah se nyipta'agi langi' sareng bume panika maha Raja. Ketab socce notoragi: "Allah nyepta'agi sadaja se badha e lange' sareng e bume, se etangale sareng se ta' etangale, alam paneka sadajana ecepta'agi Allah sareng kaagem Allah. "Allah tong-settonga pangobasa, rato sadajana rato ban Guste sadajana guste, coman salerana dhibi' se ta' fana ban aneng e dhalam sonar tera', sobung manossa se bisa ngabes salerana. Kagem salerana sadajana pojian ban kobasa salanjenga Amin.

Dhalem pasal se lain dhalem kitab Taorat, Musa nabina Allah, molja'agi Allah kalaban pojian se sae : "GUSTE reya tang kakowadan; se apareng kasalameddan . GUSTE reya tang Allah, se esemba tang bangatowa, sengko' anyanyeya mojiya kaagunganna."

Nyara sempen e dhalem pekeran kaula ponapa se ampon e perengagi e are mangken, enggi kadhinto e bakto parmolaan coman badha Allah, coman Allah bisaos sabeluna se lain bhada, mila dari paneka coman Allah bisaos se olle anyata'agi dhe'ka kaula sadaja napa se saongguna se kadaddiyan e parmola'ana. Enggi jugan namong Allah se bisa noduagi de'ka kaula ponapa akherra se bakal kadaddiyan e akher zaman. Coma Allah dibi' se bisa anyata'agi de'ka kaula sami kabenderan bab saleraNa ban kabenderan panika ampon e nyata'agi lebat tolesan para nabi. *Tolesana para nabi paneka ngajeren kaula bab kadiponapa sopaja kaula bisa ngaandhi' hubungan se akrab tor sae asareng Allah. Mila deri paneka kaula parlo moka' kopeng, pekeran tor ate kaangguay ponapa se ampon Allah dhabuagi dha'ka kaula sadaja. Perengagi paponapa se edabuagi Allah e dhalem yat-ayat socceNa.....:"He, saantero pandhudhu' bume, mara abali ka Sengko' me' olle ba'na epasalamet, sabab pera' Sengko' Allah, tadha' laenna!"*

Para tretan ponapa panjenengan ampon kenal de'ka Allah sacara pribadi? Otaba panjenengan aromasa je' Allah panika jeu e atas langi' ban ta' ekenal? Allah akarsa panjenengan sami kenal de'ka salerana ban asareng salerana samanina. Saka'dinto para pamereng samangken Kaula sadaja bakal tapessa'a. Moga bisa tapanggi pole dhalem siaran se dhateng kalaban kok-pokok laina; gepaneka: Malaikat ban setan. Oninga para tretan dhari ka'dimma dhatenga malaikat ban setan panika? Allah aberkadin panjenengan nalekana panjenengan arenungagia ayat alkitab se adhabu:"**Allah reya Erroh, ban pera' kalaban Kobasana Errohna Allah Reng-oreng bisa abakte ka Allah e dhalam erroh ban kabendheran.**" Manabi panjenengan kagungan pertanyaan bhab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong

Pangajaran sejate

Pangajaran 3

Kat-malaikat ban Setan

Para tretan sarta sobat pamereng sadaja

Dhalem siaran pangajaran sejate tapongkor, ketab socce angandika e bakto Allah nyeptaagi alam dunya. Sadajana ngagungin parmola'an kajaba Allah. E parmola'an sobung apanapa kajaba Allah kadibi'. Coman Allah se odhi'. Enggi salerana Allah se kekal. Allah paneka Raja ban sobung bandingana. Kaissa' sababa ketab socce adhabu coman salerana se ta' fana ban odhi' dhalem sonar se takbisa e sema'en, sobung manossa se bisa ngoladhi salerana. Coman kaangguy salerana kamoljaan ban kobasa samanina, Amin. Monggu Allah sobung parmolaan ban akher. Salerana ta' ngabutoagi paponapa, Allah ta' bisa ebatesen. Allah paneka Erroh e man-ka'imman e saat se padhe. Salerana ngoladi sadajana, salerana ngaoningin sadajana, salerana mosa'en sadajana, salerana ngatasen sadajana ban sadajana manossa. Allah paneka dahsyat.

E are mangken kaula bakal ngoladi ponapa se e ajeragi ketab socce bab kat-malaikat ban setan. Bha' oninga para tretan dhari ka'dimma asala kat-malaikat? Dhari ka'dimma dhatenga setan? Kaula sami ta'kera bisa ngaoningin manabi Allah ta' anyata'agi de'ka kaula sami. Ontonga Allah adhabu bab paneka e dhalem pangandikana. Mila dari paneka nyara kalaban talete ngoladi ketab socce sopaja kaula sami ngaoningin se sabendhera bab malaikat ban setan panikah.

Kaula maenga' pole ja' namong Allah bisaos se badha e parmola'an. Sobung se laen. Mandar moge e dalem pangajaran se dhateng, kaula bisa nyareta'agiya kadiponapa Allah nyepta'agi alam dunya paneka ban sadaja se badha e dhalemanna. Nanging para tretan, parlo ekaoningin sabellunna Allah nyeptaagi manossa ban alam dunya se ka'dhima kaula saat samangken enneng, Allah ampon nyepta'agi malaikat kaade'.

Ketab socce ngajaragi je' malaikat paneka abujud erroh, akadi Allah. Ka'issa' e cepta'agi dhari angina ban apoy. Sobung se bisa ngoladi angin enggi jungan sobung se bisa neggu' apoy. Kadiya kaissa' malaikat. Manabi manossa paneka badha badan ban errohna, malaikat coman erroh bisaos. Paneka sababba kaula ta'bisa nangale'en. Maskeya dhang-kadhang anampa'agi dha'ka kaula, malaikat padhang abujud akadiya manossa. Ketab socce jungan ngajaren je' malaikat paneka ngaandhi' kakowadan otaba kobasa se sanget raja, lebbi dari manossa. Meskeya sapanika menangka makhluk cepta'anna Allah sadaja teptep badha batessa. Malaikat banne maha kobasa. Ta' bisa eneng e man-diman edhalam saat se sami, malaikat coman cipta'an biasa. Coman setong se ta'tabates ban Maha sadajana enggipaneka; Allah.

Manabi panjenengan terro oninga saponapa banya'na malaikat se eciptagi Allah, paneka dhabuna ketab socce: e ajunana Allah badha banya' malaikat. Dhadi banya'na malaikat se eciptagi Allah paneka ta' kaetong banya'na. Allah se Raja ban Agung paneka ampon nyepta'agi juta'an lamala milyaran malaikat se bagus, sae tor bicaksana.

Parlo ekaoningin e bakto malaikat paneka e cepta'agi Allah, sadajana e dhalem kabedhe'en socce, sabab Allah paneka socce, samporna tor sae. Sobung malaikat se jahat, sobung iblis. Sobung erroh jahat. Allah ta' nyeptaagi malaikat se jahat.

Panjenengan tero oninga anapa Allah nyepta'agi malaikat? E dhalem kitab socce esebutagi, malaikat ecipta'agi sopaja naresnaen, mamoji sarta ngaladinen Allah e sowarga samanina. Saniyap malaikat paneka kagungana Allah, sebab malaikat paneka cipta'ana Allah. Ngaoning ja' badha kenengan se sanget bagus tor socce possa' kalaban sonar e kennengnganna Allah? Kennengnganna jau ngalebadhi bulen, are ban tang-bintang. Kennengngan kaissa' sareng para nabi esebut hadirat Allah otaba taman Firdaus. Se ka'dhima Allah sareng kat-malaikata se socce se enneng.

Bab laen monggu kat-malaikat paneka. Sadajana abidda setong sareng se laen. Badha saponapa malaikat se lebbi sae ban kagungan kobasa se lebbi raja dhari malaikat se laena. Badha malaikat se samanina badha e sekitar kraton sowarga. Se laina ngaandi' tugas ajaga ban nolong manossa. Malaikat akadia Jibril ban Mikail manjeng e kratona Allah ban tugassa dadi otosana Allah kaangguy mamare gas-tugas istimewa e alam dunya.

Badha saponapa malaikat se dhadi ketuana malaikat. Ponapa panjenengan perna ngaoning asmana Lusifer? Pangandika Allah ngoca' je' Lusifer paneka perna dadhi ketuana malaikat. Manabi panjenengan ngaoningin caretana Lusifer, tantona panjenengan paste oning setan kadhisa' dhateng dhari kadimma.

Metorot kitab socce, e bakto Allah nyepta'agi malaikat, Lusifer paneka malaikat se paling mapan, paling kobasa, ban paling bicaksana. Lusifer artena nyonar. Allah aparing de'ka Lusifer kamapanan ban kapenteran se talebat raja. Sadaja e cepta'agi kaangguy nyemba, naresnain, sarta ta'at ka Allah samanina, ban Allah apareng sabbab kalaban berkat se sanget banyak. Nanging e settong are, panica etoles e dhalem tolesana para nabi, atena Lusifer eposa'en kasombongan. Ca'na Lusifer dhalem atena, sengko' bakal ongge ka sowarga. Sengko' bakal agabayya tahta e atassa tang-bintanga Allah; sengkok bekal daddiya rato, se akadiya se Maha Tinggi.

Lusifer, mkhluk se ngaolle sadajana dhari Allah, tero ngeco'a kamoljaan Allah se Maha Tinggi. Aromassa sajarah sareng Allah. E bha'to aberonta' dhe'ka Allah banne coma' abe'na dibi'... namong sapertelona malaikat jagan mele noro'a ban adigella Allah. Nika dusa musyrik, enggipaneka adaddiyagi oreng otaba hal se saderajat sareng Allah.

Namong para tretan, Allah paneka Allah. Salerana oning ponapa se e rencana'agi Lusifer sareng kat-malaikat pengikutta. E ka'dinto ampon bisa e kaoningin je' sobung paponapa bisaos se bisa e rahasia'agi dhari Allah. Karana Allah Maha ngaoningin. Allah oning ja' paneka bakal kadaddiyan. Allah ngoladi dusa pemberontakan dhalem atena Lusifer ban kat-malaikata.

Para tretan, Allah paneka socce ban ta' poron ngoladi kajahadhan. Allah ta' kera bertoleransi sareng dusa. Allah ta' apareng kamolja'anepon de'ka pasera'a bisaos. Allah ta' bisa e ghante'en sareng pasera'a. karana Allah paneka samporna. Akhera Allah muang Lusifer sarta para pangikuta dhari hadiratdha se socce. Lusifer sareng ca-kancana ta' bisa odi' e karatona Allah pole. Allah se socce panika bekal ngokom saniyap oreng se aberontak de'ka saleraNa.

Saampona Lusifer dusa, nyamana banne Lusifer pole, ananging setan. Setan poneka artena; penghasut, mangken Lusifer paneka dadhi mosona Allah. Akadi se ampon kaoningin kantos samangken lusifer ben pengikutta tep-tep nola' Allah ban sadajana se sae. Nola' ban nyangkal sadaja dhabuna Allah. Setan saniyap berjuang nentang Allah, nyoba'a magagalla tor ngancoragi rencanana Allah. Namong Allah paneka hakim se Agung, sobung se bisa menang alaban salerana.

Setan ban kat-malaikat pengikutta etondhung dari sowarga, Allah nyepta'agi apoy naraka se ta'perna mateh kaangguay setan. Bekal dhepak bektona Allah ngontalagi setan ban kat-malaikatta jugan manossa se dusa de'ka apoy naraka paneka. Akadi pangandikah e dalem ketab socce; sadajana bakal e siksa siang ban malem tor samanina.

Samangken setan bellun e ontallagi ka dhalem apoy naraka, setan badha e alam dunya, berjuang nentang Allah ban omatdha. Setan tero marosa', ngancoragi se ampon ecipt'agi Allah. Setan tero sadajana manossa dadhi sossa ban aberonta' de'ka Allah. Benya' oreng se tak sadar je' kaodhi'na e setir sareng setan. Ayat socce anyata'agi: "setan noduagi aba'na akadiya malaikat se tera' " ban jugan:"setan paneka penipu ban eppa' dhari sadajana kacarpa'an." Setan samanina usaha sopaja manossa ta' percaja pole de'ka Allah sarta pangandikaNa. Ketab socce ampon maenga': Senga' sampeyan pate-ngate! Sabab Iblis, mosona sampeyan, akadi macan ajalan san-kassannagi sambu agauing nyare mangsana." Pate-ngate para tretan, si iblis tero maancor sampiyan.

Poji soccor dha'ka Allah, salerana ampon pareng pangandhika sopaja kaula sadaja bisa'a lolos dhari kobasana setan. Isa Almasih marengin Injil dhe'ka kaula sadaja se dadi pangikutdha. Dhabuna : "bha'en bhakal taoa kabendheren ban kabendheran rea bhakal mabebassa bhe'en!" Oninga panjenengan kabhendheran napa se bisa mabebassa kaula sami dhari tepoan ban kobasana setan? Ja' sampek malopa bab paneka: setan lebbi bicaksanadhari manossa, namong Allah ngalebhi'I bicaksana dheri setan. Setan lebbi kowat dhari manossa, namong Allah lebbi kowat dheri setan. Oninga panjenengan, pangandhika kabendheren olle abebasagi kaula sadaja dhari kobasana setan? Bhanyak manossa se tak seneng ngedingagi kabendherena Allah. Sadaja nolak kabendheren pangandhikanNa. Sadaja ampon etipu sareng iblis. Iblis otaba setan se ampon ngyakinagi sadajana sareng tepoan. Onggu kabendheranna Allah ta' samanina sae e perengaggin. kabendheran panika akadhi obat paek otaba jarum sonti' kaangguay oreng se sake', ta' nyaman. Namong manabi oning saena pangandhikana Allah, ban parcaja, tretan bhakal lepas dhari kobasana setan. Kabendherana Allah samanina mabebassagi manossa dhari tepoan setan. Namong se pertama kodhu oning kabendheran paneka, tor parcaja.

Perengngagi ponapa se edhabuagi ketab socce: para tretan, ja' parcaja dha'ka sadajana erroh, namong coba' sadajana erroh sopaja panjenengan ponapa asalla dhari Allah ponapa buntan. Kadiponapa kaula bisa'a nyoba' napa se edhabuagi roh-erroh? Nyare sami uji kalaben abandingagi napa se e dhabuagi erroh sareng napa se e dhabuagi sareng Allah. Allah panika sae ban ta' kera abaobha. Bu-dhabuna jugan sae ban ta' kerra aobha. Paneka sebabba anapa kaula mempelajari dhabuna Allah se e toles e dhalam ketab socce. Ponapa sampeyan ngaoningin sa ghuonghuna se e toles sareng bi-nabi Allah? Ponapa para tretan ngarte maksod dhari bu-dhabuna Allah? Ponapa sampian parcaja de'ka pangandhika se e dhabuagi Allah? Kaangguay bisa'a nyingla dhari tepoan setan, se pertama sampeyan kodu oning ban parcaja dha'ka ponapa bisaos se ampon e dhabuagi Allah.

Para tretan. Mator sakalangkong ampon merengngagi siaran kaula. Kaula sadaja bhakal tatemoa pole e bhakto siaran se bhakal dhateng kangguy ngoladhi kadiponapa Allah nyipta'agi alam dunya panica. Dharmoga dhari berkat Allah ngaobin panjenegan e sa'at panjenengan arenungagi janjiNa se ajib: **"Panjenengan bhakal oningnga kabendheran ban kabendheran panika bhakal mabebassa panjenengan!"** Manabi panjenengan kaagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 4

Alla nyepta'agi alam dunya

Para tretan sarta sahabat pamereng sadaja

Siaran pangajaran se sejate e are mangken maso' de'ka pangajaran empa' . E dhalam buku pertama Taurat, enyamaen Kadaddiyen dhalam pasal pertama, ayat setong ben duwe' nyebutagi:" E bakto Allah nyepta'agi alam dunnya, bume reya gi' ta' etemmo bangonna ban gi' ta' etemmo karowanna kabadha'anna. Kabbi gi' katotoban tase' raja. " e bakto Allah nyepta'agi bume, sobung paponapa se odhi' e bume. Sadajana gi' ta' etemmo bangonna ban coma' petteng calemodan. Nangeng Allah ampon arencanaagi nyepta'agi manossa. Manossa samanina ngagungin kakowadhan kaangguy naresnaen ban taat de'ka Allah. Namong sabeluna Allah nyepta'agi manossa Allah nyadiaagiya kenengan se bagus menangka "bengkona". Allah terro sopaja kaodhi'ana manossa gu-onggu taremtem. Samangken kaula bakal ngedingagi kadiponapa caretana Allah nyepta'agi bume kaangguy nyiapagi kenengana manossa se bhakal ecipta'agiya.

E dhalam kitab socce ecareta'agi:"nem are abitepon Allah nyepta'agi langi' sareng bume, tase' ban sadaja se badha e dhalema ." napa se ecipta'agi Allah e dhalam nem are paneka? Nyara ngoladhi pasal pertama Taurat.

Are pertama, kitab socce notoragi:

bume reya gi' ta' etemmo bangonna ban gi' ta' etemmo karowanna kabadha'anna. Kabbi gi' katotoban tase' raja. Dineng tase' raja jareya omba'na raja tor petteng calemodan, tape kobasana Allah ngabang e bagiyen attassa aeng. Allah adhabu, "Mara tera'!" Kabadha'an laju tera'. Allah ngoladi ja' tera' jareya bagus. Se tera' laju epalaen dhari se petteng. Se tera' jareya epareng nyama "Seyang," dineng se petteng epareng nyama "Malem". Malem la lebat pas agante lagggu. Jareya are se kapeng settong.

Allah adhabu, "Mara badha tera' e dhalam petteng." Allah dhabu sopaja bume apoter skalian e dhalam pa'lekor jam. Paneka sababba kaula sami ngagungin dhu bellas jam tera' ban dhu bellas jam petteng e dhalam sa are. Allah paneka luarbiasa Salerana malaen se petteng dari se tera'.

Are kadhuwe', kitab socce notoragi:

Allah adhabu, "Mara metto kubah se raja sopaja aeng reya daddiya dhu bagiyen, ban bagiyen se dhadhuwa' jareya sopaja ta' acampowa pole." Se edhabuwagi Allah jareya kalakon. Daddi Allah la abadhi kubah se malaen aeng se badha e baba'anna dhari aeng se badha e attasanna. Kubah jareya epareng nyama "Langnge'". Malem la lebat pas agante lagggu. Jareya are se kapeng dhuwa'.

Allah nyepta'agi kubah e saantero bume, se kaula nyamaen atmosfer. Gepaneka langi' se notobi bume ban badha hawana se bisa kaanguy anyaba. Atmosfer alindungi manossa ban sadajana dhari panasa are. Mon sobung lange' manossa ta' kera bisa odhi' e bume reya.

Are ka tello', Allah nyepta'agi tase', tenggangan, ban bu-tombuwan, ketab socce notoragi:

Saellana jareya Allah adhabu, "Mara aeng se badha e baba'anna langnge' reya agili akompol ka settong kennengnan, sopaja tana etangaleyana." Se edhabuwagi Allah jareya kalakon. Tana jareya eparenge nyama "Tenggangan" ban aeng se masettong eparenge nyama "Tase'". Ban Allah senneng ngoladi jareya. Allah laju adhabu pole, "Mara tana makalower samacemma ka'-bungka'an se ngasellagi gi-bigi ban se ngasellagi wa'-buwa'an." Se edhabuwagi Allah jareya kalakon. Daddi tana makalower samacemma bu-tombuwan se ngasellagi gi-bigi ban wa'-buwa'an. Allah ngoladi ja' jareya kabbi bagus. Malem la lebat pas agante laggu. Jareya are se kapeng tello'.

Allah nyepta'agi tase', ban songay , ebuwan ju-kajuwan, ban bu-tombuwan, sadaja kalaban buwa ban bigina bang-sebang. Allah ngoladi ja' jareya kabbi bagus. Sadaja se ecipta'agi Allah paneka sae, aji b ban samporna. Allah paneka samporna.

Badha se atanya, manabi Allah paneka sae, anapa e bume neka badha kajahadan ben benya' kasossa'an? Anapa sabana bisa gagal panen, anapa ana' kaula sake' ban mate? Paneka pertanyaan se penting, jawabanna bakal etemmoagi dhalem pangajaran se dhateng, sadaja badha e dhalem ketab socce. Se penting mangken kaula sami parcaja e dhalem ate je' Allah paneka bagus ban samporna, dadi **sadaja se ecipta'agi bagus ban samporna jugan.**

Mangken nyara mekkeragi kabagusanepon Allah. Allah nyepta'agi ju-kajuwan e are katelo'. Anapa Allah nyepta'agi ju-kajuwan kalaban wa'-bwa'na? ponapa Allah marlo'agi paneka? Ponapa Allah terro da'ar wa'-buwa'an? Allah nyepta'agi sadajana kaanguy kasaeanna manossa, benne kaanguy diri'na.

Ponapa oneng dha'ar buwa duren, otaba dung-tedhungan e babana kajuwan ban ngarte je' sadajana karana kasaeyanna Allah? Allah terro kaula sami ngarte de'ka kasaeyanepon, ban moji ka Allah. Paneka se etoles Daud e dhalem ketab Jabur: "Rassa'agi dibi' saapa saena Allah."

Are se kapeng empa'.

Saellana jareya Allah adhabu, "Mara e langnge' kalower rang-barang se tera' sopaja bume tera'a, kaanguy malaen seyng dhari malem, sarta kaanguy noduwagi sa'at parmola'anna are, taon." Se edhabuwagi Allah jareya kalakon. Daddi Allah la abadhi barang tera' se raja dhadhuwa', iya areya are se ngobasane seyng, ban bulan se ngobasane malem, sarta tang-bintang. Jareya kabbi bi' Allah esaba' e langnge' epanera'e bume, epangobasae seyng ban malem, sarta kaanguy malaen se tera' dhari se petteng. Ban Allah senneng ngoladi jareya. Malem la lebat pas agante laggu. Jareya are se kapeng empa'.

Napa se eanguy nyepta'agi sadajana paneka? Ketab socce Injil notoragi: "Alam paneka ecepta'agi sareng dhabuna Allah; daddi, ponapa se bisa etengale, kadaddiyan dhari ponapa se ta' bisa etengale." Allah ngangguy Dhabuna kaanguy nyepta'agi sadajana. Allah ban pangandhikana ta' bisa epesa, karana se

kadhuwa jareya saongguna settong. Ayat se lain notoragi: "Dhabu jareya apolong ban Allah ban Dhabu jareya padha bi' Allah. Dhari dha'-adha'na Salerana apolong bi' Allah. Sakabbiyanna ecepta'agi kalaban parantara'anna, ban dhari sakabbiyanna se badha reya, tadha' settonga se epabadha ta' kalaban Salerana."

Kaula sami ampon oning je' e are pertama Allah adhabu,"mara tera'" Kabadha'an laju tera'. Are se kadhuwa Allah adhabu , "Mara metto kubah" Se edhabuwagi Allah jareya kalakon. E are se katello' Allah adhabu, ban apa se edhabuwagi kalakon. E bhakto nyepta'agi bume Allah ta' ngaangguy pa-apa ban ta' ebanto sareng sapa'a bai. Sakabbiyanna e cepta'agi pera'ngaangguy dhabu. Allah pera' adhabu ban sadajana kalakon. Allah nyepta'agi sadajana ngaangguy dhabuna, ban Allah masettong sakabbiyanna kalaban kobasa e dhalem dhabuna. Karana dhabu paneka , bulan ban tang-bintang, badha e kenengngana beng-sebang. Karana dhabuna, ban-saben are pajar lagu arena nyonar ban e bhakto sore arena nyellem. Sossa ongggu kaodhianepon manossa manabi sadajana ta' eatur. Kitab socce adhabu: "Allah paneka esto!" kaula sami bisa ngandellagi kakowadanNa. Allah bakal neptebbi janjiNa! Salerana ta' kera aoba.

Are se kapeng lema'. Allah nyepta'agi ebuwan ko'-juko' ban no'-mano'. Kitab socce notoragi: "Saellana jareya Allah adhabu, "Mara e dhalem aeng agaremmet samacemma mahlok se odhi', ban e bang-abang pabannya' mano' ber-abberran." Daddi Allah la nyepta'agi keban tase' se ja-raja ban samacemma mahlok se odhi' agaremmet e dhalem aeng, sarta samacemma mano'. Ban Allah senneng ngoladi jareya. Allah aberkadi jareya kabbi, dhabuna, "Mara adhu'-budhu' ban atamba bannya' mossae aeng tase', ban no'-mano' sopaja atamba'a bannya'." Malem la lebat pas agante laggu. Jareya are se kapeng lema'.

E are se kapeng ennem, kitab socce notoragi je' Allah nyepta'agi ban-keban ban manossa. Pencipta'an paneka penting ban istimewa, bakto se gi' bhada tak cokop kaangguy kaula sami pahama parkara hakekadda Allah, otamana parkara manossa. E dhalem siaran saterosepon kaula sami bisa ngaoningin pa-ponapa se kadadiyan e are se kapeng ennem. Kadiponapa ban anapa Allah nyepta'agi manossa se pertama.

Bakto paneka kaula sami arembaga kasaeyanna Allah. Ponapa panjenengan ampon oneng ban arasa'agi kasaeyanna Allah? Kitab socce notoragi de'ka kaula sami: "*Manossa ta' bisa odhi' pera' dhari nase' malolo, tape laen dhari jareya dhari pa-apa se edhabuwagi Allah.*" E dhalem pangajaran saterosa kaula bakal nemmoagi, je' manossa geneka ta' pera' badan malolo, ananging jugan jiba se kekal. Paneka se kodu e parengin kakan dhari dhabuna Allah sopaja odhi'. Dhabu paneka sae, nanging ponapa kaula romasa lapar de'ka dhabuna Allah akadiya tabu' se lapar saampona alako? Manabi kaula sami aromasa lapar se kadi paneka kaula sami bakal epakenyanga e dhalem kaodi'an kaula e dunya kantos e dhalem sowarga. Paneka ongguwun, karana Allah diri' se ajanji, bhakto Salerana adhabu:" Pojur oreng se ce' terrona ajalannagiya kasokanna Allah; oreng jareya bakal epacokoba bi' Allah!" Amin.

Para tretan. Mator sakalangkong ampon merengngagi siaran kaula. Kaula sadaja bhakal tatemoa pole e bhakto siaran se bhakal dhateng kangguy ngoladhi kadiponapa Allah nyipta'agi manossa se pertama.

Dharmoga dhari berkat Allah ngaobin panjenengan e sa'at panjenengan arenungagi tembalana Allah: **"Rassa'agi dibi' saapa saena Allah; bajjra ongggu oreng se ngaop ka Salerana."** Manabi panjenengan kaagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 5

Anapa Alla nyepta'agi manossa

Para tretan pamereng sadaja

Dhalem pangajaran se sejate sabeluna, kaula ampon oning kadi ponapa Allah nyepta'agi lange' sareng bume ban sadaja se badha e dhalema. Allah nyepta'agi sadajana pera' ngaangguy dhabuna. Anapa Allah nyepta'agi alam dunya neka? Sopaja bhakto manossa e cepta'agi, manossa ampon ngagungin kenengan se bisa kaangguy odi' se mapan. Samangken kaula badhi arembaga kadiponapa ban anapa Allah nyepta'agi manossa. E dhalem kitab kadaddiyan settong ayat nemlekor ban petolekor, Allah adhabu: *"Mara sateya ja' agabaya manossa se merep Sengko' ban ba'na, sopaja manossa jareya ngobasane bume, ko'-juko', no'-mano' ban sakabbinna keban laenna, se notot ban se kesset sarta ban-keban se agalajar e tana. Daddi Allah nyepta'agi manossa se merep Salerana dibi'. Manossa se ecepta'agi jareya badha se lalake' badha se babine'."*

Kaula same kodu enga' ban ngarte de'ka kabendheran paneka: *Manossa se ecepta'agi jareya badha se lalake' badha se babine', sopaja bisa akadiya Allah, ban merep sareng Allah... paneka nodhuwagi je' manossa paneka cepta'an se paleng penting e bandhing cepta'an se laena.*

Ponapa artosepon bhakto kitab socce adhabu: *"Manossa se ecepta'agi sopaja bisa akadiya Allah, ban merep sareng Allah? Dhalem pasal duwe' ayat peto' esebutagi: " Allah laju mondhut tana sakone', pas ebadhi manossa, manossa jareya eparenge nyaba se maodhi', se eserrobba'gi ka dhalem lobangnga elongnga; daddi manossa jareya pas odhi'. Ayat paneka nerangagi, pertama: manossa e cepta'agi kalaban dhu bagian; badhan ban jiba otaba nyaba. Kadhuwe': manossa e cepta'agi dhu tahap, tahap pertama: Allah mondhut tana sakone', pas ebadhi manossa. Tahap ka duwe': "Manossa jareya eparenge nyaba se maodhi', se eserrobba'gi ka dhalem lobangnga elongnga; daddi manossa jareya pas odhi'.*

Allah nyepta'agi manossa dhari tana. Meteorot para ilmuwan tana ngandung dhupolo unsur kimia. Para ahli notoragi je' sadajana unsur tana paneka bhada e dhalem badana manossa. Nabi Daud noles e dhalem kitab Jabur: *"Allah ngoladi e bakto manossa e cepta'agi, Salerana enga' je' kaula neka abu tana."* Namong Sanajjan bandanna manossa paneka dhari abu tana, manossa banne se tadha' argana. E dhalem bandanna manossa badha ra-kera petong pollo triliun sel. Bagian se kini', sadajana esusun kalaban samporna. Badanna manossa paneka ajib. E dhalema bhada otak, jantung, ate, ru-paru, tabu', lang-tolang, kole', mata, elong, colo' ban banya' pole se laena. sadajana bisa aguna kalaban bagus, manabi e oladhi sadajana paneka kaajiban. Namong Allah bisaos se bisa agabay kaajiban paneka. Nabi Daud nolesagi pojiana ka Allah: *"sengko' moji Allah se nyepta'agi engko' kalaban ajib. Ajib ongu sabarang se elampa'agi Allah, ban kaula gu-onggu ngarte."*

Bandanna manosa ajib ongu. Nangeng benne badan manossa se sapaneka se emaksud akadiya Allah, ban merep sareng Allah. Paneka mahal, sabab Allah paneka Erroh. Allah ta' agabay badana manossa akadi badhanepon. Dhadi bakto kitab socce nyebutagi je' Allah nyepta'agi manossa merep Allah, se

emaksod merep paneka jibana, jiba otabe erroh se badha e dhalem bandanna manossa. Engga' jae' se ecepta'agi pertama gepaneka badan jasmani sobung nyabana. Sabeluna eparengin nyaba manossa paneka jinaza. Anapa Allah ta' nyepta'agi manossa se langsung odhi' akadiya cepta'an se laina? Sopaja manossa oning je' manossa ta' bisa aberik nyaba ka aba'na dibi'. Namong Allah diri' se kagungan nyaba. Namong e dhalem Allah badha kaodi'an. Kitab socce notoragi: "*Manossa jareya eparenge nyaba se maodhi', se eserrobbaigi ka dhalem lobangnga elongnga; daddi manossa jareya pas odhi'.*" Manossa bisa odhi' karena Allah marengagi nyaba de' ka aba'na. kaodhi'an se namong kagungana Allah samangken badha kea e dhalem manossa.

Dhadi se emaksod merep sareng Allah benne badanna ananging jiba otaba errohna. Manabi saka'dinto apa se merep antarana Allah sareng manossa? Bedhe telo'an se merep gepaneka: pekeran, ate sareng katerroan otaba kebebasan kaangguy mele.

Pertama, allah apareng pekeran se bisa nonton manosa ajar bab Allah, kenal ka Saleranna sareng mekker akadi pekkerana Allah... jelasa anapa kaula sami ngarte de' ka pangajaran paneka namong keban ta' ngarte, sanajan keban andhi' otak? Anapa manossa bisa arembagan sareng manossa lainna? Karena manossa ngaandi' otak ban pekkeran otabe akal se same. Paneka se beda'agi kaula sareng keban.

Allah apareng akal pekkeran sopaja manossa ngarte de'ka karsa sareng dhabuepon Allah. Allah apareng kemampuan pekkeran se luar biasa de'ka manossa, Salerana poron manossa ngagungin hubungan akrab sareng Allah, akadiya sabad. Namong pangataowan ban kabicaksanaana manossa ta' sami sareng Allah. Pangataowan ban kabicaksanaana Allah jauh alebi'l manossa. Se kodu e ngartenin, Allah apareng jiba ka manossa sopaja manossa bisa arasa'agi hubunganepon sareng Allah se odhi'. Paneka se kadaddiyen de'ka nabi Ibrahim. Nabi paneka e sebut sabad Allah. Karena bisa arasa'agi hubungan se akrab sareng Allah. Nabi Ibrahim ajar kenal de'ka Allah ban ngagungin hubungan akrab sareng Allah akadiya dhu sabad. Benne pera' nabi Ibrahim se bisa ngagungin kasempadhan dadi sabad Allah. Nanging Allah tero kaula sami jagan bisa dhadi sabad Allah, milana Allah nyabe' jiba se ngagungin pekeran de'ka kaula sami.

Allah tak seneg manabi kaodi'an kaula namong akadiya keban se ta'bisa ngarte, otaba mekker bab Allah. Keban andi' colo' nanging ta' bisa ngocap kaso'on de'ka Allah. Keban andhi' mata ben kopeng nanging ta' bisa maca ban ngedingagi dhabuna Allah.

Dadi panjenengan se ngeding siaran paneka... manossa se ecepta'agi merep sareng Allah, bisa kenal de'ka Allah. Mekkeragi, ngedingagi pangandikaNa ban arembagan sareng Allah. Panjenengan bisa dhadi sabad Allah, manabi parcaja ban narema jalan se leres se ampon e sadiaagi sareng Salerana. Kaula sami bekal ajelasagi jalan se leres se ampon e sadiaagi paneka e dhalem siaran saterosa. Samangken se parlo kaenga'in gepaneka **pertama**: Allah ampon pareng pekeran sopaja bisa kenal ban pahama ka Allah.

Dhuwe', e bakto Allah nyepta'agi manossa se merep sareng Allah, Allah apareng hal se laen de'ka jibana manossa. Salerana apareng ate, sopaja manossa bisa neserr ka Allah. Ate e ka'dinto laen sareng ate se badha e dhalem badan jasmani kaula sami, nanging khalbu... pa-ponapa se agabay kaula ngaandi' perasaan dhalem jiba, emosi ban cem-macem motivasi. Paneka se eparengagi ka dhalem jibana manossa saengga manosa bisa arasa'agi apa se erasa'agi Allah. Allah bisa sabbar, bisa duka, bisa seneng, bisa sossa, bisa jagan nesser. Paneka sababa Allah marengagi perasaan de'ka jibana manossa, sopaja manossa

seneng de'ka se kasokane Allah ben baji' de' ka se ekabaji'i Allah. Allah terro manossa aneserran ka Allah kalaben tolosa ate. Paneka sababba Allah nyepta'agi manosa merep Allah, ban apareng perasaan ka manossa.

Ka telo', se padha antarana Allah bi' manosa gepaneka: pangaterroan ban kebebasan mele. Alah nyabe' pangaterroan ka dhalem jibana manossa sopaja manossa bisa mele jalana dibi'. Akadiya Allah kagungan peleyan kaangguy ajalanagi pa-ponapa otaba ta' ajalanagi pa-ponapa bisaos. Allah apareng pangaterroan dhalem jibana manossa sopaja manossa bisa andhi' peleyan kaangguy dibi'na. kalaban saneka Allah apareng hak ban tanggung jawab ta'at ka Allahponapa bunten. Allah bisa nyipta'agi manosa se ta' andi' peleyan, manossa akadi boneka otabana mesin. Boneka otaba mesin ta' bisa aguli otaba alako e lowar se ampon e tantoagi. Akadiya are se nyonar e temor ban nyellem e bara' e ban-saban are. Manosa paneka cepta'an se istimewa.

Manossa e cepta'agi namong kagem Allah. Kalaban pekeran, ate, ban pangaterroan, Allah akarsa sopaja manossa taresna ban ta'at de'ka Allah, kalaban kesadaranna dibi'. Sabab manabi e paksa kataresna'an paneka benne kataresna'an. Allah mabebas kaula sami mele jalan se ka'ima se bekal e pele. .. ponapa argai dhabuna Allah otaba ya-nyeya. E cepta dadi kagungana Allah, artosepon kaula sami odhi' e alam dunya paneka benne kaangguy aba'na dibi' nanging namong kaangguy Allah, dadi kasokanepon ban kamoljaanepo Allah.

Sobad pamereng, mangken kaula oning je' Allah nyepta'agi manossa kalaban kemampuan samanina kennal, taresna, ban ta'at ka Allah. Sebab jiba se eparengagi de'ka kaula jiba se langgeng, sami bi' Allah paneka langgeng. Allah terro kaula sami dhadi sobadda Allah, sateya, lagguna ban sanimanina. Paneka sababa Allah nyepta'agi manossa merep salerana.

Para tretan. Mator sakalangkong ampon merengngagi siaran kaula. Kaula sadaja bhakal tatemoa pole e bhakto siaran se bhakal dhateng kangguy arembaga bab dhu oreng manossa... nabi Adam ben Siti Hawa. Dharmoga berkat dhari Allah ngaobin panjenengan e sa'at panjenengan arenungagi dhabuna Allah: *"Taresnae Allahna ba'na sampe' ka dhalem atena, sampe' nyarepsep ka sokmana, kalaban ngettokkagi akkalla."* Manabi panjenengan ngaandi' pertanyaan bab ponapa'a se ampon eperengagi, toles pesan dha'ka pangajaran sajate. Kalaban nomer WA 081-333-777-386. Mator sakalangkong.

Pangajaran sejate

Pangajaran 6

Nabbi Adam ban Siti Hawa e Kebbun Eden

Para tretan, samangken pangajaran sejate nerosagi pangajaran bab ponapa se ampon kadaddiyan e are parmola'an dunya. Kaula bhakal ngaoningin parmola'anna kaodianepon nabi Adam ban Siti Hawa e dunya. E pangajaran sabeluna , ketab socce atotoran: *“Nem are Allah nyipta'agi langi' sareng bume.”* Manossa e cipta'agi e are ka ennem. Manossa cipta'an se paleng molja. Sabab moske badana dhari tana , nanging sareng Allah, badan neka eparengge jiba langgeng se ta' bisa mate. Merep bi' Allah se ngagungin pekeran, ate ban pangaterroan, dhalem jibana. Paneka eparengngagi coma' kaangguy manossa. Cepta'an se laen ta' andi' pekeran, ate ban pangaterroan. Allah marengen katellona sopaja manossa bisa kenal de'ka Allah. Lebat ketab socce kaula ngaoningin je' saampona nyepta'agi manossa bhada pole se e cepta'agi kaangguy manossa. Ponapa paneka? Nyara ngoladi ketab kadaddiyan pasal dhuwe', molain ayat peto' :” *GUSTE Allah laju mondhut tana sakone', pas ebadhi manossa, manossa jareya eparengge nyaba se maodhi', se eserrobbagi ka dhalem lobangnga elongnga; daddi manossa jareya pas odhi'. Saellana jareya GUSTE Allah pas abadhi bun-kebbunan e Eden, mongging temor; manossa se ebadhi gella' esaba' e jadhiya.”* Yat-ayat paneka nodhuwagi je' Allah abadhi bun-kebbunan se bagus menangka kenenganna manossa . bun-kebbun paneka enyamaen Eden se artosepon “ gumbira”. Nyama laena gepaneka Firdaus. Benya' se nyangka Firdaus paneka bhada e langi', nanging metorot ketab socce kebbun Firdaus paneka badha e bume, e kenengan se anyama Eden. Mon samangken Eden paneka badha e nagara Irak. Metorot tolesana bi-nabi Firdaus e bume paneka laen sareng Firdaus e sowarga. Ayat saterosepon notorgi:” *Allah laju matombu samacemma ka'-bungka'an se gus-bagus, se ngasellagi wa'-buwa'an se man-nyaman. E nga'-tengnga'anna bun-kebbunan jareya badha bungkana kaodhi'an, ban bungkana pangataowan parkara se becce' ban se juba'.* Bun-kebbunan jareya tanana bacca polana egili'i songay dhari Eden; e lowarra Eden songay jareya acangka empa'. *Saellana jareya Allah pas nyaba' manossa gella' e bun-kebbunan Eden, kaangguy agarab ban meyara bun-kebbunan jareya.”*

E ka'dhinto' kaula sami bisa oning je' Allah ampon nyiapagi sadaja se kaparlo kaangguy kaodianepon Adam e kebbun Eden. Allah apareng sadaja se bagus ban magumbira ate, sopaja kaodianepon taremtem. Adam eparengi tanggung jawab , kaangguy agarab ban meyara bun-kebbunan paneka. Taremtem ongu kaodianepon Adam. Kataremtemanepon ta' coma' paneka, sabab saben are Allah dhateng ka Eden.

Allah nyander ka kebbun Eden sopaja bisa arembagan sareng Adam. Bayangagi presiden nyander de'ka compo' panjenengan coma' tero arembagan sareng panjenengan. Luar biasa! Kenga'en Allah nyepta'agi manossa kalaban pekeran, ate ban pangaterroan sopaja Allah ban manossa bisa abag-rembag, aneng-senneng, setong ate, setong pekeran, e dhalem kalanggengan sowarga. Allah tero hubunganna sareng manossa paneka samanina akadiya sobad.

Sobad pamereng, *e nga'-tengnga'anna bun-kebbunan jareya badha dhu ka-bungkaan se penting, se setong anyama bungkana kaodhi'an, bansetonga bungkana pangataowan parkara se becce' ban se juba'.*

Ekoca'agi: Allah pas adhabu ka manossa jareya, "Ba'na olle ngakan buwana sakabbinna ka'-bungka'an e bun-kebbunan reya, kajabana buwana bungkana pangataowan parkara se becce' ban se juba'. Mon ba'na ngakan buwa jareya, sanatkala jareya keya ba'na bakal mateya." Anapa Adam ta'ole ngakan buwana bungkana pangataowan parkara se becce' ban se juba'? mon ta' ole ekakan, anapa etombuagi e jadhiya?

Sobad pamereng, Allah nglakone sadajana kalaben rencanaNa se samporna. Allah ampon nodhuagi tresnana kalaban nyadiyaagi sadajan se kaparlo kaangguy Adam. Kalaban nombuagi *bungkana kaodhi'an* Adam enga' ta' perna maambu paponapa se sae kaangguy Adam, la'-mala' kaodhi'an langgeng ampon esadhiya'agi kaangguy Adam. Nanging anapa badha bungkana pangataowan parkara se becce' ban se juba' paneka? Para tretan, akadiya taresnana Allah se raja de'ka Adam, kantha jareya keya Adam kodu bisa nodhuwagi taresnana kalaban ta'at de'ka Allah. Seba etoles dhalem ketab socce pasera'a se taresna de'ka Allah paste ta'at ka Salerana. Allah ta' nyepta'agi manossa akadi robot. Nanging nyepta'agi manosa se andhi' pekeran, ate sarta pangaterroan sopaja bisa mele dibi' taresna sareng ta'att dhe' ka Allah ponapa bunten. Dadi paneka akadi ujian de'ka Adam.

Allah ampon pareng oning napa akibadda manabi ta' ta'at de'ka dhabuNa. Kalaban tegas Allah adhabu : "Mon ba'na ngakan buwa jareya, sanatkala jareya keya ba'na bakal mateya." Ketab socce notoragi: "opana dusa paneka pate." Mungkin badha se atanya, apa dusa jareya? Ketab socce ngajaragi, se ta' atoro' ka parentana Allah paneka dusa. Dadi pasera'a bisaos se ta' atoro' de'ka parenta otaba dhabuna Allah bakal mate. Ampon etegasagi e dhalem ketab socce je' pate paneka okoman karena dusa. Laju pate paneka apa? Badha se notoragi mate paneka sobung omor, telar dunya, ta' oning pa ponapa pole. Nanging metorot tolesana bi-nabi, mate paneka artosepon tapesa, pegga' hubungan. Kapatean jasmani gepaneka pesa dari kaodi'an jasmani. Ollena dhari dusa paneka mate rohani, gepaneka pegga'epon hubungan kaula sareng Allah, sumber ban pangobasa kaodhi'an. Artosepon manabi Adam ngakan buwa paneka hubunganpon Allah sareng Adam pegga'. Sengko' tak bisa narema otaba dina'agi oreng se ta' ta'at ka tang parenta ban nyake'en atena sengko'. Sapa'a se ta'taat maste mate. Sengko'

ngoser Lusifer ban kat-malaikata bakto aberonta' ka Sengko'. Ban mon be'na adusa ka Sengko' ba'en e osera keya. Jo' anggeb aberonta' reya biasa. Tapesa dhari Allah artena tabuang.

Allah paneka kodus. Se kodus ta' bisa acampoa bi' se dusa. Aberonta' de'ka Allah paneka dusa. Manabi kaula dusa sobung pole karena kajaba mate. Namong kalaban ta'at de'ka Allah bisaos kaula sami bisa odhi' ban sema' sareng Allah.

Kadiponapa Allah nyepta'agi babine' se pertama? Kaula bhakal ajara lebat bagiyana aher dhari ketab kadaddiyana pasal dhuwe'. Nga'neka caretana epon. Allah ngageli Ta' becce' mon Adam reya kadibi'an, aba'na buto kanca me' olle abanto. Allah parenta de'ka sadajana ban-keban nyema' de'ka Adam, laju Adam apareng nyama de'ka sadajana. Dari sadajana ban-keban paneka sobung se cocok kaangguy abanto Adam. Laju bi' Allah Adam epatedhung sampe' ngeddha, ban teppa'na manossa jareya tedhung, Allah mondhut sala settonga tolang roso'na. Tolang roso' jareya laju ebadhi oreng babine', pas ebakta ka Adam. Adam seneng ban ngoca' areya se ekabuto bi' sengko'. Bi' sengko' enyama'ana Hawa, polana oreng reya ekala' dhari lalake'. Allah nyepta'agi manossa lalake' ban babine'. Jareya asal molana oreng lalake' adina'agi rama ebuna apolong ban binena, ban se kadhuwa jareya pas daddi settong keluarga. Sakabi'anna asala dhari rancanana Allah. lalake' ban babine' ecipta'agi sopaja saleng naresnane, apolong dadi setong keluarga moji ban molja'agi Allah. Allah sanget taresna de'ka Adam, Allah terro sopaja Adam odhi' taremtem ban bine'na, sarta bisa naresnane bine'na reya akadiya aba'na dibi'. Ban se lebi penting pole bisa ngaandi' hubungan se dhalem sareng Allah, bisa oneng, taresna ban ta'ata ka Allah samanina.

Ketab socce notoragi: " Allah ngoladi sabarang se ebadhi Salerana jareya ce' bagussa kabbi. Malem la lebat pas agante laggu. Jareya are se kapeng ennem." Sapaneka caretana Allah nyepta'agi lange' ban bume sarta esena. E are se kapeng petto' sabarang se elampa'agi Allah la mare kabbi, ban Allah pas aistirahat. Are se kapeng petto' jareya laju eberkadi pas ekhususagi ka Salerana, sabab e are se kapeng petto' jareya Allah aistirahat saellana mare se nyepta'agi alam dunnya. Anapa are se kapeng petto' jareya Allah pas aistirahat? Sabab sabarang se elampa'agi Allah ampon mare. sabarang se ebadhi Salerana jareya bagus kabbi. Paneka sababba samenggu badha petong are.

Para tretan. Mator sakalangkong ampon merengngagi siaran kaula. Manabi panjenengan kaagungan pertanyaan bab ponapa'a se ampon eperengagi, toles pesan dha'ka pangajaran sajate. Kalaban nomer WA 081-333-777-386. Mator sakalangkong.

Pangajaran sejate

Pangajaran 7

Rosakka alamdunnya

Dhalem dhuwa' pangajaran se dhi-budhi kaula ampon ngaonengin caretana Allah nyepta'agi dhu oreng manossa pertama. ketab socce notoragi:" *Allah nyepta'agi manossa se merep Salerana dibi'. Manossa se ecepta'agi jareya badha se lalake' badha se babine'.*" E dhalem jiba na lalake' ban bebine' paneka Allah nyabe' pekeran ban ate sopaja bisa naresnane, sarta eparenge pangaterroan kaangguy nantoagi peleyanna. Allah karsa manossa kenal, nesor, ban samanina nyemba ka Allah. Kaula ampon oning ja' e *nga'-tengnga'anna Firdaus badha bungkana pangataowan parkara se becce' ban se juba'.* Allah pas adhabu ka manossa jareya, "Ba'na olle ngakan buwana sakabbinna ka'-bungka'an e bun-kebbun reya, kajabana buwana bungkana pangataowan parkara se becce' ban se juba'. Mon ba'na ngakan buwa jareya, sanatkala jareya keya ba'na bakal mateya." Papakon ban okoman paneka, egabay sopaja Adam ban Hawa bisa noduwagi taresnana ka Allah. Banne sopaja manossa paneka adusa.

Samangkin kaula arembaga ketab kadaddiyen pasal telo'. Pasal paneka nyareta'agi anapa dunya paneka bisa rosa'. Manabi kaula ampon garte se e ajaragiya kaula bakal oninga anapa manossa ros-terrosan terro alaban Allah. Anapa dunya paneka posa' kalaban kasossa'an ban kasangsara'an.

E parmola'anna dunya paneka Adam ban Hawa eneng e kebbun Eden. E ka'dhissa' se kadhuwa ganeka odhik kalaban taremtem sebab sadaja kabutowanna la esadhiya'agi. Se lebi maseneng pole ben-saben are Allah nyander ka kebbun Eden arembagan kalaban se kadhuwa. Allah terro hubunganna sareng manossa paneka samanina akadiya sobad.

Se odhi' e kebbun Eden nyatana ta' pera' Adam ban Hawa. Setan se lecegan badha keya e kebbun neka. E saat Allah nyepta'agi alam dunya paneka setan ngabesen keya. E bhakto Allah ta' magi manossa ngakan buwa pangataowan parkara se becce' ban se juba' setan ngedhinga keya. Setan paneka mosona Allah, aba'na ta' seneng de'ka apa se elampa'agi Allah. Sadaja se elampa'agi Allah eganggu ban erosa'.

Nangale'e je' manossa paneka eparengin sadaja se istimewa, setan ta' nengneng. Setan arencana'agi agudha manosa sopaja manosa aberonta' ban ta' ta'at ka Allah saengga tapesa dhari Allah, padha bi' setan. Kalaban saneka Adam bisa kekobasae setan.

Setan ta' tarema polana manossa e cipta'agi merep sareng Allah. Tantoepon Allah ngaoningin sadajana. Parenta ta' kenging ngakan buwana bungka pangataowan parkara se becce' ban se juba' paneka, egabay polana Allah oning je' setan terro agudha manossa. Allah ngaoningin sadajana. Adam ban Hawa ta' oning de'ka rencananna setan, se jelas aba'na ta' kenging ngakan buwana bungka pangataowan parkara se becce' ban se juba'.

E setong are, bhakto Adam ban Hawa neng e seddi'na bungka terlarang paneka, kalaban bujud olar setan nyander ka seddi'na Hawa. ban molaen acatoran ben aba'na. metorot ketab socce olar tamasok keban se cerdik katembang keban laena. Olar nyander ka Hawa ban atanya kalaban pertanyaan se ajeba'. Olar atanya:"Apa bendher Allah ta' marengngagi be'na ngakan sadaja buwa e kebbun reya? "

Anapa setan nyema'en manossa kalaban bujud olar? Olar paneka keban se paleng cerdas ebanding keban se laenna. Aba'na mele bujud olar sa'at acatoran sareng Hawa sebab terro tampil bagus ban bicaksana. Kantos samangken setan terro tampil bagus ban bicaksana e ade'na manossa, cacana manes ngapencot ate, namong saongguna a jebbak. Badha tolesan e ketab socce: " dhang-kadhang Iblis dibi' jugan nyamar akadi malaekat terrang." Setan paneka panepo ban lecegan. Paneka sababa setan nyema'en Adam ban Hawa abujud olar se bicaksana. Paneka jugan sababa anapa setan mele acator bi' Hawa banne acator bi' Adam, peker a lebi gempang agudha Hawa dharipada Adam. Setan oning je' Allah ampon apareng parenta parkara bungka paneka sabeluna Hawa ecipt'a'agi. Setan oning manabi Hawa bisa masok de'ka jebbaka, mela lebi gempang nyacae Adam sopaja alaban parentana Allah.

Setan ngoca' : "Apa bendher Allah ta' marengngagi be'na ngakan sadaja buwa e kebbun reya?", setan nyoba sopaja Hawa mangmang de'ka dhabuna Allah. Paneka sababa setan ngguna'agi oca' *apa bendher Allah..?* paneka sala setong carana setan nepo ban eret manossa maso' ka dhalem dusa. Setan tako' sadaja kajahaddanna tabuka'. Setan oning je' kabendherran bekal abangkangen kabejjatanna akadiya tera' e dhalem papetteng.

Nyara kedingagi catorana Hawa ban Iblis: "Saodda babine' jareya, "Buwana sabadhana ka'-bungka'an e bun-kebbunan reya olle ekakan, kajabana buwana kajuwan se badha e nga'-tengnga'anna bun-kebbunan reya. Bi' Guste Allah buwana ta' eparengngagi kakan otaba esedding. Mon larangan jareya eterrak, tanto sengko' mate." Olar gella' ngoca', "Enja', ba'na ta' kera mate. Guste Allah adhabu kantha jareya sabab la ngagali mon ba'na ban lalake' rowa ngakan buwa jareya tanto pekkeranna pas tabukka', pas padha ban Guste Allah, tao ka parkara se becce' ban se juba'."

Paneka tepoan se luar biasa. Allah adhabu manabi Adam sareng Hawa ngakan buwa paneka aba'na bakal mateya, nanging setan mala ngoca' ba'na ta' kera mate. Dadi setan ta' pera' agudha sopaja atena manossa mangmang de'ka bu-dhabuna Allah, nanging jugen mongkerana. Ngeding parkara paneka apa panemmona panjenengan? Pasera se leres ban jujur, Allah otaba setan? Meteorot ketab socce Allah paneka Maha Bendher ban ta' lecegan. Nangeng setan, akadi se eatoragi Nabi Isa de'ka para moreda; Iblis ta' bisa eparcaja, dhari lamba' Iblis jareya tokang mate'e, ta' tao noro' ka se bendher, sabab Iblis jareya ta' andhi' barang se bendher. Mon Iblis jareya acaca lecek, jareya pantes, sabab pajat cara jareya babategga. Iblis jareya lecegan, ban asalla sakabbiyanna kalecegan.

Badha pole carana setan nepo ban co-ngoco manossa, setan ngalak pa-ponapa se bagus ecampor kalaban se jahat. Coba kenga'en bentana de'ka Hawa:" bakto ba'na ngakan buwa jareya tanto pekkeranna pas tabukka', pas padha ban Guste Allah, tao ka parkara se becce' ban se juba'." Bakto setan ngoca' "pas padha ban Guste Allah" setan leceg, karena oreng se dusa ta' mungkin dadi padha bi' Allah sabaliga dadi pada bi' setan se jahat. Nanging ebhakto setan ngocak :” be'na bakal tao ka parkara se becce' ban se juba'." Paneka badha bendherra sabab saampona Adam ban Hawa dusa aba'na oning beddana se juba' ban se becce'.

Tantona setan ta' kera nyareta'agi dha'rema sake' ban pae'na kaodi'anepon manabi ngagungin pangataoan ka parkara se becce' ban se juba' paneka. Para pamereng, ja' kalopaen ja' setan paneka panepo ban lecegan. sadajana elokoni sopaja sadaja se ecipta'agi Allah rosa' ban anccor.

Dhepa' baktuna Adam ban Hawa mele eantarana dhabuna Allah otaba oca'na Setan, ka'ema se eparcaja? Narema se bendher otabane se leceg? Pasera se ekatoro' Allahna tera' otaba allahna pepeteng? Ponapa taresnana de'ka Allah ampon raja saengga bisa ta'at de'ka Allah?

Peleyanna Adam ban Hawa dadi sejarah. ketab socce notoragi:" Babine' jareya nangale'e ja' kajuwan jareya lebur ban buwana mon ekakan tanto nyaman. Ca'na pekkerra, ce' nyamanna mon aba'na pas daddi penter. Daddi buwana kajuwan jareya pas epetthek, terros ekakan, se lake' eberri'i keya, sarta pas noro' ngakan. Ta' bisa eparcaja ongggu, Allah nyeptha'agi manossa merep salerana sopaja samanina manossa bisa kenal, taresna ban ta'at de'ka Allah. Nanging taresnana ka Allah gi' ta' raja. Adam sareng Hawa norote bentana setan alaban de'ka Allah.

Parkara paneka onggu masedih ate. Bangatowana kaula sami aberonta' ka Allah. Dhabuna Allah: "Dusa maso' ka dunnya lebat oreng kasorang, ban dhari dusa gapaneka dhateng pate. Daddina, pate alatlat ka sadajana manossa, sabab manossa padha dusa sadaja. Kaula bisa tak seneng de'ka kabendherran paneka nanging geneka sanyatana."

Sobad pamereng geneka se marosa' ban maancor bume. Bume neka ecipta'agi kalaban samporna, ban Allah akarsa sadajana pagun kantha jereya. Nanging Adam gagal alebadhi ujian. Akadiya panyake' se nolar se ganas, dusa ban pate alatlat ka sadajana manossa, nyebabagi manossa padha dusa kabi, kantos de'ka kaula sami. Pasera se ta' perna nerrak dhabuna Allah? Sobung. Kaula sadaja padha bi' Adam ban Hawa.

Ontonga kaula sami gi' andhi' pangareban, sebab Allah angandika: "Daddi, manabi lantaran salana oreng settong se nerrak dhabu andaddiyagi sadajana ommat manossa ekom, sapaneka jugan se elampa'agi oreng settong se atoro' ka kasokanna Allah andaddiyagi sadajana oreng epabebas dhari kasala'anna ban eparenge odhi'."

Para tretan. Mator sakalangkong ampon merengngagi siaran kaula. Manabi panjenengan ngagungin pertanyaan bab ponapa'a se ampon eperengagi, toles pesan dha'ka pangajaran sajate. Kalaban nomer WA 081-333-777-386. Mator sakalangkong.

Pangajaran sejate

Pangajaran 8

Ollena dusana Adam

Samangken kaula badhi ajara taurat ketab Kadaddiyan telo' sopaja oninga se kalakon dhe'ka Adam ban Hawa saampona dusa de'ka Allah. Edhalem ayat peto' etotoragi:" Gi' buru mare se ngakan buwana kajuwan jareya, pekkeranna pas tabukka', se kadhuwa jareya laju tao ja' aba'na padha abangkang. Daddi laju padha ngala' dhaunna ara, ebung-sambung epanotobi badanna." Apa se elakoni Adam ban Hawa saampona dusa ka Allah? Manossa nyoba'notobi rasa todhus ban sala, sabeluna ketab socce notoragi je' manosa paneka padha abangkang, tape padha ta' andhi' rassa todhus. Nanging saampona ngakan buwana bungkana pangataowan parkara se becce' ban se juba, abesanna de'ka bandanna aoba. Se kadhuwa aromasa todhus ban sala e adhe'na Allah se Maha Kodus. Daddi laju padha ngala' dhaunna ara, ebung-sambung epanotobi badanna. Tantoepon rasogan paneka ta' bisa notobi rasa todhus ban sala e dhalem atena.

Ketab socce notoragi : "Adam ban bine'na ngedhing Allah alomampa e dhalem bun-kebbunan, se kadhuwa jareya pas ngetek e antarana ju-kajuwan sopaja ta' eoladi Allah." Anapa ma' ngetek? Kadhuwana tako'. Akadiya maleng se ngetek polana ngeding suarana se andhi' roma. Adam sadar je' aba'na ampon aberonta' ka Allah, ban ngaoningin bekal olle okoman dhari Allah. Sabab Allah la adhabu:"Mon ba'na ngakan buwa jareya, sanatkala jareya keya ba'na bakal mateya."

Oning parkara paneka tantoepon Setan agella'an, karana aromasa menang. Adam ampon aberonta' de'ka Allah, ban akherepon Allah kodu ngokoma Adam, cepta'ana se samporna sareng molja paneka. Setan oning je' Allah paneka kodus, bendher ban adil. Allah beji' de'ka dusa. Poron ta' poron Adam ban Hawa paste eekom. Tolesana nabi notoragi: "*panengal Junandalem talebat soccena ngoladi kajahadan', Junandalem baji' ngoladi barang se ta' adil.*" Sabad pamereng, Allah se soce ta'kera mendel saos e bakto ngoladi kajahadan. Allah bakal ngokoma sadaja se alaban ka salerana. Adam ban Hawa masthe eekom sareng Allah.

Saterosepon napa se kalakon? Allah adhabu epakaja: "Badha e dhimma ba'na, manossa?" para tretan, taresnana Allah de'ka manossa ce' rajana. Tantoepon Allah oning je' Adam ban Hawa ampon dusa, ta' atoro' ka dhabuna Allah. Tantoepon atena Allah sossa ban sake', Nangeng Allah gi' nyare kadhuwena.

Masthe Allah oning je' Adam ban Hawa ngetek e antarana ju-kajuwan. Allah ngolo' manossa sopaja manossa poron jujur ban atobat ngakone sadaja kasala'anna. Allah terro Adam ban Hawa ngadep dibi' dhe'ka Allah ban atobat dheri sa-dusana. Allah teptep taresna dhe'ka Adam ban Hawa.

Saterosepon napa se kalakon? paratretan, Adam ngedhing tembalanna Allah ban nyaot tembalanna paneka, nanging apa jawaba Adam? Dhalem ketab socce etoles: " "Abdidalem mereng Junandalem badha e bun-kebbunan ka'dhinto, abdidalem tako', polana abdidalem abangkang; daddi abdidalem ngetek." Dhabuna Allah, "Sapa se malae ja' ba'na abangkang? Apa ba'na ngakan buwana kajuwan se bi' Sengko' ta' ebagi kakan rowa?" Adam nyaot, "Babine' paparengnga Junandalem ka'dhinto ngatore abdidalem buwana kajuwan ka'dhissa', daddi sareng abdidalem laju eteddha." Allah adhabu ka Hawa, "Arapa ba'na me' kantha jareya?" Saodda Hawa, "Abdidalem etepo olar, kantos abdidalem neddha buwana kajuwan ka'dhissa'."

Gateyagi jawaba manossa ganeka. Sadajana saleng mowang kasala'an. Adam nodhu Allah ban Hawa, oca'na : " "Babine' paparengnga Junandalem ka'dhinto ngatore abdidalem buwana kajuwan ka'dhissa', daddi sareng abdidalem laju eteddha.". Hawa nyala'agi olar oca'na : " "Abdidalem etepo olar, kantos abdidalem neddha buwana kajuwan paneka." Allah ngaoningen ese atena Adam ban Hawa, kadhuwana sala. Kaula ta' kera bisa ngetekkagi kabandharan dhari Allah.

Allah tak agudha Adam ban Hawa sopaja ngakan buwa neka, ban setan ta' maksa'a kadhuwana ngakan buwa neka jugan. Setan coma' bisa agudha ban nepo, nanging ta' bisa maksa sa oreng kaangguay alaban Allah. Setan ampon agudha ban nepo Hawa nanging sadaja se elakoni kareba Hawa dhibi' ban paneka se mapegel Allah. Adam ta' etepo olar, kalaban sadar Adam ngakan buwa paneka. Adam oning je' paneka ta' ebagi sareng Allah, nanging Adam mele jalana dibi', jalan kasesadan. Kasala'ana Adam benne coma' karana ta' ta'at ka Allah nanging karana nyala'agi oreng lain.

Kantos samangken, manossa se agabay sala ban dusa ros-terosan nyala'agi oreng lain. Allah adhabu lebat ketab socce:" Badha e dhimma ba'na, apa se elakone." Arapa be'na ta' parcaja ban ta'at ka dhabuna Sengko'?" arapa ba'na yanyeya'agi kabecce'anna Sengko'? arapa ba'na nyala'agi oreng laen kaangguay kasala'ana ba'na? ketab injil adhabu:" akadiya Sengko' se odhi', Dhabuna Allah, sakabbiyanna bakal asojuda, sakabbiyanna bakal ngakowa, ba'na kodu nanggung jawab lalakonna bang-sebang ka Allah." Apa jawaban kaula same e bhakto Alla atanya:" Badha e dhimma ba'na?".

Nyara ngoladi pasal paneka lebi dhalem pole. Okoman apa se eparengagi Allah de' ka Adam, Hawa ban oler. Kitab socce notoragi : "Allah pas adhabu ka olar jareya, "Polana tengkana ba'na se kantha jareya, bi' Sengko' ba'na eokoma; dhari sakabbinna keban, pera' ba'na se kodu nanggung babaston reya: ba'na kodu agalajar ngangguy tabu'na, ban saomorra kodu ngakan abu. Bi' Sengko' ba'na epamosowana ban babine' reya, toronanna ba'na ban toronanna babine' reya bakal amosowana; cethagga ba'na bakal eparemmoga bi' toronanna babine' reya, dineng ba'na bakal ngekke'a tombedda toronanna." Saellana jareya Allah pas adhabu ka babine' gella', "Mon ba'na teppa'na ngandhung bi' Sengko' epatamba'a malarat, mon rembi'a epasajana sake'. Maske kantha jareya ba'na gi' bakal pagguna barai ka lakena, ban ba'na bakal ekobasa'ana lakena jareya." Saellana jareya Allah pas adhabu ka se lake', "Ba'na ngedhingngagi cacana binena, pas ngakan buwa se bi' Sengko' ta' ebagi kakan rowa. Lantaran tengkana ba'na se kantha jareya, tana reya bi' Sengko' ebastowa. Saomorra ba'na kodu alako berra' sopaja olleya kakan se cokop dhari tana reya. Dhari tana reya bakal tomбуwa onbut se adhuri, ban bu-tombuwan alas bakal daddiya kakanna ba'na. Ba'na kodu alako berra' makalowar pello koneng mon terro olleya hasel dhari tana reya, sampe' ba'na mate abali ka tana pole, sabab ba'na reya asalla dhari tana, daddi kodu abali daddi tana."

Okoman Paneka akibad dari manossa se aberonta' ka Allah. Kalakoana ngaselagi kasossa'an ban rasa sake', dhuri, bu-tombuwan alas, allako berra' ban apelloan, panyake' ban kapateyan. Opana dusa paneka pate.

Kaula terro maengak pole napa se ampon kaula ajari, gepaneka mate sacara rohane paneka tapesa otaba potos hubungan dhari Allah. E bhakto Adam ban Hawa ta' ta'at dha'ka Allah sadaja ampon mesa dhari Allah sang sumber kaodhi'an. Nalekana manossa mele parcaja ka setan ban noro' jalana setan, manossa ampon kaelangan ha' dhari sadaja fasilitasepo Allah. Manossa dhadi mosona Allah, karena ampon dhadi kancana setan mosona Allah. Hubungan e antarana pegga'. Pasera'a se dadi kancana otaba pangikuta setan dadi mosona Allah.

Sabeluna badha se kodu kenga'en, gepaneka karena dusana Adam ban Hawa, sadajana se ebume neka ampon aoba. Dusa ampon alat-lat akadiya panyake' se nolar. Dunya posa' kalaban kajahadan, panyake', perang, katako'an, baji', pamberonta'an, korupsi ban en-laena. Paneka same akadi se edhabuagi Allah: "Dusa maso' ka dunnya lebat oreng kasorang, ban dhari dusa gapaneka dhateng pate. Daddina, pate alatlat ka sadajana manossa, sabab manossa padha dusa sadaja."

Dusana Adam ampon nolar de'ka kaula same. Manabi kaula sami mele ta' parcaja ban aberonta' ka Allah berarti kaula sami noro' jalanepon Adam ben setan. Okoman ban panghakiman de'ka Adam dadi okoman kaula sami. Paneka sababba Allah tangale jau. Moske saongguna Allah sema' de'ka kaula, sadusana kaula ampon megga'agi kaula dhari Allah se Kodus.

Namong, kaula same bisa moji Allah kalaban ate se gumbira, karena Allah ampon nyadhiya'agi jalan kasalamedhan se mabebas kaula sami dhari okomanna Allah. Kaula same kodhu parcaja ban narema jalan paneka. Insya allah, dhalem acara se dhateng, kaula bakal ngaonengen Allah ajanji marengi sa oreng panyalamet se bakal mabebas sadaja omad dhari kobasaepon setan.

Para tretan. Mator sakalangkong ampon merengngagi siaran kaula. Manabi panjenengan kagungan pertanyaan bab ponapa'a se ampon eperengagi, toles pesan dha'ka pangajaran sajate. Kalaban nomer WA 081-333-777-386. Mator sakalangkong.

Pangajaran sejate

Pangajaran 9

Janji se Bagus

Dhalem siaran sabeluna kaula sami ampon oneng caretana Adam ban Hawa se adusa de'ka Allah. E bakto manosa gi' ta' adusa ben-saben are Allah nyeperen manossa e kebbun Eden. Manabi ngeding Allah alomampa ka dhalem Kebbun manosa aromasa seneng atena. Dibi'na bisa acatoran kalaban Allah sampe tobug. Nangeng samangken manabi ngeding Allah maso' ka kebbun manossa ngetek, karana aromasa todhus ban tako'. Nanging Allah teptep nyemma'e manossa geneka, acatoran, ben nerangagi apa se bekal kalakon e dunya reya amarga sa-dusana, gepaneka kasossa'an ban rasa sake', dhuri, bu-tombuwan alas, allako berra' ban apelloan, panyake' ban kapateyan.

Akebat se laen gepaneka, kantos samangken bajangan kapatean bada e antarana manossa. Sadajana ampon aberonta' ka Allah melana kaula sami kodu nanggung okoman dhari Allah. Sa-dusana Adam nolar ka saantero bume, akadi Panyake' se nolar alatlat ka sadajana oreng. Paneka sababba Allah tangale jau. Moske saongguna Allah sema' de'ka kaula, sa-dusana kaula ampon mesa kaula dhari Allah se Kodus. Nabi Yesaya noles :” Polana kajahadanna ba'na Allah ta' meyarsa'agi e bakto ba'na adu'a ka Salerana. Sa-dusana ba'na se mesa ba'na dhari Allah.” Berta paneka ta'nyaman ekeding, masake' ate, nanging paneka se sabendherra.

Dusana Adam ampon maancor bume. Adam ampon nelaragi kraton tera' maso' de'ka kratona petteng. Karana Adam mele noro' buntek setan naseba Adam dadi dunora setan ban maso' ka apoy naraka. Mangken ampon sobung pangareban, sadajana ancor ban paneka langgeng. Rancanana setan maancor cepta'anna Allah se paling samporna ampon kalakon.

Poji sokor de'ka Allah, Allah taresna de'ka sadaja omatepon. caretana kaodi'anepon manossa tak ambu gen pamberonta'kana Adam. Allah ampon moka' labenga kasalameddan! Gi' badha labang se tabuka' kaangguy lepas dhari kobasana setan. Paneka sababa Allah angandika: “Sanare sapaneka, sajan dusa manossa, sajan raja panesserana Allah ka manossa.” (Rom5:20) ban : “Rahmadda Allah ban papareng kasalameddan eparengagi de'ka sadajana oreng.”(Rom 5:15). Para tretan pamereng, gi' bada pangareban kaangguy kaula same.

Para tretan, Allah paneka Adil ban Kudus. Sadaja se sala paste e okom. Sadaja se aberonta' kodu e adilin. Okomana dusa paneka pate ban samanina tapesa dhari Allah. Sanare sapaneka e are mangken kaula badi ngaonengin je' Allah kagungan rancana kaanguy nylametaghi manosa dari dusa. Kaula bakal ajara je' Allah se maha Soce ban Adil paneka jugan Allah se Maha Taresna. Allah sang hakim paneka jugan Allah Sang Juru salamet monggu sadajana omat.

Nyara nerosagi pangajaran kaula sami sopaja bisa ngarte lebi jelas de'ka rencana Allah se agung paneka. E dhalem ketab kadaddiyan pasal 3 kaula baca:" Allah pas adhabu ka olar jareya, " Bi' Sengko' ba'na epamosowana ban babine' reya, toronanna ba'na ban toronanna babine' reya bakal amosowana; cethagga ba'na bakal eparemmoga bi' toronanna babine' reya, dineng ba'na bakal ngekke'a tombedda toronanna."

Ayat paneka ta' gempang e jelasagiya, karana e dhalemepon benya' kabendherran se samar ban penting, se saterosepon bi' bi-nabi bakal ebuka' lebi terang. Nangeng esena ayat paneka bisa erengkes sapaneka: Allah aberta'agiya rencanana ngeremagiya sa oreng pambebas se mabebas manossa dhari kobasaepon Setan. Pertama, ayat paneka nodhuagi je' e dunya neka bhakal badha dhuwa' golongan manossa; golongan se manossa se dadi moredda Allah ban manossa se dadi moredda Setan. Reng-oreng se ta' ta'at de'ka Allah dadi dunora setan ban reng-oreng se ta'at de'ka Allah dadi ret-moredda Allah. Saterosepon, bakal dhatenga sa oreng se istimewa dhari toronana Hawa, gepaneka Sang Pembebas, se bakal ngala'agi Setan. Paneka janji se bagus monggu reng-oreng se terro bebasa dhari kobasaepon setan, nanging berta se juba' monggu setan. Bab se laen dhari ayat paneka setan bakal eparemmoga bi' toronanna babine' reya, dineng setan nyake'en Sang Pembebas neka. Edhalem perang paneka Sang Pembebas bekal ka-loka, nangeng bisa ngala agi setan. Dadi Allah bakal mabebas manossa dari kobasana setan ban epabali akantha asalla, menangka cepta'an se molja.

Dhalem gram-prongram se dhateng, kaula badhi oninga baramma bi-nabi aparing oning dhatenga sang Pambebas neka. Sopaja lebi terrang ban paham kaula sami kodu ajar kalaben on-laon ban orot. Allah nyata'agi kabendherranna salanjenga, saneka jugan pangajaran lebat ketab socce paneka. Manabi kaula sami ajar kalaban sabar, kaula sami bdhi nemmo'agi sadajana. Ponapa panjenengan terro ngaonengen kabendherrana Allah? Manabi enggi, nabi Sulaiman notoragi: "Sare jareya pakantha se nyare emmas,

serser pakantha se nyerser arta se tabendhem. Kalaban cara se kantha jareya ba'na bakal taowa apa artena tako' ka Allah ban ba'na bakal olleya pangataowan parkara Allah." (ams 2:4-5)

Mangken nyara aramongagi pangajaran kaula e pasal 3 kitab kadaddiyen. Dhabuna Allah:" Bi' Allah Adam ban Hawa ebadhiyagi rasogan dhari kole'na keban, pas eagemmagi ka se kadhuwa jareya." Ponapa panjenengan engga' apa se egabay Adam saampona ngakan buwana bungkana pangataowan parkara se becce' ban se juba'? :Adam ban Hawa laju padha ngala' dhaunna ara, ebung-sambung epanotobi badanna.

Dadi kaangguy notobi rasa malo ban sala karena dusana, bi' Allah ebadhiyagi rasogan dhari kole'na keban. Kaangguy abadhi rasogan paneka Allah kodu mate'e keban, ekala' kole'na ban ebadhi rasogan. Kaula sami kodu ngarte je' bhakto Allah mate'e keban, Allah mabedhi pangorbanan keban se petama kaangguy notobi badanna Adam ban Hawa se abengkang. Bakto geneka keban ban manossa odhi' areng sareng akadi tretan. Kaula bisa bajangagi sake'na perasa'ana Adam ban Hawa naleka nangale dhara agili dhari keban se epate'e Allah. Keban geneka ta' andhi' hubungan pa-apa kalaban kasala'ana Adam, nangeng kodu mate kaangguy notobi kabengkangannepon Adam ban Hawa. Allah terro sopaja Adam ban Hawa engga' je' okomana dusa paneka mate ban ngaonengen je' dusa kasala'an esapora'a kalaban dhara se ngalocor.

Samangken sadajana gi' ta' bisa eterangagiya, kajaba mator je' dusa kasala'an bisa esapora kalaban dhara se ngalocor dhari se ta' sala. Se kodu ekaonengen gepaneka carana Adam ban Hawa notobi badana kalaban daun ara, tak cokop. Paneka ta' bisa etarema Allah.

Akadi usahana Adam notobi badana ngaangguy daun ara, sapaneka jugan manossa tansa terro top-notobi kasala'ana kalaban nglakone se becce' ban amal se benya'; nangeng para tretan paneka benne carana Allah. Dusana manosa se talebat rajana jareya ta' ekenneng paelang bi' nglakone se becce' ban amal. Paneka ta' cokop. Allah paneka Maha Raja, Maha Socce, Maha Adil. Dadi Allah noduwagi de'ka Adam ban Hawa setong carase bisa etarema Allah gepaneka dhara kurban se ngalocor.

Saampona mate'e keban ban abadhi rasogan kaangguy Adam ban Hawa, Allah ngojuk kadhuwana dhari kebun Eden. Saellana manossa jareya eojuk, e temoranna bun-kebbunan jareya, e jalan se elebadi mon maso'a ka bun-kebbunan Eden jareya, bi' Allah esaba'i rub-kerub se akalembang, sarta epasange

peddhang se rabbang se apoter kaangguy ajaga jalan se noju ka bungkana kaodhi'an rowa. Maske keban ampon ekurbanagi kaangguy notobi dusana Adam ban Hawa manossa gi' kodu nagging akibad dari dusana geneka. Manosa ta' bisa pole ngaole kasenangan ban kataremteman se esediyaagi bi' Allah. kaula oning je' karena pambaronta'anna lucifer (gepaneka setan) eojuk Allah dari sowarga. Sapaneka jugan manossa karena pamberonta'ana manossa eojuk dari Eden.

Sobad pamereng nyara mekeragi parkara paneka: pertama, Allah paneka Maha Raja. Allah ta' bisa narema dusa, sadaja dusa kasala'an kodu narema okoman. Se kadhuwa' Allah paneka posa' kalaban balesase. Saongguna Adam ban Hawa ta' pantes narema paneserranepon Allah. Pantesa namong narema okoman, namong Allah ta' tega manabi manossa mate edhalem kasala'anepon. Paneka sababba Allah ajanjiagi sa oreng pambebas agung, se bakal nyalametagi manossa dhari kajahadanna setan ban ngalle manosa dhari petteng tomoju de'ka tera' ban kamolja'ana Allah.

Ja' kantos tatepo, paneserrana Allah ta' alaban sareng kabendherrannepon. Dhu sifata Allah paneka ajalan arengsareng. Dhalem pangajaran saterosepon, kaula same bakal ngaonengin lebi jelas baramma Allah noduwagi paneserranepon de'ka kaula sami se ta' alaban sareng kabendherrannepon.

Pamereng sadajana, paneka jalan kasalameddan. Kaula same ampon arembag janjiepon Allah se ajib se eparengagi e bhakto Adam ban Hawa nyempang dhari jalana Allah. Kaula ngarep panjenengan merengagi siaran paneka kantos panjenengan paham de'ka janjiepon Allah marengagi Pembebas Agung se ampon eotos dadi juru salamet panjenengan dhari okomana Allah.

Para tretan. Mator sakalangkong ampon merengngagi siaran kaula. Manabi panjenengan kagungan pertanyaan bab ponapa'a se ampon eperengagi, toles pesan dha'ka pangajaran sajate. Kalaban nomer WA 081-333-777-386. Mator sakalangkong.

Pangajaran sejate

Pangajaran 10

Kabil ban Habil

(bagian pertama : cara ngatorragi kurban)

Dhalem pangajaran sabeluna ecareta'agi saampona Adam ban Hawa aberonta', Allah arencanaagi ngotos sa oreng pambebas Agung se bakal mabebas manossa dhari kobasaepone setan ban naraka. Kaula jugan oning ja' usahana Adam ban Hawa notobi badanna ngaangguy dhaunna ara, etola' bi' Allah. Allah terro sopaja manossa oning je' e ade'na Allah Sang Hakim Agung sobung se bisa etob-totobi. Namong Allah bisaos se bisa masalamet manossa dhari okoman.

Ban cara se etoduagi Allah gepaneka kalaban mate'e keban, ekala' kole'na ban epadadi rasogana Adam ban Hawa. Kalaban mate'e keban geneka Allah alampa'agi kurban dhara se pertama. Kurban dhara paneka se notobi rasa sala ban todhusepon Adam ban Hawa. Kaula jugan ampon mereng je' saampona paneka badha dhu garis toronana manossa e bume gepaneka golongan se parcaja de'ka dhabuna Allah, ban golongan se ta' parcaja.

E are paneka kaula bakal ajara ketab kedaddiyan pasal 4, se nyareta'agi potrana Adam ban Hawa gepaneka Kabil se ta' parcaja de'ka Allah ban Habil se parcaja de'ka Allah. E dhalem pasal 4 paneka etoles :” Saellana jareya Adam apolong tedhung ban Hawa, rajina. Babine' jareya pas bubut, sarta babar lalake', pas adhabu, "Kalaban partolonganna Allah sengko' andhi' ana' lalake'." Daddi kana' jareya enyamae Kabil. Saellana jareya Hawa pas babar lalake' pole, enyamae Habil. Habil daddi oreng ngowan dumba, tape Kabil daddi oreng tane.

Karana ampon aberonta' de'ka Allah Adam ban Hawa e oser dheri Eden. Akadi bengatowana na'-ana'na Adam ban Hawa tamaso' aberonta' keya. Akadi panyake' se nolar, peleana Adam ban Hawa se aberonta' de'ka Allah nolar de'ka na'-ana'na . Kabil ban Habil noro' bunte' Adam. Ketab socce adhabu:”Adam ngaandi' putra se padha kalaban dibi'na”

Na'-ana'na Adam ban Hawa atamba raja ban penter. Kabil atamba penter atane. Habil dadi oreng ngowan. Se kadhuwa' oneng je' Allah paneka bada. Panjenenganepone socce ban ta' bisa narema sadajana kasala'an. Se kadhuwa' oneng jugan carana nyema'en Allah gepaneka kalaban ngatorragi kurban dhara, akadi se ampon eajaragi Allah.

E setong are Kabil ban Habil motosagi nyemba de'ka Allah ban ngatoragi kurban. Kitab soce notoragi: "Ta' abit saellana jareya Kabil ngala' sabagiyan dhari hasella tanena, egabay kurban ka Allah. Habil ngatorragi kurban keya, iya areya budhu'na embi' dumbana se sareyang, budhu'na dumba jareya esambelli, bagiyanna se paleng bagus ekagabay kurban ka Allah. Allah kasokan ka Habil ban kurbanna, tape ta' kasokan ka Kabil ban kurbanna. Kabil laju ce' peggella, mowana nyarotheng."

Nyara erenungagi. Badha dhuh oreng se terro abakte ka Allah. Kadhuwana ngatoragi kurban nangeng pera' settong se etarema. Gepaneka kurbanna Habel. Anapa coma' kurbanna Habel se etarema? Apa polana Allah ta' seneng wa'-buwa'an ban ngan-ganganan? Bunten, benne neka sebabba. Anangeng sapaneka, Habel ngatorragi pa-apa se epenta kaangguy saporana sa-dusana Habel, nanging Kabil ngatorragi kurban se laen. Se epenta Allah menangka syarat panebusan dusa gepaneka dhara se ngalocor dhari keban se ta' sala. Namong dhara se bisa eangguy ganteya dusa se ampon elakonen.

Habel parcaja de'ka Allah ban ngatorragi kurban akadiya se eparenta'agi Allah. Sapaneka se etotoragi kitab socce:" Polana gadhuwan iman, Habil ngatorragi ka Allah kurban se lebbi sae dhari kurbanna Kain." Polana imanna, Habil etarema sareng Allah menangka oreng se sae, sabab nyata Allah narema tor-atorra. Habil paham de'ka maksoda Allah, ban parcaja ka Salerana.

Napa se emaksud parcaja ka Allah? Parcaja ka Allah artosepon yakin de' ka Allah, saengga ajalanagi sadaja bu-dhabuna. Parcaja ka Allah artosepon narema kalaban gu-onggu je' dhabuna Allah paneka leres. Manabi panjenengan ngoca' "sengko' parcaja ka Allah" nanging ta' parcaja de'ka bu-dhabuepon se etoles e dhalem kitab socce, kaparcajaan panjenengan mangmang. Manabi kaula parcaja, paste nglakone bu-dhabuna, manabi ta' parcaja artosepon panjenengan nola' dhabuna tor jugan nola' Allah.

Kurbana Habel etarema sareng Allah polana Habel parcaja dhabuna Allah, ban kurbana Kabil e tola' polana kaparcajaanepon coma' lecegan. dhalem tolesana bi-nabi etotoragi je' Allah ampon adhabu; manabi sa oreng nerrak papakona Allah oreng neka ampon nyake'e atena Allah. Pasera'a se nyake'e atena Allah ta' kenging eneng e seddi'na. sadaja ebuang ban dadi mosona Allah. Sopaja bisa esapora kodu akurban dhara se ngalocor, sebab opana dusa geneka pate.

Para tretan, kaula sami ta' bisa nanto'agi syarat otabe carana sopaja sa-dusana kaula esapora, sadajana kodu anot metorot parentana Allah. Dusa kasalaan nyebabagi kapatean, nanging dharana keban bisa epadadi gentena kapateana. Ponapa panjenengan oning napa maksodda? Nalekana kaula nerrak parentana Allah koduna kaula mate, nageng karana tresnana Allah de'ka kaula ce' rajana, Allah ngedinin dharana keban se ta' sala menangka gentena. Paneka carana Allah sopaja manossa narema saporaepon dusa.

E dhalem pangajaran saterosepon, Kaula bakal oninga cem-macem atorana kurban se eparengagi Allah lebat nabi Musa. Atorana kurban ta'padha tagentong kasalaana. Kurban se ta'padha paneka dasarepon: dharana keban bisa dhadi gantena dharana manossa se asal ka Allah. Kalaban sapaneka Allah bisa sabar ka Adam ban toronana, ban sabatara ba'to dhara paneka bisa notopi kasala'ana. Dharana keban ta' bisa masalamet manosa dhari sa-dusana, sabab argana dharana keban ta' padha sareng argana manossa. Paneka sebaba, kurban keban kodu eatoragi ros-terosan saben taon. Sanajjan kurban keban bisa masema' manossa ban Allah, nangeng kurban dhara paneka ta' bisa dadi jalan se masetong Allah ban manossa. Allah ngagungin rencana kaangguy kabecce'anna manossa. Paneka bab se penting parkara kurbanna Kabil ban Habil. Atorana Allah ta' eanggeb bi' kabil. Kabil agabay atoran dibi', aba'na nglakoni ajaran ban agamana se egabay dibi'. Ngatoragi kurban de'ka Allah kalaben atoran ben okorana dibi'. Saengga ta' etarema bi' Allah.

Namong Habil ngatoragi dumba, dharaepon epanompa menangka kurban ka Allah. Habil ngagungin ate se becce' ban murni e adhe'na Allah. Habil noduagi iman kaparcajaan se raja ka Allah. Kurban se eatoragi sami kalaban se emaksud Allah. Para tretan, tadha' oreng se bisa entar ka Allah mon ta' lebat jalan kabendherran se ampon esadhiya'agi Allah. Jalan paneka samporna ben tepa'. Sami kalaban etongan matematika; $2 + 2$ jawabepon paste 4. Sobung jawaban laena. Namong bada setong jawaban se bendher. Sapaneka jugan namong badha setong Allah ban setong jalan se tomoju de'ka Allah.

E dhalem pangajaran se dhateng , kaula badhi ngaonengin lebi dhalem pole jalana Allah se samporna. Rancanana Allah gepaneka nyadiaagi kurban dhara se samanina bisa notopi sadaja dusana manossa. Mandar moga e pangajaran se dhateng kaula bisa ngrampongagiya pangajaran bab Kabil ban Habil.

Para tretan. Mator sakalangkong ampon merengngagi siaran kaula. Manabi panjenengan kagungan pertanyaan bab ponapa'a se ampon eperengagi, toles pesan dha'ka pangajaran sajate. Kalaban nomer WA 081-333-777-386. Mator sakalangkong.

Pangajaran sejate

Pangajaran 11

Kabil Ta' endha' atobat

E pangajaran sabeluna kaula ampon ajar parkara pentinga kurban dhara sopaja oreng se nerrak papakona Allah esapora kasala'ana. Kurban dhara paneka papakona Allah se ta' bisa etabar. Paneka sebabba bhakto Kabil ban Habil ngatoragi kurban, ketab socce nyebutagi: "Allah kasokan ka Habil ban kurbanna, tape ta' kasokan ka Kabil ban kurbanna." Kaula ampon ajar je' Kabil ngatoragi ngan-genganan ban wa'-buwa'an dhari panenanna, ban Habil ngatoragi budhu'na embi' dumbana se sareyang.

Samangken caretana Kabil ban Habil bakal epamare. Apa se kadaddiyen saampona kurbana Kabil ta' etarema sareng Allah? Ketab kadaddiyen 4 notoragi:" Kain laju ce' peggella, mowana nyarotheng."

Daddi Allah adhabu ka Kain, "Arapa ba'na me' peggel? Arapa ba'na me' theng-nyarotheng Mon ba'na alako becce', tanto ba'na mesem; tape mon ba'na atengka juba', atena ba'na esemma'e dusa. Dusa jareya ngobasa'ana ba'na, tape ba'na kodu makala gudha'anna." Ponapa se elakoni panjenengan manabi badha oreng se lebi sepo maenga' panjenengan polana panjenengan sala? Babala'anna etarema Ponapa mala peggel ban nyarotheng akadi Kabil? teptep nglakone se sala Ponapa bakal aoba?

Allah maenga' Kabil kalaban cara nola' kurbanna. Allah poron sopaja Kabil atobat dhari sala ban dusana. Allah terro pareng oning dhe'ka Kabil je' se bisa kaangguy notobi ban nyapora dusa reya pera' kurban dhara. Karana kurban dhara paneka menangka tandha Kabil atobat kalaban gu-onggu ka Allah, parcaja de'ka Allah ban papakona. Paneka se ekarsa'agi Allah, gepaneka Kabil nglakone pa-apa se edhabuwagi Salerana, benne nglakone karepa dibi'. Sebab manabi Kabil ta' narema ban ngatoragi kurban akadi se ekarsa'agi Allah, dibi'na bakal mate e dhalem kasala'ana.

Allah maenga' Kabil; je' badha bahaya se ngancam jibana. Mon Kabil atengka juba', dusa bakal ngobasa'ana kaodhi'ana. Napa dusa paneka? Anapa dusa paneka bahaya ban Allah notoragi, je' kabil kodu makala gudha'anna? Para tretan, dusa artosepon ta' parcaja ban aberonta' ka Allah. Ta' setuju bi' dhabu ban papakona Allah. Banyu' oreng se nganggeb dusa paneka lalakon. Nangeng Allah nangale'e kantos e dhalem ate, saengga ngaonengin manossa paneka ta'at kalaban gu-onggu ponapa bunten. Ban e bakto kaula ta' seneng ka Allah bi' Allah eanggeb nerrak papakona. Para tretan dusa paneka parkara se serius. e ajunana Allah dusa kaula etangale kalaban jelas. Paneka se etoragi ketab socce: "sadjana

bakal epatompessa kabbi, ban etondhung dhari Allah ban kamolja'anepon." Nanging Kabil gi' ekaneserre Allah, Allah terro Kabil atobat dari sa-dusana ban abali ka Allah, lebat jalan se ampon esadiyaagi, saengga lopot dhari duka ban okomana Allah.

Kurbanna Kabil namong co-ngoco Allah. Kaparcajaanepon namong e bibir malolo, saongguna kabil jau dari Allah. Nanging Habil bunten, kurban Habil noduagi je' dibi'na romasa dadi manossa se dusa, ban kodu atobat ka Allah. Namong kurban dhara dumba se ta' salah se bisa notobi sadajana dusa kasala'ana. E ka'ento bisa etangale je' Allah tansa pareng kasempaden de'ka oreng se dusa atobat ban abali dhari jalana se sala tomoju jalana Allah. Odhi' e jalan se bendher asareng Allah. Nyara ngoladi apa se elakone Kabil saampona epaenga' Allah. Kitab socce notoragi:" Kain pas ngoca' ka Habil, "Mara ja' antara ka teggal." Sanapa'na ka jadhiya, Habil epokol bi' Kain, terros epate'e. Paneka ane! Kabil se ta'poron ngatoragi kurban dharana keban, samangken mala nompa'agi dharana ale'na . dibi'na ta' atobat. Sapa se ngajari Kabil mateyana oreng? Sapa se e kedingagi? Jawabepon tanto setan. Kitab socce atotoran Kabil mate'e ale'na karena dibi'na andhi'na si jahat. Enga' Allah ampon nyata'agi je' e bume neka bakal badha oreng se bece' ban badha se jahat. Gepaneka andhi'na setan ban kagungngana Allah. Kabil andhi'na setan ban Habil kagungngana Allah.

Saampona paneka Allah atanya de'ka Kabil:" "Kemma Habil, ale'na ba'na?" Saodda Kabil, "Ta' oneng. Masa' abdidalem ajaga'a ale'?" Allah adhabu, "Arapa ba'na me' ngalakone barang se nako'e jareya? Dharana ale'na ba'na aera' ka Sengko' dhari dhalem tana, akantha sowara se acerreng menta babales. Daddi sateya bi' Sengko' ba'na ebastowa, tabuwang jau dhari tana se anganga ngesep dharana ale'na ba'na se epate'e bi' tanangnga ba'na jareya. Mon ba'na agarap tana, ba'na ta' kera olle hasel pa-apa dhari tana jareya; ba'na bakal le-ngalleya san-kassannagi, akantha buronan se ta' andhi' kennengngan e bume."

Ce' berra'na okomana Kabil nanggung dusana. Allah pareng paokoman benne sopaca Kabil ancor, anangingsopaja dibi'na atobat dhari sa-dusana, parcaja ka Allah ban narema kasalameddan. Nangeng rasana Kabil ta' poron atobat, dibi'na ros-terosan notop atena, la-mala majau dari Allah. Kitab socce notoragi: "Kabil laju ondur dhari ajunanna Allah, pas enneng e tana Nod, e temoranna Eden." Para tretan benne Allah se majau dhari Kabil nangeng Kabil se majau dhari Allah.

Samangken banya' oreng se atengka akadiya Kabil. Ta' parduli kalaban jalan kasalameddan se esadiyaagi Allah, nangeng mala notobi atena ban ros-terosan ajalan e jalan kasesadan. E colo'na ngoca' Allah Akbar,

nangeng e dhalem ate nganggeb Allah paneka jau, ta' kera bisa esema'en. Nangeng ketab socce abenta laen:" Allah paneka sema' de'ka kaula, sebab salerana se apareng nyaba ban sadajana de'ka kaula. Allah lebi sema' dari jantung kaula. Nabi Isa adhabu:" bannya'na obu' e cethagga ba'na la ebitong kabbi." Panjenengana sema' ban ce'kenala bi' kaula sami. Sapaneka jugan Allah terro kaula sema' de'ka Salerana.

Anapa namong sakone' manossa se sema' de'ka Allah, paneka atora ketab socce:" Terrang jareya la rabu ka dunnya, tape manossa asennengngan ka petteng etembang ka terrang, sabab lalakonna reng-oreng jareya juba'. Sadajana oreng se lalakonna jube' beji' ka terrang, ban ta' poron entar ka terrang polana tako' kalakoana se jube' etangale.

Artosepon banyak oreng se ta' kenal de'ka Allah sebab nyengkor Allah ban dhabuna. Nabi Daud noles: "Dhabuwepon Junandalem daddi damar se nera'e tengka' abdidalem, cajana nera'e jalan abdidalem." Manabi panjenengan nyengkor dhabuna Allah, panjenengan bakal odhi' e dhalem pepeteng ban dusa sarta ta' kerra bisa kenal Allah. Allah bakal tangale jau , padahal sema'. Allah terro andhi' hubungan se akrab ban panjenengan. Nanging tantoepon kodu emolain kalaban atobat de'ka Allah. Allah akarsa sopaja sadajana manossa gelem atobat ka Allah. Parcaja de'ka sadaja bu-dhabuna ban ondur dhari kaodhianepon se jahat ban abali ka Allah.

Oreng se otobat kalaban gu-onggu bisa e gambaragi saka'dinto : e bakto ajalan ka bara', oreng reya abalig ka temor. e dhalem atobat badha dhuwe' se kodu elakone gepaneka: se pertama. Ondur dari jalan se sala, dhuwe' abali otaba nyema' ka Allah ban bu-dhabuna, kalaban noro' dhabuna Allah kaula sami bakal oneng carana sopaja etarema bi' Allah. Nanging eman Kabil pagun mele jalan se sala ban ta' poron atobat ka Allah. Ketab socce notoragi sapaneka: "Kabil mate e dhalem jalan se sesat , saengga Allah nyera'agiya dhe'ka pepetteng samanina."

Para tretan, kaodhi'an kaula sami ja' kantos akadi Kabil. Ja' kantos kalopaen ja' sadaja lalakon se sae se elakoni kaula sami e dhalem kaodi'an sare-arena gi' ta' cokob kaangguy nebus sadajana dusa kaula. Akadiya Kabil, banya' oreng se nyangka dhibi'na bisa salamet dhari okomana Allah karena ampon alako bece' ban norodi sadaja papakon agamana.

Ta'at ka sadaja atoran agama gi' ta' tanto bendher e ajunana Allah. Sebab para nabi ampon noles:" kaula sadaja padha najjis, la'-mala' lalakon abdidalem sadaja se sae gi' cemmer sareng kotor e ajunana Allah."

Se bisa masalamet kaula sami ban leres e ajunanepo Allah namong parcaja ban noro' jalan kasalameddan se ampon e teptepagi Allah.

Para tretan. Mator sakalangkong ampon merengngagi siaran kaula. Manabi panjenengan kagungan pertanyaan bab ponapa'a se ampon eperengagi, toles pesan dha'ka pangajaran sajate. Kalaban nomer WA 081-333-777-386. Mator sakalangkong.

Pangajaran sejate

Pangajaran 12

Nabi Idris

Dhalem dhu pangajaran sejate se dhibudhi, kaula ampon ajar caretana Kabil ban Habil, kaula ampon ajar bagiyan ketab socce se nyareta'agia. E ka'dhissa' etotoragi se kadhuwe' geneka oneng ka Allah, nanging namong Habil se parcaja ban ta'at ka Allah. Geneka tabukti e saat dibi'na ngatoragi kurban dhara ka Allah. Kurvana Habil etarema sareng Allah nanging kurvana Kabil ta' etarema Allah.

Kurban Kabil se agambaragi usahana manossa nyema'en Allah kalaban usaha ban carana dhibi' ta' ekasokane Allah. Padha bi' manossa se ausaha ngaole saporana dusa lebat amal ban kalakoan se sae, paneka ta' cokop. Namong kurban dhara se bisa madateng saporana dusa. Paneka se dhadi papakona Allah. Sanajjan Kabil ta' ta'at ka Allah, Allah teptep taresna ka dhibi'na. Kabil epaemot sopaja atobat ban abali ka Allah. Nanging Kabil ta' poron atobat, dibi'na mala mate'e Habil, ale'na. kantos mate Kabil ta' perna atobat dhari kaodhiana se sesat. Ketab socce notoragi Kabil mate e dhalem jalan se sesat.

E are paneka kaula bakal ajara pasal 4 ban 5 dhari ketab kadaddiyan. E dhalem ketab socce etotoragi je' Adam ban Hawa kagungan ana' lalake' ban babine', keng ta' esebutagi jumlaepon. Se banya' ecareta'agi namong toronana Kabil ban Seth, ale'na se lahir saampona Habil epate'e Kabil.

Mangken kaula bakal arembaga toronana Kabil kadhe'. Akadiya sape se ta' mungkin alahiragi mano', sapaneka jugan toronana Kabil, sadajana padha bi' bangatowana. Toronana Kabil ta' ta'at ka Allah jugan. Tengkana ta' anot metorot karsaepon Allah. Saongguna torona Kabil neka tamasok reng-oreng se penter, ananging kaodhianepon jau dhari Allah. Toronana Kabil paneka penter abangun ta-kota, agabay parlengkaban dhari besse ban dimbaga, penter amaen soling ban calempong. Nangeng eman sadaja namong argai rang-barang duniyawi, kapenteran se saka'dhinto nyebabagi oreng ta' bisa andhi' ate se pasra ka Allah. Malah bede toronana Kabil se anyama Lamech dhadi tokang mate'e oreng. Ban abha'na angga' karena romasa lebi jahat dhari Kabil. Dibi'na oreng se angko ban sombong atengka karepa dibi', seneng pese, ban kasenengana dunya. Lamech noro'bunte' jalanna Kabil se sesat. Dibi'na ampon dadi dunora setan.

Mangken kaula ajara toronana Set. Ketab socce notoragi:" Adam ban Hawa kaagungan Pottra lalake' pole. Ca'na se bine', "Allah apareng ana' lalake' pole ka sengko', gantena Habil se epate'e Kabil." Daddi kana' jareya enyamae Set. Set artosepon epele. Allah mele Set menangka gantena Habil. Anapa Set kodu

gantena Habil? Paneka sebaba. Karana Allah ampon ajanji apareng saoreng pembebas agung se bhakal maancor cethaga setan ban mabebas toronana Adam dhari kobesaepun setan. Pambebas Agung geneka kodhuna toronana Habil se parcaja ka Allah. Nanging setan ahasela agudha Kabil sopaja mate'e Habil, ale'na. kalaban saneka setan ausaha ngalange Allah ngeremagi pambebas agung ka dunya. Tanto Allah lebi bicaksana katembang setan. Salerana apareng Set de'ka Adam ban Hawa, menangka gentena Habil, saengga rencanana Allah teptep kalakon.

Maske Set elahiragi de'ka alam dunya se ampon rosa' ban aberonta' ka Allah, Set ta' kagudha, dibi'na gu-onggu parcaja de'ka Allah. Akadiya Habil kaka'na, Set mele jalan kasaeyan. Dibi'na ta'at dhe'ka papakona Allah, ngatoragi kurban dhara ka Allah kaanggu saporana sa-dusana. Set ngajaragi pa-ponapa se bece' se edhabuwagi Allah ka na'-kana'na. ketab socce notoragi:" Set andhi' ana' lalake' se enyamae Enos. E bakto jareya oreng molae nyebbut asmana Allah menangka baktena oreng ka Salerana."

Dhu toronan neka, gepaneka toronana Kabil ban Seth, mojudagi gambaren dhari dhu golongan manossa se bhada e dunya neka molae jaman Adam kantos samangken. Allah ta' ngabas Berna kole', suku, otabe lake'-bine'. E ajunana se badha namong reng-oreng se parcaja ban se ta' parcaja de'ka dhabu sarta papakona. Reng-oreng se parcaja ban nglakone sadaja dhabu sarta papakona Allah ngaole saporana dusa. Nangeng se ta' parcaja ban ta' nglakone sadaja dhabu ban papakona Allah ta' ngaole saporana dusa. Sadaja se parcaja ban mele jalan se e teptepagi Allah bekal salamet ban maso' ka sowarga.

Saterosepon kaula bakal nengale careta dhalem ketab kadaddiyan pasal 5, gepaneka toronana Set se anyama Idris. Idris paneka toronan se kapeng 7 dhari Adam. Sanajjan e lahiragi e dhalem dunya se ampon rosa' ban aberonta' ka Allah, Idris atobat dhari sa-dusana, abali ka Allah ban parcaja ka janjina Allah se bakal apareng pambebas agung. Karana iman kaparcaja'ana paneka, Idris eanggeb oreng bendher, atena epasocce ban dusana esapora bi' Allah. Idris atobat e bakto omor 65 taon, ketab socce notoragi:"Idris odhi' bendher e ajunana Allah 300 tahun abitepon."

E jaman paneka Odhi' bendher e ajunana Allah benne parkara gempang. Sebab akadiya jaman mangken, reng-oreng e jaman nabi Idris lebi seneng nyare kasennengngan dunya ban odhi' e dhalem kabejjatan. Reng-oreng se akadi nabi Idris , se seneng de'ka odhi' se leres anot metorot karsaepun Allah ekabeji'l e ena ga-tatangana se ta' kenal ka Allah. Namong nabi Idris teptep koko e dhalam iman kaparcaja'anepon ka Allah. Mela dhari paneka Allah mele nabi Idris menangka nabi epon e dhalem jaman se jahat paneka. Akadi bi-nabi saampona nabi Idris, nabi Idris notoragi janjiepon Allah se bakal madeteng pambebas agung ka dunya. Nabi Idris notoragiya keya je' pambebas agung geneka bakal dhatenga pole kaanggu

ngokom pasera'a bisaos se ta' parcaja ka Allah. Paneka oca'na nabi Idris:"Abesagi Allah se soce dhateng asareng para malaekadda se abun-ebun bakal ngadili sadajana oreng." Allah bakal ngokoma reng-oreng se ta'taat, jahat ban aberonta' ka Allah.

365 taon abitepon nabi Idris odhi' ban ta'at ka Allah. Manossa e jaman paneka omora jang-lanjang. Maske sapaneka sadajana manossa paste mate. Para tretan badha bab se ajib e dahalam kaodhi'anepon nabi Idris. Salerana ta' perna mate. Kitab socce notoragi:" Saellana jareya Idris gi' odhi' esto ka Allah tello ratos taon aggi', Sarrena salanjangnga odhi' esto ka Allah, Idris laju elang epondhut bi' Allah." Allah se Maha Kobasa ampon ngangka' nabi Idris ka sowarga, ta' nglebadi kapatean. Paneka esebutagi dhalem kitab socce:" Karana Iman Idris eangka' dhari kaodhi'an neka, sopaja ta' ngalamen kapatean, Idris ta' etemo karena epondhut bi' Allah. Nabi Idris salanjangnga odhi' esto ka Allah. Pasera'a bisaos se dhateng ka Allah, kodu parcaja je' Allah paneka badha ban apareng berkad de'ka sadajan manossa se gu-onggu nyare Allah.

Nabi Idris bisa ajaga imanepon e dhalem dunya se rosak ban ta'taat ka Allah. Tello ratos taon abitepon nabi Idris odhi' esto ka Allah, dibi'na parcaja, taresna, ban ta'at ka Allah. Badha pangajaran penting se bisa ekala' dhari parkara geneka, gepaneka: manabi kaula ta'andhi' iman akadiya nabi Idris, kaula ta' kera bisa maseneng ban dadi kasokana Allah. Nanging manabi kaula andhi' iman akadiya nabi Idris kaula tamasok oreng bendher e ajunana Allah ban ta' parlo tako' ka pate. Panjenengan bisa ngaonengin je' Allah ampon ngala'agi kapatean kaangguy panjenengan. Manabi ngedingagi ban parcaja de'ka bu-dhabuna Allah, e bakto panjenengan seda panjenengan bakal odhi' sareng ajunanNa, akadiya nabi Idris. Dadi sobung cara laen kajabana ngarte ban parcaja de'ka bu-dhabuna Allah parkara jalan kasalameddan se ampon e sadiyaagi Allah kaangguy sadajana manossa.

Kaangguy marengkes pangajaran kaula e are mangken, nyara e bandingagi kaodhi'anepon Lamek sareng Idris. Lamek paneka toronana Kabil, Idris toronana Seth. Maske kadhuwena toronana Adam se kapeng 7 ban odhi' e jaman se padha nangeng kaodhi'anepon ta' padhe. Kaodhianepon akdi seyng ban malem.

Lamek ta' parcaja ka Allah ban bu-dhabuna, nanging Idris parcaja ban taresna ka Allah ban bu-dhabuna. Lamek ajalan asareng setan dhalem kabejjatan, nanging Idris ajalan sareng Allah e dhalem kakodusan. Lamek ta' parduli de'ka jalan kasalameddan se ampon etantoagi sareng Allah, sabaliga Idris ngargai papakona Allah ban ngatoragi kurban dhara ka Allah sopaja dusana etotobi. Lamek nyerser pese, babine', kakanan se nyaman,. Rasogan bagus, ban sadajana kasenengan dunya, sabaliga Idris nyerser

kaodhian se semá' ka Allah se ampon apareng nyaba de'ka dhibi'na. Lamék mate e dhalem dusana ban maso' naraka, nanging Idris odhi' sareng Allah e karaton sowarga.

Siaran paneka badhi etotop kalaban partanya'an kaangguy panjenengan :”kadiponapa kaodhi'an panjenengan? Akadi Lamék otaba Idris? Ponapa kaodhi'an panjenengan nyerser iman akadi Idris, otaba akadi Lamék se nyerser dunya? Sebab Allah angandika: “Kodda' sampeyan nyoba' aba'na dibi' ponapa sampeyan onguwan odhi' adhasar parcaja ka Allah, otaba buntén.” Para tretan. Mator sakalangkong ampon merengngagi siaran kaula. Manabi panjenengan kagungan pertanyaan bab ponapa'a se ampon eperengagi, toles pesan dha'ka pangajaran sajate. Kalaban nomer WA 081-333-777-386. Mator sakalangkong.

Pangajaran sejate

Pangajaran 13

NABBI ENNOH

Kasabbaran ban dukana Allah

Kaula same ampon ajar lebat ketab socce, je' e bakto alam dunya ecepta'agi, sadajana dhalem kabadha'an samporna. Tape ebakto Adam ta' ta'at de'ka Allah, kajahadan masok ka dhalem dunya ban dusa alatlat ka sadajana manossa. Kaula sami ampon ajar badha duwe' kalompo'na oreng se asala dhari torona Adam, gepaneka nakpotona Kabil ban nakpotona Set. Nakpotona Kabil tamaso' kalompo' se ta' parcaja de'ka Allah ban nakpotona Set tamaso' kalompo' se parcaja de'ka Allah ban dhabuna Allah. Sadajana ngatoragi kurban dhara de'ka Allah, saengga Allah nyapora sa-dusana. Sala setong torona Set paneka badha se anyama Idris. Idris paneka oreng se ajalan sareng Allah e dhalem kakodusan, maske e jaman rowa banyak oreng se noro' jalan setan se bejjat.

Are mangken kaula bekal ajera parkara oreng se mele ajalan sareng Allah e jaman se rosa' ban bejjat paneka. Salerana gepaneka nabi Ennoh, toronana nabi Idris. Kaula ampon oning je' dhimen omora manossa bisa kantos atoson taon. Ban oreng se omoro paleng toa asmana Metusalah, salerana seda e bakto yuswa sangang atos sabidak sanga' taon. Metusalah paneka ramana Lamekh, ban Lamekh paneka ramana Ennoh. Lamekh ramana nabi Ennoh paneka banne Lamekh potona Kabil se mate'e oreng dhadhuwa' akadi se ampon e careta'agi. Ennoh paneka toronana Adam se kapeng sapuluh. Potrana Ennoh badha telo', e bhakto salerana yuswana lema ratos taon. Asmana tra-potrana Ennoh gepaneka: Sem, Ham ban Yafet.

Ajar parkara kaodhi'anepon nabi Ennoh sanget penting kaangguay kaula. Amarga kaodhi'anna manossa e jaman Ennoh para' padha'a sareng kaodhi'ana manossa e jaman samangken. Tantiepon benne bab teknologi, ananging panganggebba de'ka bab se rohani ban socce. E jaman Ennoh dunya paneka posa' kalaban dusa. Ketab socce adhabu: *"Manossa e bume reya sajan atamba kajahadanna , ban pekkeranna ros-terrosan juba'."* Atena ban pekerana toronana Adam posa' kalaban kajahadan, dhakka, ma'seyat, sombong, atokar, denggi, petenna, co'-ngeco', ban matenna oreng. Kalaban sadaja kalakoanna paneka saongguna manossa maancor dunya, se ecepta'agi Allah kalaban samporna. Bannya' manossa se ngako ngaandi' agama, ananging pangibadana namong monafik. Manossa namong nyerser Kasenengan dunya, lamala kasenengan dunya paneka e padhadi allahna. Dadi manossa e bume reya sajan apo'-tompot kajahadann ban dusana.

Nyara ngedingagi apa se edhabuwagi ketab socce: *"Allah adhabu, bi' Sengko' manossa reya ta' epadhi'a salanjangnga. Molae dhari sateya omorra manossa reya bi' Sengko' ta' epalebbiya dhari saratos dhu polo taon. Allah ngoladi ja' manossa e bume reya sajan atamba kajahadanna , ban pekkeranna ros-terrosan juba', Salerana laju arassa kasta se adadhi manossa sarta nyabe' manossa jareya e bume. Panggaliyanna ce' kocebana. Sampe' adhabu kantha reya, Sengko' ce' kastana nyepa'agi manossa ban no'-mano; sarta ban-keban laenna reya. Dadi sateya bi' Sengko' epatompessa kabbi."*

Karena kejahadanna manossa ampon makoceba panggaliyanna Allah, Allah motosagi matompessa sadajana manossa. Allah ampon motosagi matompessa manossa kabbi. Namong Allah gi' asabbar kantos 120 taon. 120 taon abitepon Allah apareng kasempadhan manossa e jaman Ennoh sopaja atobat, sopaja ta' masok e dhalem okoman. Namong manabi bates se ampon e tantowagi neka dhepa', Allah kodhu ahakimi sadajana oreng se ta' poron atobat.

Manabi kaula sami arenungagi kapotosanepon Allah se apareng bakto 120 taon kaangguy manossa atobat deri sa-dusana, kaula sami bisa ngaoningin je' Allah paneka lanjang sabar. Nanging kasabarana Allah badha batesa. Allah bakal angandika ban aehteyar sopaja manossa poron atobat, nanging ta' samanina Allah bisa sabbar. Paneka sababba Allah angandika :*" bi' Sengko' manossa reya ta' epaodhi'a salanjangnga. Molae dhari sateya omorra manosa reya bi' Sengko' ta' epalebbiya dhari saratos dhu polo taon."* Daddi Allah ampon nantoagi bates kasabaranepon. Saampona paneka Allah bakal ahakimi sadajana oreng se ta' poron atobat. E ka' dhinto' kaula sami bisa ngaonengin sifata Allah gepaneka : kasabbaran sareng dukana Allah. Allah paneka ce' bagus ban ce' sabara, nanging jugan adil ban bisa ce' dukana.

Dhari ketab socce kaula sami bisa ngaoningin fat-sifata Allah se saongguna. Allah paneka bagus ban bendher. Allah paneka sabar nanging bisa duka. Karena taresnana dhe'ka manossa Allah paneka sabar . nanging kabendheran sareng kasocceanepon nyebbabi Salerana duka de'ka pasera'a se nyempang dhari kasokanna Allah. Allah paneka juru salamet ban hakim. Bi-nabi li-baliyan noles bab kasabaran ban dukana Allah. Ngereng kedingngagi pa-ponapa se e atoragi bi-nabi.

Badha tolesan:*"Pangadilanna Allah tak kera epanyorot. Maske katonna gi' abit, tape nante' bai sa'at jareya masthe napa' ban ta' epanyoroda pole. Sadajana kadadiyan sopaja manossa ta' mate ban masok naraka, sabaliga manossa poron atobat ban e passalamet ."* Sa'at Pangadilanna Allah masthe napa' ndhatenga dadagan. E dhalem Jabur etoles:*"Allah reya hakim se adil ongguwana, se ros-terrosan ngokom oreng se dusa ban ta' poron atobat."* Dhalem injil bada tolesan:*"Dhari sowarga Allah noduwagi dukana ka sadajana dusa sareng kejahadanna manossa, sabab kejahadan paneka daddi alanganna manossa kaangguy ngataowe pangajaran se lerres parkara Allah."* Allah ahakimi sadajana ban panghakiman paneka lerres. Ponapa panjenengan aromasa bisa lolos dhari panghakimanna Allah? Otabe kaula ta' parduli sabab Allah paneka sabbar, pangarteyan, ban bagus. Ponapa panjenengan ta' emot je' Allah mimpin panjenengan de'ka partobatan? Manabi kaula sami cengkal ban ta' endha' atobat, artena kaula sami nompo' dukana Allah. Allah bakal ngokom oreng se dusa ban ta' poron atobat.

Manossa e jaman Ennoh tamasok oreng se nompo' dukana Allah. Ananging e antarana reng-oreng se sapanika badha setong oreng se tep-tep taresna de'ka Allah, ban parcaja de'ka bu-dhabuna, gepaneka Ennoh. Ketab socce asakse sapaneka:*"Ennoh ekaneserre bi' Allah. Ennoh ta' tao agabay sala, ban e jaman jereya pera' Ennoh malolo se teppa' tengka gulina. Orengnga alem."*

Anapa Ennoh ekaneserre bi' Allah? Ponapa karena Ennoh paneka oreng se teppa' tangka gulina? buntan. Paneserrana Allah ta' bisa ebelli ngaangguy ponapa'a bisaos. Manabi Ennoh ekaneserre bi' Allah, paneka karena Ennoh parcaja de'ka Allah, tape oreng lain ta' parcaja. Ennoh parcaja de'ka pangandhikana Allah, paneka se kaodu kaula kenga'en. Ennoh parcaja de'ka janjiepon Allah. Sami akadiya sadaja toronana

Adam se laen, Ennoh perna keya nglakone sala, ban nyake'e atena Allah, nangeng karana Ennoh parcaja ban poron atobat, akadi se edhabuwagi Allah, Ennoh ekaneserre bi' Allah. Paneka sababba e dhalem ketab socce etoles je' Ennoh ta' tao agabay sala, ban e jaman jereya pera' Ennoh malolo se teppa' tengka gulina.

E Setong are Allah adhabu de'ka Ennoh: "Sengko' la motossagi mamosna'a manossa reya kabbi. Sabab bume reya possa' bi' kakejjemmanna manossa jareya." Bi' sengko' epatompessa kabbi. Kassa' ba'na agabay parao dhari kaju se bagus, pobuwi keng-pangkeng; bagiyan lowar ban bagiyan dhalemma kole'e ban pakal." Allah apareng oning de'ka Ennoh je' Allah bakal madhatengnga banjir ka bume sopaja sadajana se ta' parcaja ben atobat ka Allah padha'a mate kabbi. Allah parenta de'ka Ennoh agabay parao se raja. Lanjangnga saratos tello polo tello meter, lebarra dhu lekor meter, ban tenggina tello bellas meter. Parao paneka bekal dhadi parlindunganna Ennoh ban la-balana, ban-keban, sarta sadaja se badha e dhalema nalekana banjir raja dhateng. Allah parenta de'ka Ennoh sopaja parao neka eparingi kamar se banya' nanging labanga namog setong. Dhadi pasera'a bisaos se tero salamet dhari banjir raja paneka labanga pera' setong, paneka pesena Allah de'ka manossa e jaman Ennoh. Pasera'a se poron lebat labang paneka bakal salamet, nanging pasera'a se ta' lebat labeng paneka, bekal mate'a.

Ennoh alampa'agi sakabbinna papakona Allah jerea. Paneka tugas berra' ban raja. Molai dheri moger kajuwan se ja-raja, agabay rangka, pobuwi keng-pangkeng; bagiyan lowar ban bagiyan dhalemma kole'e ban pakal ban saterosepon. Tantoepon rajina sarta tra-potrana Ennoh abanto keya. Saratos dhu polo taon abidda Ennoh abangun parao. E dhalem Saratos dhu polo taon paneka Ennoh ta' pera' abangun parao nangeng aehteyar notorragi sakabbinna se edhabuwagi Allah de'ka sadajana manossa se odhi' e jaman neka. Ra-kera spaneka oca'na Ennoh: "Mara padha edhingngagi! Allah adhabu ka sengko' sopaja maenga' ka ba'na je' Salerana la duka! Dukana Allah ampon ngalkal karana sa-dusana be'na. Salerana la motossagi bakal madhateng banjir raja ka bume kaangguy mate'e saniyab oreng se ta' poron atobat de'ka Salerana. Nangeng sengko' nggiba berta se bagus kaangguy ba'na. Allah parenta de'ka sengko' sopaja agabay parao se bakal dhadi parlindungan de'ka pasera'a se atobat ka Allah. Pasera'a bisaos se maso' de'ka parao bakal salamet dhari pate." Ros-terosan Ennoh aehteyar maenga' dhe'ka sadajana sopaja abali ka Allah. Saratos dhu polo taon abida Ennoh agabay parao sapaneka jugan abitepon Ennoh aehteyar sopaja sadajana poron atobat.

Ra-kera kadiponapa anggebna reng-oreng se ngeding babala'anna Ennoh neka? Ponapa sadaja parcaja je' Allah bakal madhateng banjir raja ka bume kaangguy mate'e saniyab oreng se ta' poron atobat de'ka Salerana? Kaula bakal anerusagia careta paneka e dhalem siaran se dhateng.

Para tretan, mator sakalangkong ampon merengagi siaran kaula. Manabi panjenengan kagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 14

NABBI ENNOH

NABI ENNOH BAN BANJIR RAJA

Siaran se tapongkor ampon nyaretaagiya kadiponapa bejjat ban jahata kaodianepon manossa e jaman nabi Ennoh. Nangeng nabi Ennoh ta'at ka Allah. Kaodhi'anepon nabi Ennoh tansa anot metorot karsaepon Allah. Nabi Ennoh bisa arasa'agi kasossa'ana Allah polana kajahadana manossa. Kitab socce notoragi:" Allah ngoladi ja' manossa e bume reya sajan atamba kajahadanna, ban pekkeranna ros-terrosan juba'." Karana kajahadanna manossa atamba raja ban ta' poron atobat, Allah ngagungin rancana matompessa manossa kabbi.

Anangeng Ennoh ekaneserre bi' Allah, paneka sebaba Allah adhabu ka Ennoh:" "Sengko' la motossagi mamosna'a manossa reya kabbi. Bi' Sengko' epatompessa epatadha'a karena, sabab bume reya possa' bi' kakejjemmanna manossa jareya. Kassa' ba'na agabay parao dhari kaju se bagus, pobuwi keng-pangkeng; bagiyen lowar ban bagiyen dhalemma kole'e ban pakal. Kaangguy masalmet ba'na ban la-balana be'na."

Parao se egabay Ennoh paneka sanget raja, lebi lanjang dhari lapangan sepakbola. Ban kaangguy abangun parao paneka tanto butoagi bakto se abit. Sanapa bakto se ebutoagi kaangguy agabay parao paneka? Sa taon? Dhu taon? Buntan, lebi dhari 10 taon. 100 taon abitepon Ennoh ban na'-ana'na agabay parao paneka. Sambu abangun parao paneka Ennoh ros-terosan maenga' sopaja manossa atobat dhari sa-dusana. Manabi ta' poron atobat paste ekeneng banjir raja dhari Allah. Banjir raja paneka menangka okoman dhari Allah kaangguy manossa dari kajahadanna.

Ra-kera ponapa manossa ngedingagi babala'anna Ennoh? Ponapa sadajana parcaja je' Allah bakal ngokom manossa, saengga manossa atobat? Dhari ebuwan toronana Adam se badha e bume bhakto geneka, ra-kera sanapa oreng se parcaja ka dhabuna Allah lebat babala'anna Ennoh? Ponapa banyak se parcaja laju maso' ka paraona Ennoh sopaja salamat? Nyataepon akadi se etotoragi kitab socce, namong sakone' se maso' ka paraona Ennoh. Namong kaballu' se salamat. Bajangagi dari ebuwan oreng, namong 8 se parcaja, gepaneka: Ennoh ban bine'na, tra-potrana Ennoh; Sem, Ham ban Yafet sarta ne'-bine'na. se laen ta' parcaja ka dhabuna Allah. Badha se ta' parduli, nangeng banyak se agella'an.

Dhalem kitab kadaddiyan pasal enem ayat se terahir esebutagi:" Ennoh alampa'agi sabarang se epakonnagi bi' Allah jareya." Kapal ampon siap. Gi' korang setongagi' se kodu elakone Ennoh ban la-

balana, sadaja kodu maso' ka dhalem parao. E at-saat akher paneka Ennoh gi' nyoba maenga' manossa je' okomana Allah paste kalampa'an:" Kedingagi dhabuna Allah! Mara atobat parcaja ka dhabuna. Banjir para' dhatenga! Maso' ka parao mompong bhakto gi' badha. Labang gi' tabuka', pasera'a bisaos se poron maso' ka parao bakal selamat. Nangeng manabi ta' poron paste ba'na e keneng okomana Allah!

Bisa ewaos e dhalem kitab kadaddiyan pasal 7. Sapaneka caretana, akhera dhepa' baktuna banjir dhateng, Allah makon Ennoh ban la-balana maso' ka dhalem parao. Ponapa parao se raja paneka namong aese oreng kaballu'? buntan, Allah makon Ennoh agabay parao se raja sopaja Ennoh ban la-balana sarta samacemma keban ban no'-mano' se epeyara oreng ban se odhi' e alas, se raja otaba se kene' dhu-sajudhu maso' ka dhalem paraona. E giba keya samacemma mano' ban samacemma keban se halal pettong judhu ebang, dineng keban se haram sajudhu ebang. Sopaja selamat dhari banjir raja paneka.

Laju Allah adhabu ka Ennoh je' Pettong are aggi' ojan epatorona. Daddi bhakto sadajana maso' ka parao ojan gi' ta' toron. Langi' gi' tera', hawana panas. Laju napa se kadadiyan? Saampona Ennoh ban la-balana, jagan samacemma keban ban no'-mano' maso' ka dhalem parao, labangnga parao jareya laju ekanceng dhari lowar bi' Allah.

Kaula bisa nangale'e je' Ennoh paneka oreng se parcaja ka Allah. Kalaban gu-onggu Ennoh parcaja je' Allah paste neptebbi janjina. Gi' korang saminggu nanging Ennoh ampon e soro maso' ka dhalem parao, sadaja ta' bisa kalowar maso' pole, sebab Allah ampon nganceng labanga. Se e lowar ta' bisa maso' ban se e dhalem ta' bisa kalowar.

Anapa sadajana poron maso' saminggu sabeluna ojan toron? Jawabanepon namong setong, sadaja parcaja de'ka dhabuepon Allah. Kaparcajaan paneka se nyebabagi sadajana maso' ka parao sabeluna ondhem ban dha-tandha ojan se dhatenga. Olle daddi oreng se e lowar parao ngoca'" sengko' parcaja keya ka Allah, nangeng sengko' ta' endha' maso' ka parao, karena apa se ekabanta Ennoh reya mohal." Reng-oreng se sapaneka ta' gu-onggu parcaja ka Allah, karena ta' parcaja de'ka apa se eatoragi nabina Allah. Dhibi'na ta' poron atobat dhari sa-dusana ban ta' gelem narema jalan se ampon e sadiyaagi Allah. Gepaneka maso' ka parao se egabay Ennoh. Dhibi'na hormat ban parcaja ka Allah namong kantos colo' bisaos. Atena jau dhari Allah.

Saampona geka, Allah alampa'agi napa se ampon edhabuwagi. Ecareta'agi dhalem kitab socce, Lange' tangale petteng, angen santa' dhateng, Ondhem ban kelap sarta galudhu' ban lendhu. Nangale'e sadajana tantoepon manossa katako'an. E bhakto kabadhaan gi' aman caca ban tengkana

manossa ngena Allah. Nangeng samangken okomana Allah ampon emolae, sadajana katako'an. Ampon dhepa' bhaktona ngadebin okomana Allah ban sobung kenengan se bisa kaanguy ngete'.

Ojan raja molae toron, somberra aeng se badha e dhalem bume reya leddu' kabbi, jalanna aeng e langnge' padha beddhul. Tase' ban songai aloap, bume topo ban banjir. Sadaja buru ka kenengan se tenggi. Sadaja se ngena ban ta' parcja ka babala'anna Ennoh buru sadar je' sadaja se edhabuwagi Allah paneka pajet leres. Nangeng sadajana ampon sobung gunana, karena kasempadan atobat ampon elang. Labanga parao ampon ekanceng. Are panyalamedhan ampon lebat, are panghakiman ampon dhateng. Du'a, tangesan, asero ka Allah, sadaja ampon ta' bisa ngoba potosana Allah. E bhakto labang ampon ekanceng jalan kasalamedhan ampon etotop.

Ketab socce notoragi banjirra terros ta' nyorot sampe' pa' polo are, pa' polo malem; aengnga onggasampe' paraona Ennoh ngambang e atasa aeng. Aeng jareya gi' terros atamba tenggi sampe' pettong meter e attasanna konco'na nong-gunong se paleng tenggi. Mahlok se odhi' e bume padha mate kabbi, epatompes bi' Allah: manossa, keban ban no'-mano' tadha' karena. Se gi' odhi' coma Ennoh ban reng-oreng sarta ban-keban se badha e parao jareya. Aeng jareya paggun ta' endha' nyorot sampe' saratos saeket are abidda. Allah gu-onggu alampa'agi apa se edhabuagi. Allah madhateng banjir kaanguy ngokom manossa se ta' poron atobat. Sadaja se badha e lowara parao tompes kabbi.

Para tretan pamereng, saka'dhinto caretana Ennoh e are mangken. Mandar moga e siaran se dhateng caretana Ennoh bisa e sambung pole. Sabeluna kaula terro maenga' dhe'ka panjenengan je' badha pangajaran se penteng dhari careta banjir raja paneka, gepaneka: Allah ampon nantoagi je' bakal badha are panghakiman se laen, are seka'dhima Allah sakalian agi' Allah bakal ngadili sadaja manossa e bume. Ban are akhir paneka lebi nako'en ebanding panghakiman e jaman Ennoh.

Para tretan, mator sakalangkong ampon merengagi siaran kaula. Manabi panjenengan kagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 15

NABBI ENNOH

NABBI ENNOH BAN KAESTOANA ALLAH

Are paneka kaula bakal nerosagi caretana nabi Ennoh. Nangeng sabeluna nyara ngenga'en pole napa se ampon e perengagi sabeluna. E dhalem ketab kadaddiyan pasal 6 etotoragi bab asal-usula Ennoh. Ennoh paneka toronana Adam se parcaja ban ta'at de'ka bu-dhabu sarta papakona Allah. E jaman nabi Ennoh, dunya posa' kalaban karosagan, manossa e bume reya sajan atamba kajahadanna, ban pekkeranna ros-terrosan juba', kantos Allah motosagi nompessa manossa kalaban banjir se raje. Saratos taon Allah ampon pareng kasempadan ban sabbar anante' manossa apangrasa ka kasala'anna sarta atobat ka Allah. Samangken kasabbaranna Allah ampon sobung. Allah makon Ennoh ban la-balana maso' ka dhalem parao. Allah se ampon mokka' labenga kasalamedan kaanggyu toronana Adam, samangken ampon notop labang paneka. Mangken baktuna ngadebi dukana Allah se nako'en.

Lange' se tera' aoba petteng, kelap, galudhug, ban lendhu pada dhateng. Ojan ros-terosan toron kantos 40 are 40 malem. somberra aeng se badha e dhalem bume reya leddu' kabbi, jalanna aeng e langnge' padha beddhul. Aengnga sajan tenggi, sampe' nong-gunong se paleng tenggi nyellem ta' etangale'e. Aeng jareya gi' terros atamba tenggi sampe' pettong meter e attasanna konco'na nong-gunong. Paraona Ennoh ngambang e atasa aeng. Mahlok se odhi' e bume padha mate kabbi, epatompes bi' Allah: manossa, keban ban no'-mano' tadha' karena. Se gi' odhi' coma Ennoh ban reng-oreng sarta ban-keban se badha e parao jareya. Namong Ennoh ban sadaja se badha e dhalem parao se salamet dhari banjir raja neka. Lebat caretana ketab socce paneka kaula bisa ngoladi je' Allah gu-onggu alampa'agi dhabuna, ngokom bume kalaban banjir raja. Sobat pamereng Allah masthe neptebbana janjiNa.

Saampona banjir neka nyorot, Kadiponapa kabadha'ana Ennoh ban sadaja se badha e dhalem parao? Ponapa Allah lopa ka Ennoh? Tantiepon bunten. Allah ta' kera lopa dhe'ka Ennoh ban sadaja se badha e dhalem parao neka. Ketab socce notoragi:" Allah emot ka Ennoh ban sakabbinna keban se badha e paraona, laju madhateng angen; daddi aeng pas molae nyorot. Somberra aeng e dhalem bume ban jalanna aeng e langnge' etotop kabbi, daddi ojanna se derres laju terrang; E tanggal petto bellas bulan petto' parao jareya kandhas e sala settongnga konco'na pagunongan Ararat."

Para tretan, sataon lebi samenggu, Ennoh ban sadaja se badha e dhalem parao neka ngambang e atasa aeng. Akhera parao paneka kandhas e konco'na gunong se anyama Ararat. Sadajana karena kobasana Allah. Allah adhabu ka Ennoh:" *Mara sateya ba'na ban binena, na'-ana'na ba'na ban*

binena na'-ana'na jareya kalowar dhari paraona. Pakalowar no'-mano' ban kebanna kabbi, me' olle padha adhu'-budhu' mossae bume." Daddi Ennoh laju kalowar dhari paraona, abareng ban rajina, tra-pottrana ban binena tra-pottrana jareya. Bariya keya keban ban no'-mano' padha kalowar dhari parao jareya abareng ban bangsana bang-sebang. Saampona kalowar dhari paraona Ennoh laju abadhi mezba. Saellana jareya laju mondhut no'-mano' sarta ban-keban laenna se halal, eatorragi ka Allah menangka kurban obbaran e attassa mezba jareya.

Kaenga'e, saampona Ennoh kalowar dhari parao, se pertama elakone gepaneka ngatoragi kurban dhara dhari keban se halal. Keban paneka laju e obar. Papakona Allah kodu elaksanaagi. Saporana dusa bisa etarema manabi badha kurban dhara. Maske bume ampon eokom kalaban banjir raja, nangeng mo'-ramo'na dusa gi' ta' mate. Ramo'na dusa e dhalem atena toronana Adam gi' badha. Paneka sebaba Ennoh ban la-balan ngatoragu kurba ka Allah sopaja sa-dusana esapora. Akadi se ampon kaula onengin ja' kurban keban paneka dasar jalan kasalameddan se ampon e teptepagi bi' Allah diri'. Kurban se ba'-lamba'na eatoragi bi' bangatowana kaula sami, mojudagi gambaran otaba parompamaan dari pambebas Agung se bakal dhatenga ban ngala'agi setan ban dusa. Manabi kurban keban kodu eatoragi li-baliyan, kurban se eatoragi pambebas Agun neka cokop namong sakaliyan, kaangguy sanimanina ban kaangguy sadajana oreng. Kurban se eatoragi Ennoh paneka menangka pangajaran kaangguy na'potona je' papakona Allah ta' aoba. Gepaneka: "opana dusa paneka mate" ban "Saporana dusa bisa etarema manabi badha kurban dhara."

Ketab socce notoragi:" Kurbanna Ennoh jareya masenneng panggaliyanna Allah. Allah laju aberkadi Ennoh ban la-balana sarta adhabu: mara ba'na pabannya' na' potona sopaja toronana ba'na mossae ban ngobasane bume. "Sateya Sengko' mabadha'a parjanjiyan ban ba'na sarta ban na' potona ba'na, Sengko' ajanji ja' molae dhari sateya reya mahlok se odhi' e bume reya bi' Sengko' ta' epatompessa bi' banjir akantha se sateya reya pole, ta' bakal badha'a pole banjir se marosaga saantero bume." "Menangka tandhana Tang parjanjiyan se langgeng ban ba'na, ban sakabbinna mahlok se odhi', Sengko' nyaba'a Tang gandhiba e langnge', menangka tandhana Tang parjanjiyan ban dunnya. Mon Sengko' madhateng ondhem se notobi langnge', sarta pas badha andhang se etangale'e e langnge' jareya, Sengko' bakal enga'a ka Tang janji ka ba'na ban ka sakabbinna mahlok se odhi' ja' Sengko' ta' madhatengnga banjir se matompes sakabbinna mahlok se odhi' e bume reya pole."

Dhalem yat-ayat paneka badha setong oca' se li-baliyan edhabuwagi gepaneka: parjanjiyan otaba janji langgeng. Dhalem ketab socce parjanjiyan se langgeng paneka parjanjiyan istimewa antarana Allah ban manossa. Para tretan Allah paneka esto, ban Allah noduwagi kaestoana da' ka toronana Adam. Paneka sebaba Allah mabadha parjanjiyan kalaban Ennoh ban toronanna kalaban dhabu: molae dhari sateya reya mahlok se odhi' e bume reya bi' Sengko' ta' epatompessa bi' banjir akantha

se sateya reya pole, ta' bakal badha'a pole banjir se marosaga saantero bume. Paneka janjipeon Allah. Allah apareng tandhana parjanjiyan paneka kalaban nyaba' gandhibaepon e langnge'.

Ponapa panjenengan oning ja' gandhiba otaba pelangi, se segut etangale saampona ojan paneka menangka kaestowana Allah? Saneyap nangale pelangi, Allah enga' ka janjina, ban kaula sami jugan enga' ja' Allah esto ka janjina se eparengagi ka kaula sami kantos salanjangnga. Pelangi paneka negasagi ja' Allah ampon ajanji ta' bakal badha'a pole banjir se marosaga saantero bume. Gandhiba otaba pelangi paneka tandha ja' Allah paneka Maha Esto.

Caretana Ennoh se lengkap bisa ewaos e dhalem kitab kadaddiyan pasal 9. E ka'dhissa' kaula bisa oneng ja' saampona banjir raja Ennoh gi' odhi' 350 taon agi', e bhakto maso' ka Firdaus asareng Allah Ennoh ampon sepo sanget .

Kaula mungkin bisa marengkes pangajaran ban Ennoh paneka kalaban setong otaba dhuwe' partanyaan. Se pertama, anapa Ennoh ta' padha bi' reng-oreng e jamanna? Apa se elakone Ennoh saengga dhibi'na ekasokane Allah? Se elakone Ennoh namong setong gepaneka: Ennoh ta'at de'ka dhabuna ban papakona Allah. Kedingagi apa se dhabuwagi Allah: "Mon ta' gadhuwan iman, tadha' oreng se bisa masenneng panggaliyanna Allah." Karana iman Ennoh ngestoagi dhabuna Allah agabay parao. Karana iman dhibi'na narema kasalameddan dhari Allah. Ennoh narema sangkolan kabendherranna Allah.

Badha dhu parkara se terro epaenga' da' ka panjenengan. Gepaneka apa se elakone Ennoh saengga bisa masenneng panggaliyana Allah? Pertama, imanna. Ennoh parcaja ban ta'at ka Allah ban budhabuna. Maske reng-oreng se odhi' e jamana aberonta' ka Allah nangeng Ennoh teptep esto ka Allah. Karana imana Allah mabebas Ennoh dari okoman se etarema reng-oreng e jamana. Para pamereng sadaja, ponapa panjenengan parcaja da'ka dhabuna Allah? Allah terro kaula sadaja parcaja ka Salerana akadi Ennoh se parcaja.

Se kaduwe' badha se lebi penteng katembang imana Ennoh. Apa paneka? Kaestowana Allah. Anapa kaestowana Allah lebi penteng katembang imana Ennoh? Sebab manabi Allah ta' esto ka ji-janjina, imana Ennoh ta' bakal ngaselagi pa-apa. Kaula oning oreng se ta' bisa e tegu' janjina namong madeteng koceba. Kaula koceba karana parcaja ka oreng se ta' esto. Nangeng Allah paneka ce'estona. Kitab socce notoragi: "Mon sengko' ban ba'na ta' esto, Salerana paggun esto." Ayat se laen notoragi: "Odhi'na manossa sakejja' akantha rebba, mekkar akantha kembang e teggal; mon eketbat angen laju elang mosna, la'-mala' ta' etemmo lampadda kennengnganna. Tape Allah teptep taresna ka oreng alem, kabecce'anna ta' ambu ron-temoron."

Para tretan saneyap janji se edhabuwagi bakal eteptebbi bi' Allah. Kitab socce atotoran: "Oreng se parcaja ka Salerana ta' kera eokom." E dhalem caretana nabbi Ennoh bisa etangale ja' saneyap janji

se edhabuwagi paste etepteppi bi' Allah. Kaula sadaja ngagungin janjipeon Allah. Kaula ngaonengin jugan ja' Ennoh ngatoragi kurban dharana keban, Allah kasokan da'ka kurban paneka ban nyapora sa-dusana. Kaula ampon ajara ja' Allah nyaba'a gandhibana e langnge' sopaja Ennoh ban sadajana manossa enga' ja' Allah paneka esto.

Para tretan, mator sakalangkong ampon merengagi siaran kaula. Manabi panjenengan kagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 16

MANARA BABIL

Para pamereng, pangajaran bab nabbi Ennoh ampon epamare e dhalem siaran tapongkor. Kaula ampon ajar ja' Allah gu-onggu alaksana'agi sadaja dhabuepon, gepaneka madhateng banjir raja.

100 taon abitepon Allah ampon apareng kasempadan da'ka manossa kaangguy atobat. Anangeng kajaba Ennoh ban la-balana, sobung se parcaja da'ka dhabuepon Allah ban babala'anna nabbi Ennoh sarta atobat dari dusa ban kasala'anepon. Mila dari paneka Allah se Adil ban esto geneka ajalanagi pa-apa se ampon e dhabuwagi. Sadajana se ta' atobat epatompessa kabbi bi' Allah. Nangeng se lebat labeng ban maso' ka dhalem parao epasalamet.

E dhalem pangajaran kaula bab Ennoh, ampon eterangagi ja' Ennoh andhi' potra telo'an gepaneka: Sem, Ham ban Yefet. Kitab socce nerangagi da'ka kaula sami ja' sadajana manossa se odhi' e bume neka toronana se katello geneka. Rakereng reng-oreng Yahudi ban Arab paneka toronana Sem, pandudu' Afrika ban Cina paneka toronana Ham, ban reng-oreng Eropa toronana Yafet.

Dadi sadajana reng e dunya paneka toronana ana'na Ennoh se katello geneka. Panjenengan, kaula.... Reng negro, Cina, sadaja suku e Indonesia, kaula sami dhari toronan se same; Ennoh. Dhadi bisa e sebutagi ja' kaula sami se odhi' e are paneka, karena Ennoh parcaja da'ka dhabuepon Allah, ban agabay parao kaangguy masalamet la-balana. Sebab bhakto Ennoh masalamet la-balana dhari banjir raja, salerana masalamet kaula sami jugan areng-sareng sadajana.

Sebab e bhakto Allah aberkadi Ennoh ban tra-potrana, Allah adhabu:" "Mara ana'-rana' pabannya', sopaja na' potona ba'na manossa'e bume reya." Dadi para tretan, kalaban berkad ban partolongan dhari Allah Ennoh ban tra-potrana abangun roma ban amolae kaodhi'an anyar. Karena parcaja ban ta'at ka Allah sadajana eberkadi. E bhakto geneka omora manossa gi' jang-lanjang ban banya' na' potona. Lebi banya' dhari jaman mangken. Dadi dhalem bhakto atoson taon jumlaepon manossa ampon abun-ebun. Parlo ekenga'en ja' dhasarra manossa ampon terinfeksi dusa, ban lopa dha'ka okoman banjir raja geneka. Manossa molae ta' parduli ban ta' ta'at ka bu-dhabuna Allah. Sadaja abali kakaodi'anna se posa' kalaban dusa. Saampona atoson taon manossa ampon ta' atoro' ka Allah. Kalopaen ja' Allah ampon apareng nyaba ban kaodhi'an, tera' are, ojan ban kakanan. Apa pole pelangi otaba gandhiba se e saba' Allah e langnge'menangka tandha esto ban tresnana Allah ka Ennoh. Sadajana ampon ta' ekaenga'e. paneka se etotoragi kitab socce: *"Reng-oreng jareya ngako kennal ka Allah, tape lalakonna mongkere Allah. Reng-oreng jareya majitjit, ban ta' endha' atoro' parenta; sarta ta' sanggup ngalakone apa'a bai se bagus."* Manossa aromasa aba'na la bicaksana,

mangkana budhu oggu. Se esemba banne Allah, anangeng allah palsu. Banne Allah se nyepta'agi alam dunya.

Akadi Kabil ban toronana, banya' toronana Ennoh se aberonta' ka Allah ban bu-dhabuna. Reng-oreng ganeka andhi' agama nangeng agamana palsu, ta' anot metorot kabendherranna Allah. Reng-oreng ganeka ta' poron ngedhingagi kabendherranna Allah. Se e kedingagi namong si setan ban kaleceganna.

Ra-kera 500 taon saampona banjir, badha sa oreng panganjur se terkenal, dibi'na jugan abangon tha-kottha. Oreng reya toronana Ham ana'na Ennoh. Asmana Nimrod se artosepon aberonta'. Oreng neka penter keng ta' kenal ka Allah. Dibi'na lebbi seneng noro' jalanna setan katembang jalana Allah. Padha bi' jalan se epele Kabil ban reng-oreng e jamana Ennoh. Nimrod ampon abangon panbarampan kottha, ban arencana'agi abangun kottha se sanget raja sopaja sadajana oreng bisa odhi' e dhalema dhadi setong bangsa.

Para tretan samangkem kaula bhakal maca'a kitab kadaddiyan pasal 11. Nyara ngoladi apa ca'na kitab socce bab rancanana Nimrod ban ca-kancana se abangon kottha se raja neka. Kitab socce ngoca': Dha'-adha'na manossa e dunnya reya pera' andhi' settong basa sarta padha oca'na. E bakto reng-oreng jareya alalana ka temora, laju napa' ka settong tana e Babilonia, tana jareya laju ekennengnge. E settong are reng-oreng jareya ngoca' kantha reya, "Mara ja' agabaya bata, pas obbar pagali." Reng-oreng jareya pas agabay bata, ekagabaya bengko, sarta agabay etter se egabay panyekka'na to-bato jareya. Ca'na reng-oreng jareya pole, "Sateya mara ja' maddegga kottha, pobuwi manara se tenggina napa' ka langnge', sopaja sengko' ban ba'na bisa'a kasohor ban ta' sa-tapesa pole e bume reya."

Kadi paneka rencanana Nimrod ban ca-kancana arencanaagi abangon kottha se raja kalaban manara se tenggina napa' ka langnge'. Anapa reng-oreng reya terro abangon manara se tenggina sampe' ka lange' geneka? Karana terro kasohor. Reng-oreng ganeka terro masetong sadajana oreng e bume sopaja kawat ban ta' sa-tapesa pole e bume reya. Tape Allah ta' kasokan dhe' rancana neka sebab ta' padha bi' karsaepun Allah. Sebab Allah ampon adhabu sopaja Ennoh ban toronana mosa'en bume. Allah se nyepta'agi manossa lebi oneng napa se paleng bagus kaangguy manossa. Nangeng banya' dhari toronana Ennoh ta' parduli de'ka napa se epekeragi Allah. Dibi'na aromasa ampon penter ban bicaksana katembang Allah. Akadiya setan, atena posa' kalaban kasombongan ban pamberonta'an de'ka Allah. Nangeng kitab socce ngoca': "Oreng se matenggi aba'na bakal ekababa'agiya, ban oreng se marendha aba'na bakal epatenggiya." (mat 23:12)

Matenggi aba'na otaba terro kasohor kaangguy aba'na dhibi', paneka dusa, sebab namong settong nyama se laja' e poji ban e molja'agi. Gepaneka asmana Allah se nyepta'agi langnge' ban bume. Kitab socce adhabu: "Oreng se edira kodu ngedirragi pa-apa se elampa'agi Pangeran. Sabab oreng

se kodu ealem enggi paneka oreng se ealem Pangeran, banne oreng se ngalem aba'na dibi'." (1kor1:31; 2kor 10:18)

Reng-oreng e jaman Nemrod lebi banyak se ta' ngargai Allah. Pekera Allah ban bu-dhabuna ta' e parlo'agi. Reng-oreng geneka ngaandhi' erroh pambaronta'. Ta' poron ngedhingagi pasera'a bisaos. Pangaterrowana coma' kabebasan. Kantos samangken erroh pamberonta' paneka gi' badha e dhalem atena na' torona Adam. La'-mala' na'-kana' kene' ampon andhi' sikap se kadipaneka, buktena: manabi esoro rengtowana Bengal nyaod : Enja'! geneka ana' kene' napa pole oreng dibasa. Ponapa me' badha keluarga otaba nagara se atokar? Biasana karena sikab aberonta' otaba karepa dhibi'. Aromasa lebbi bendher, lebbi penter, lebbi bagus, agamana paleng bagus, sengko' lebbi penteng! andhi'na sengko', kalambina sengko', pesena sengko'. Sengko'!, sengko'!, sengko'! . manossa mekeragi abha'na dibi', pusat sadajana tomoju sengko'. Sadaja manossa namong ngodi pangaterrona dibi'. Kabiyasa'an se kadipaneka se madhateng tokar e man-dhimman, saengga dadi perrang. Senga' Allah ta' kasokan de'ka parkara se sapaneka. Akadi se esebutagi e dhalem ketab socce:"Sengko' reya Allah, areya tang nyama, Tang kamolja'an ta' bakal e magi." Para tretan, kaenga'l namong asmana Allah bisaos se kodu emolja'agi!.

Nyara elanjutagi pole pangajaran kaula bab Nimrod. Nimrod ban ban ca-kancana molae maddek manara se tenggina napa' ka langnge', akantha bangal alaban ka Se Mahakobasa. Saongguna, reng-oreng jaman reya ampon andhi' agama, nangeng ta' parduli ka papakon sarta bu-dhabuna Allah. Nimrod sakancaan aromasa bisa dhepa' ka langnge' kalaban carana dibi'. Mara renungagi. Coma' 500 taon saampona banjir raja, tengkana manossa abali pole akadi jaman banjir raja. Manossa mele jalana dibi' ban aberonta' ka Allah. Manossa paneka Budhu ban bejjat onggung, majeu dhari Allah se ampon apareng nyaba ban pangandika se daddi kakanan jibana manossa.

Apa se elampa'agi Allah? Sapaneka oca'na ketab socce: Allah toron ngoladi kottha ban manara gabayanna manossa jareya, pas adhabu, "Reng-oreng reya asalla dhari settong bangsa se pera' ngangguy settong basa; areya coma parmola'anna sabarang se bakal elakonana reng-oreng jareya. Ta' saapa pole abidda reng-oreng jareya bakal bisa'a ngalakone apa'a bai se ekatterowe. Daddi mara ja' torona, basana reng-oreng jareya pasalbut sampe' oreng se settong ta' ngarte ka cacana oreng settonga". Daddi bi' Allah reng-oreng jareya epasalebbudan ka saantero bume. Se maddek kottha ta' epaterros. Jareya sababba arapa kottha jareya me' sampe' sateya enyamae Babil, sabab e jadhiya Allah masalbut basana manossa, ban dhari jadhiya sa-bangsa padha asalebbudan ka sabingkerra bume."

Para tretan, mangken ampon jelas ja' Allah duka da'ka rancanana Nemrod ban ca-kancana se ampon abangon kottha raja karena tero kasohor. Kenga'en para tretan, Allah ampon adhabu ka

Ennohban tra-potrana sopaja mossa'en ban ngobasane bume. Nangeng kalaban rencanana makompol sadaja manossa e setong kenengan, Nimrod ban ca-kancana ampon alaban Allah. Allah maburung rancana paneka kalaban masalbut basana reng-oreng jareya saengga epasalebbudan ka saantero bume. Paneka sababba kantos samangken badha ebuan suku ban basa e bume.

E jadhiya Allah abadhi basa se anyar saengga basana reng-oreng jareya salbut , paneka parkara se luarbiasa. Bajangagi, e Sulawesi selatan bisaos, badha basa Bugis, Mandar, Makassar, Duri otaba Toraja. Dadi Allah paneka ajib. para tretan sobung sa oreng se bisa menang alaban Allah. Manossa se ta' ta'at ka Allah ta' bakal bisa odhi' taremtem. Kenga'en kottha se epaddek bi' Nemrod geneka nyamana Babil. Artosepon salbut. Onggu para tretan, oreng se odhi'na tapesa dhari Allah bakal odhi' e dhalem kasalbudan.

Sapaneka caretana kottha se anyama Babil ban reng-oreng se aromasa penter ban ta' anot metorot karsaepon Allah. Ponapa dang-kadhang kaula sami akadi oreng Babil paneka? Sombong ban norodi karepa dibi'? para pamereng, noro' pasera kaodhian kaula sami? Noro' Allah otaba noro' manossa? Setong parkara se masthe, pojian dhari manosa bakal elanga, nangeng pojian dhari Allah bakal teptep salanjanga.

Para tretan, mator sakalangkong ampon merengagi siaran kaula. Manabi panjenengan kagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 17

Rengkessan “kadaddiyan”

Para pamereng, samangken kaula sami bakal arembaga pole ban arangkum sadaja pangajaran se ampon panjenengan perengagi. Gepaneka pangajaran setong kantos nembelas se epondhut dari ketab kadaddiyan tolesana nabbi Musa.

Ketab Taurat badha lema' bagiyany otaba lema' buku. Buku se pertama e sebut kadaddiyan. Dhalem ketab geneka bada 50 pasal ban kaula ampon ajar ketab geneka dhari pasal setong kantos sabelles.

Tantoepon panjenengan gi' engag' oca'na ayat setong dhari buku pertama dhalem ketab socce. E ka'dhissa' esebutagi:” E bakto Allah nyepta'agi alam dunnya.” Allah paneka langgeng. E bakto bume reya gi' ta' etemmo bangonna ban gi' ta' etemmo karowanna napa pole manossa, Allah ampon bhada. Allah paneka Erroh langgeng se sobung parmola'anna. Paneka sebabba ayat pertama dhalam ketab socce nyebutagi:”**E bakto Allah!**”

Kaula ampon ajar ja' sabeluna Allah nyepta'agi alam dunya neka, Allah ampon nyepta'agi abun-ebun mahlok erroh se raja kakowadanna. Lok-mahlok erroh geneka esebut malaekat. E antarana malaekat geneka badha se lebi bagus ban bicaksana ebandhingngagi se laen, asmana Lusifer. Bi' Allah Lusifer eangka' dadi kapalana kat-malaikatda Allah. Tape, e settong are Lusifer aoba, ta' ta'at pole ka Allah. Lusifer aromasa lebi penter, sombong, ban terro arebu' tahtana Allah. Banyak malaekat se buru ka Lusifer ban dusa akadi Lusifer. Karana sombong ban aberonta' ka Allah Lusifer ban di-abdina e ojuk ban nyamana eoba dadi Setan. Setan artena lecegan. Allah abadhi kenengan se posa' kalaban apoy langgeng gepaneka naraka. Ketab socce pareng oneng da'ka kaula sami ja' ebakto jaman akher, Lusifer ban sadaja di-abdina; malaikat ban manossa, bakal eontallagi ka naraka.

Saampona paneka kaula ajar kadiponapa Allah nyepta'agi langnge' sareng bume, ban sadajana kalaban dhabu bisaos. Manosa ecepta'agi paleng akher. Manossa paneka cepta'an se paleng penting sebab manossa e cepta'agi merep bi' Allah. Manossa eparengi pekeran, saengga bisa kenal ban oning karsaepon Allah. Manossa eparengi ate, sopaja bisa neser ka Allah, ban manossa epareng pangaterro, sopaja bisa mele narema ban ta'at otaba nolak ban beronta' ka Allah. Allah apareng pekeran, ate, ban pangaterro sebab Allah akarsa sopaja manossa paneka dadi sobadepon Allah.

Dhalem pasal duwe' ketap kadaddiyan, ecareta'agi Allah abagon kebbun se anyama Firdaus otaba Eden ban nyaba' manossa e kebbun paneka. Allah se Maha Bagus apareng sadaja se eparlo'agi Adam sopaja bisa odhi' kalaban taremtem.

Allah adhabu ka Adam: "Adam, "Ba'na olle ngakan buwana sakabbinna ka'-bungka'an e bunkebbunan reya, kajabana buwana bungkana pangataowan parkara se becce' ban se juba'. Mon ba'na ngakan buwa jareya, sanatkala jareya keya ba'na bakal mateya." Dadi badha ujian kene' kaangguy Adam. Banne sopaja Adam agabay sala, anangeng sopaja Adam bisa abukte'agi taresna ban estona ka Allah.

Kaula ampon merengagi ja' saampona Allah nyepta'agi Adam, Allah apareng berkad se lebur ka Adam, napa berkad paneka? Sa oreng bine. Bine' se anyama Hawa paneka ecepta'agi dhari tolang roso'na Adam. sapaneka paratretan, e dhalem nem are sadajana lalakon paneka ampon mare kabbi. Saterosepon, pasal 3 nyareta'agi kadiponapa dusa bisa maso' ka dhalem dunya. Kitab socce notoragi e setong are, bakto Adam ban bine'na e seddi'na bungkana pangataowan parkara se becce' ban se juba', setan se abujud olar, agudha adam ban Hawa saengga sekadhuwe geneka mangmang ka dhabuna Allah. Ca'na setan; ba'na ta' kera mate. Allah adhabu kantha jareya sabab la ngagali mon ba'na ban lalake' rowa ngakan buwa jareya tanto pekkeranna pas tabukka', pas padha ban Guste Allah.

Para tretan, Sadaja bu-dhabuna Allah ampon elik-balik bi' Setan! Bakto Allah adhabu; "Mon ba'na ngakan buwa jareya, ba'na bakal mateya." Setan ngoca': "Enja', mon ba'na ngakan buwa jareya ba'na ta' kera mate." Laju oca'na sapa se etorot Adam ban Hawa? Oca'na setan otaba dhabuna Allah? Emanepon Adam ban Hawa norodi oca'na Setan katembang dhabuna Allah. Setan nepo manossa saengga aberonta' ka Allah, paneka peleana manossa dibi'. Kitab socce nolesagi: " *Dusa maso' ka dunya lebat oreng kasorang, ban dhari dusa gapaneka dhateng pate. Daddina, pate alatlat ka sadajana manossa, sabab manossa padha dusa sadaja.*"

Kalaban sapaneka Adam ban Hawa e ojuk kalowar dari Eden. Tape sabeluna Allah ampon ajanji ngotos sa oreng panyalamet ka dunya sopaja mabebas ban nebus Toronana Adam dari kobasaepon Setan, dusa ban kapatean. Lajju Allah nyambeli keban. Bi' Allah Adam ban Hawa ebadhiyagi rasogan dhari kole'na keban, pas eagemmagi ka se kadhuwa jareya. Allah nyambeli keban menangka kurban kaangguy kapentengana Adam ban Hawa, banne coma' kaangguy notopi badana nangeng kaangguy noduagi ban ngajaragi ja' "opana dusa geneka pate ban tanpa kurban dhara sobung saporana dusa."

Dhalem pasal 4 kaula bisa ngoladi caretana ana'na Adam ban Hawa se anyama Kabil ban Habil sarta kurbanna ka Allah. Habil ngatorragi kurban keya, iya areya budhu'na embi' dumbana se sareyang, budhu'na dumba jareya esambelli, bagiyanna se paleng bagus ekagabay kurban saporana dusa, persis akadi se elakone Allah kaangguy rengtoana. Tape Kabil ngatoragi kurban kalaban carana dibi', ngala' sabagiyon dhari hasella tanena. Hasel dhari tana se ampon e basto bi' Allah. Ca'na kitab socce: "Allah kasokan ka Habil ban kurbanna, tape ta' kasokan ka Kabil ban kurbanna." Saampona

geneka Allah ngolo' Kabil sopaja oneng kasala'ana ban atobat dari dusana, sarta narema jalan kasalamedan, nangeng Kabil mala peggel ban mate'e ale'na. Kabil ampon mele jalan kasesadan.

Saampona paneka Allah apareng potra pole da'ka Adam ban Hawa. Asmana Set. Set paneka parcaja ka Allah ban nyema' ka Allah kalaban ngatoragi kurban dhara akadi Habil. Toronana Adam dadi dhu bagiyan gepaneka toronana Kabil ban toronana Set. Toronana Kabil ta' parcaja ka Allah. Tape toronana Set parcaja ka Allah. Sala setong toronana Set se parcaja ka Allah gepaneka Idris (Enos). Idris odhi' e jaman se jahat. Nangeng Idris teptep sema' ban ekaneserre Allah kantos e angka' ka sowarga ban odhi' sareng Allah samanina. Idris andi' toronan se anyama Ennoh, e jaman Ennoh Allah kagungan rencana mamosna sadaja manossa kalaban banjir raja. Allah alampa'agi sadajana karena ampon ta' kowat ngoladi kajahadanna manossa e bume se sajan atamba banya'. Allah ampon berusaha sabar nangeng manossa tada' separcaja ban poron atobat kajaba namong Ennoh. Ennoh laju esoro agbay parao se sanget raja, kaangguy masalamat aba'na ban la-balana sarta ban-keban sarta oreng se parcaja ka Allah. 100 taon Allah ampon sabar anante' reng-oreng parcaja ban atobat ka Salerana. 100 taon e butoagi Ennoh kaangguy mamare paraona. Nangeng sobung setonga se parcaja ka dhabuna Allah. Akherepon Allah alampa'agi dhabuna. Ban ahakimana sadajana oreng se ta' parcaja kalaban banjir raja. Sadajana mate kajaba Ennoh ban la-balana sarta sadaja se badha e dhalem paraona.

Ennoh ngagungi ana' telo'an, gepaneka: Sem, Ham, ban Yafet. Dhari se katelo geneka asala sadajana manosa se odhi' e alam dunya. Nangeng kaula bisa ngaonengin ja' toronana Sem Ham ban Yafet paneka akhera malopa sadajana okoman se dahsyat dari Allah se aropa banjir raja geneka. Sadaja ampon kalopaen ka Allah ban bu-dhabuna. Saterosepon kaulasami ampon ajar kaodhi'anepon Nemrod ban ca-kancana se andhi' rencana masetong sadajana manosa e dhalem kenengan se settong, ban maddek kottha se raja sarta abangon manara se tenggina kantos ka langge'. Rancana se edhasare rasa sombong ban terro tasohor sarta aberonta' ka Allah. Tape Allah masalbut basana reng-oreng jareya sampe' oreng se settong ta' ngarte ka cacana oreng settonga. Daddi bi' Allah reng-oreng jareya epasalebbudan ka saantero bume. Kottha jareya enyamae Babil, se artosepon salbut.

Para tretan, Sapaneka rengkessanna sadaja panagjaran se ampon kaula rembag dari kitab kadaddiyan pasal 1 kantos 11. Kasempolana se pertama: Tadha' oreng se bendher settonga. Akadi se etoles edhalem kitab socce:"dusa ngobasae sadajana ommat manossa, akadi se etoles: Tadha' oreng se bendher settonga."

Dhuwe' Allah paneka bendher. Akadi se etotoragi kitab socce:" Allah paneka terrang, ban e dhalem Salerana tadha' petteng sakale." Kaula bisa ngoladi kabendherranna lebat papakona se ngoca':" dusa pera' bisa esapora mon badha dhara se epangalocor." (Ibr 9:22)

Para tretan nyatana manossa paneka sobung se bandher, sobung settonga alasan se bisa kaangguy mabendher aba'na dibi', ban ngoca' ka Allah: "*sengko' ta' sala!*" sebab namong Allah bisaos se soce ban tadha' calena, ban ta' mongken kasalaan kaula e bajar ngaangguy kalakoan se sae ka oreng laen. Sebab kaula same asala ban beronta' ka Allah. Dadi kaula kodu arosan bi' Allah.. leres gi? Ban bakto arosan sareng Allah tanto kodu norok papakon ban kom-hokoma Allah. Paneka sebabba anapa kaula kodu parcaja ka Allah se ampon apareng cara sopaja kaula sami bisa odhi' ban dhepa' ka ajunana kalaban taremtem, sobung pole amosowan ban otang dusa. Para tretan, manabi panjenengan terro ngalame sadajana paneka ... kaula sami kodu parcaja ja' badha jalan kasalameddan se tomoju ka sowarga ... jalan se ampon e teptepagi bi' Allah diri' kaangguy sadaja se parcaja ka dhabuepon.

Para tretan, mator sakalangkong ampon merengagi siaran kaula. Manabi panjenengan kagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 18

Ibrahim Etembali Allah

E dhalem siaran sabeluna , kaula ampon ngoladi pole kaodianepon Adam ban Hawa, sarta toronana : Kabil, Habil, Enos, Ennoh, ban manossa se odhi' e jamanna akadi Nimrod ban ca-kancana se maddek manara Babel. Lebat sadaja careta paneka kaula same bisa ngaonengin ja' Allah paneka Maha Bendher ban Maha Esto, Allah apareng jalan kasalameddan se tomoju ka sowarga da'ka sadaja se parcaja ka Salerana. Nangeng manossa se parcaja namong sakone'. Lebi banyak manossa se mele noro' Setan ban jalan kasesadan.

E are paneka kaula bakal ngedingagi caretana saoreng se sanget terkenal e dhalem kitab socce, ban se ngaandi' posisi khusus dhalem rencanana Allah mabebas toronana Adam dhari okoman pate karena dusa. Dhalam kitab socce oreng paneka e sebut " sobad Allah" ban "Eppa' dhari sadajana oreng parcaja." Pasera oreng geneka? Oreng geneka asmana Ibrahim. Rembagan kaula e are mangken eparengi judul "Ibrahim etembali Allah." Kaodhi'ana Ibrahim banyak ecaretaagi e dhalem kitab socce. E dhalem kitab Bi-nabbi asmana esebut lebi dhari 300 kale. Dadi insya Allah, dhalem pangajaran mangken ban se dhateng, kaula bakal ajara tab-ketab se nyareta'agi Ibrahim ban kaodhi'anepon. E are paneka kaula bakal ngoladi kadiponapa ban anapa Allah mele ban nembali Ibrahim.

Para pamereng, nyara pangajaran bab Ibrahim sobad Allah paneka emolaen. Para tretan, sabeluna asmana nabbi paneka banne Ibrahim ananging Abram. Allah diri' se nggante asmana. Bab paneka bakal e rembag e pangajaran se dhatang.

Lebat pangajaran kitab socce jalan kasalameddan paneka, kaula ampon oneng ja' Abram paneka toronana Sem bin Ennoh. Dhari Ennoh kantos Abram bada 10 generasi. Abram paneka potrana Terah. Tretana Abram badha dhuwe' gapaneka Nahor ban Haran. Haran seda kaadha', Haran nga'andhi' potra se anyama Lot. Molae keni' kantos raja Lot noro' Abram. Abram andhi' bine se nyamana Sarai. Saongguna Sarai paneka taretana Abram. Tonggal eppa' laen ebbu'. E jaman Abram ampon biasa, ban bisa e tarema bi' masyarakat. Nageng kantos yuswa 75 taon Abram gi' ta' kagungan potra.

Abram ban Sarai odhi' e kottha Ur, mon samangken e wilayah Irak. Kottha Ur paneka, ta' jau dhari kottha Babel, kenengana manara raksasa paneka. Reng-oreng e kottha Ur paneka nyemba ka barhala, tamaso' Abram ban reng towana. Dadi sabeluna sadaja ta' oneng ka kabendherranna Allah.

E bakto are Allah ngaton ban acatoran ka Abram. Para tretan, parlo ekaonengin ja' e bhakto geneka Allah ngaton ban arembagan sareng manossa sacara langsung. Samangken Allah adhabu ka manossa lebat ketab socce, gepaneka e saat kaula maca ban asa'-rasa'agi ketab socce, e saat kaula arenongagi yat-ayat ketab socce paneka Allah adhabu ka kaulasami.

Samangken nyara merengagi apa se edhabuagi Allah ka Abram. Etoles dhalem ketab kadaddiyan 12:1, "Allah adhabu ka Abram, "Dina'agi nagarana ba'na jareya, bariya keya la-balana ban bengkona eppa'na, pas mangkat ka nagara laen se bi' Sengko' eduduwagiya ka ba'na." Para tretan, panjenengan mereng apa se e dhabuagi Allah ka Abram paneka? Allah nyoro Abram dina'agi eppa'na, la-balana, ban nagarana tomoju ka nagara laen se eduduwagi Allah ka Abram. Ra-kera manabi dhabu paneka etujuwagi ka panjenengan, ponapa panjenengan langsung mangkat? Kaula parcaja panjenengan gi' ker-peker gallu. Ongguwan adinggallagi sadaja se ekaandhi' paneka ta' gampang. Leres gi? Nangeng tretan.... Allah ngagungin rencana se raja kaangguy Abram.

Paneka rencanana Allah kaangguy Abram se ampon esoro adinggallagi nagarana. Allah ngagungi rencana sopaja Abram bisa alahiragi bangsa se anyar, bangsa paneka bakal daddi sombera sadajana bi-nabbi ban panyalamet se ejanji'agi Allah. Paneka se ekamaksod Allah bhakto adhabu ka Abram;" Bi' Sengko' ba'na eberri'ana na' poto sabannya'na, ban na' potona ba'na bakal daddiya bangsa raja. Bi' Sengko' ba'na eberkadana, ban nyamana epakalonta'a, ban ba'na bakal madhatengnga berkat ka oreng laenna."

Apa se edhabuwagi Allah paneka kabendherran. E sa'at Allah adhabu bab bangsa se raja paneka Allah amapon mele Abram daddi eppa' dhari sadajana oreng parcaja, tamasok panyalamet se bakal dhatenga. Panyalamet paneka eotos nyalametagi sadaja manossa e dunya, sadajana se parcaja ka salerana bakal bebas dhari sadaja okoman ban apoy naraka. Daddi e bhakto Allah nembeli Abram, saongguna Allah sajan sema' ka janjina ngerem sa oreng panyalamet kaangguy dunya ban reng-oreng se dusa. Panyalamet se ejanjiagi paneka banne Abram, oreng neka toronana Abram.... Nangeng janji paneka gaandhi' syarat. Ponapa syaratepon, tretan? Syaratepon gepaneka:" adinggallagi sadajana : eppa' – ebu, la-bala, tretan, bangko, nagarana sadajana kodu edinggallagi. Paneka ongguan, manabi ampon mangkat, ta' bisa abali pole. Paneka artosepon adinggallagi iman, ban kaparcajaan se laju se parcaja ka roh-eroh, gunong, bato, bungka ban en-laena. Berra' onggur rat-syarat paneka. Ra-kera ponapa Abram noroti sadajana syarat dhari Allah paneka? Para tretan Abram endha' narema syarat paneka. Ketab socce notoragi:" *Abram laju mangkat menorot se edhabuwagi Allah.*"

Ra-kera anapa Abram poron narema rat-syarata Allah ban adinggallagi eppa' – ebu, la-bala, tretan, bangko, nagarana laju mangkat ka nagara laen se gi' ta' ekaonengin? Setong parkara se kodu

ekaenga'en gepaneka: Abram parcaja ka dhabuna Allah. Abram parcaja ja' Alah bakal esto ka janjina se ampon edhabuagi :*"kalowar! Sengko' bakal aberkadana ba'na!"* Ban sadajana tabukti bendher, Allah e dhalem kaestoana, mimpin parjalanana Abram kantos dhepa' ka kenengan se anyama Kanaan, se samangken esebut Israel.

Ketab socce notoragi:*" Abram meynos san-kassannagi e nagara jareya, sampe' napa' ka settong kennengngan se anyama kanaan. E bakto jareya nagara jareya gi' ekennengnge oreng Kana'an. Allah ngaton ka Abram pas adhabu, "Nagara reya bi' Sengko' ebagiya ka ba'na sana'potona." Abram pas abadhi mezba e jadhiya, eatorragi ka Allah se ngaton ka salerana jareya. Bi' Sengko' ba'na eberri'ana na' poto se talebat bannya'na, sampe' ta' ekenneng bitong. Akantha bannya'na abu e bume se ta' ekenneng bitong oreng, kantha jareya bannya'na na' potona ba'na." sapaneka kasaeyana Allah ka Abram. Ta' pera' epadaddi sobad Allah ban eppa' dhari sadajana oreng parcaja, nangeng eparengi tana otaba nagara keya.*

Nangeng badha bab se ane ban mohal metorot akala manossa. Allah ajanjiagi dhu parkara se raja: epadaddi eppa' dhari sadajana oreng parcaja ban ngaole nagara... nangeng, Abram ta' andhi' potra. Daddi metorot akala manossa janji paneka mohal bisa e teptebi.

Saat paneka Abram ampon yuswa 75 taon ban binena ampon yuswa 65 taon. Sekadhuwe ampon towa. Ponapa oreng se ampon towa gi' bisa andhi' toronan? Apa pole mosa'en tana Kanaan paneka, tantoepon buto ana' se banya'. Daddi kadiponapa Allah bisa neptebi janjina? Kaula same bakal onenga bab paneka e dhalem pangajaran se dhateng.

Para tretan ampon dhepa' baktuna kaula same apesa'a, nangeng sabeluna kaula terro ngaja' panjenengan ngenga'e pangajaran se ampon e rembag e are mangken: pertama apa sababba Allah nembali Abram. Allah nyoro Abram adinggallagi eppa' – ebu, la-bala, tretan, bangko, nagarana laju mangkat ka nagara laen, karena Allah andi' rencana madaddi Abram daddi bangsa se raja. Bangsa se anyar se asala dari eppa' se setong. Dhuwe' kaula ampon ajar apa sababba Allah karsa madaddi Abram ban toronana daddi bangsa se raja. Sebab Allah akarsa sopaja dhari bangsa se anyar geneka laher bi-nabbi-Na, bakal bada ketab socce, ban sa oreng pambebas bakal laher dhari toronana Abram genek. Daddi bisa ekoca' ja' e bakto Allah nembali Abram, Allah ajalanagi rencanana ngotos sa oreng pambebas ka dhalem dunya, sopaja sadajana oreng se parcaja epabebas dhari sa-dusana. Janji paneka edhabuagi diri' sareng Allah ka Adam ban Hawa saat se kaduwe paneka etondhung dhari Firdaus. Dhu ibu taon saampona geneka, e jaman Abram kaula bisa ngaonengin ja' Allah neptebi janjina. Allah ta' lopa ka janjina.

Para tretan, mator sakalangkong ampon merengagi siaran kaula. Manabi panjenengan kagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 19

Ibrahim sobad Allah

Para pamereng, se bekal erembag e dhalem pangajaran saterosepon sa oreng se kaodian sare-areepon akadi manossa biasa se ta' samporna. Nangieng dibi'na esebut sobad Allah. Oreng geneka nabbi Ibrahim. Nyara areng-sareng ngoladi careta kaodhi'anepon nabbi Ibrahim sobad Allah. Sebakal eoladi dhari kaodi'anepon nabbi Ibrahim e saat mangken gepaneka bab apareng kasempadan da'ka oreng laen sopaja mele kaadha'.

Paneka bab se sara, tantoepon kaula same terro ngaole se paleng sae, sopaja ole se sae biasana kodu mele kaadha'. Nangeng menangka oreng parcaja Ibrahim nganggep oreng laen asaeyan dhari aba'na dhibi'.

Sapaneka caretana, akadi se etoles e dhalem ketab socce: Ibrahim adinggallagi nagarana karena Allah ajanji bakal mabadha'a bangsa se anyar dhari toronana, ban dhari toronana paneka bakal lahir pambebas agung se bisa masalamet omat manossa. Ibrahim parcaja dha'ka dhabuna Allah, dadi Ibrahim adinggallagi nagarana ban mangkat ka nagara anyar se anyama Kanaan. Ibrahim mangkat abakta rajina se anyama Sarai, ban ponakanna se anyama Lud. E dhalem parjalananna paneka tamba abit Ibrahim ban Lud atamba sogi. Anangeng oreng se sogi gi' ta' tanto taremtem. Akadi se ealami Ibrahim....

Sapaneka caretana Ibrahim ban Lud: e setong are e bhakto Ibrahim ban Lud e seddi'na Bethel. Oreng se ngowan ebinna Ibrahim atokar ban oreng se ngowan ebinna Lud. Tana jareya ta' cokop mon ekadhuwai, sabab ebinna se kadhuwa jareya talebat bannya'na. Laju Ibrahim adhabu ka Lud, "Sengko' ban ba'na reya sabala'an, daddi ta' becce' mon reng-oreng se alako ka sengko' atokaran ban reng-oreng se alako ka ba'na. Daddi lebbi becce' mara ba'na ban sengko' apesa bai. Mara ba'na se mele. Mon ba'na ngennengngana bagiyon kacér, sengko' ennengnga e bagiyon kangan, mon ba'na ngennengngana bagiyon kangan, sengko' ennengnga e kacér."

Para tretan paneka luar biasa, coba bajangagi; badha sa oreng se ngajak ponakana entar ka nagarana oreng, oreng geneka sukses ban dadi sogi, bereya keya keponakana. Bit-abit Keponakan paneka dadi saengan e dhalem pasar se padha. Kadhuwena atokar arebu'an langganan se padha. Daddi kodu badha se kalowar dhari pasar geneka. Noro' panemmona panjenengan se kemma se kodu kalowar dhari pasar? Tanto jawabanna si keponakan paneka.

Paneka noro' panemmona kaula... nangeng Ibrahim ta' saneka. Ibrahim nyoro Lud mele kaadhe'. Mon Lud ngennengngana bagiyon kacer, Ibrahim ennengnga e bagiyon kangan, mon Lud ngennengngana bagiyon kangan, Ibrahim ennengnga e kacer." Ibrahim aberi' kasempadan ka Lud sopaja mele kaadha'. Paneka padha bi'... panjenengan aberi' kasempadan ka keponakana sopaja mele kaadhe' ; mon ba'na mele ausaha e pasar reya sengko' kalowar, nanging mon ba'na mele kalowar sengko' se ausaha e pasar reya.

Lud ngabas ka sakalengngana laju mele kenengan se paleng bagus, se landhu tanana bannya' aenga ban banya' rebbana. Tana se epele Lud bagus onggung. Tana geneka sema' ka Sodom, Se kadhuwa jareya laju apesa. Laju apa se kadaddiyon ka Ibrahim? Saampona Lud mele tana se bagus, ponapa Ibrahim kakorangan? Bunten, saongguna nalekana Allah makon Ibrahim adinggallagi Ur, Allah ta' perna makon Ibrahim enneng e setong kenengan. Ibrahim epakon sopaja entar ka sabingkerra Kanaan. Le-ngalleyan dhari kottha se settong ka kottha laenna. Paneka se ekarsa'agi Allah. Daddi apa se epele Lud paneka karepa dibi'.

Lud ampon mele apa se eanggeb bagus. Esangguni kalaban peleana neka aba'na bakal lebi sogi, nangeng dhegi' akhera, Lud bakal sangsara karena peleana reja. Lud lebi seneng makompol dunnya e bume banne dunnya sowarga..... kadiponapa mon panjengan? Ponapa se lebi eserser, dunnya e bume ponapa dunnya e sowarga? Orenge se bicaksana bakal mele nglakoni pa-apa se e dhabuagi Allah , sebab ketab socce notoragi : Apa ontongnga orenge se ngaandhi' saantero dunnya tape kaelangan odhi'na? ayat se laen ngajaragi sopaja ta' lebur ka dunnya sabab sadajana bakal duliya mosna. Nangenge orenge se norodi kasokanna Allah, teptep odhi' salanjangnga.

Samangken nyara abali pole ka tokoh utama careta paneka; gepaneka Ibrahim. Kalaban imanna Ibrahim mele noro' dhabuna Allah ban masra'agi sadajana ka astana Allah: hasel e budhi arena, kasogiyon, pangarebban, ban en-laena.... Epasra'agi ka Allah. Saellana Lud ngalle apesa ban Ibrahim, Allah adhabu ka Ibrahim, "Kodda' ba'na ngabas ka sakalengngana, dhari kennengnganna ba'na se manjeng jareya. Nagara se etangale'e ba'na jareya bi' Sengko' ebagiya kabbi ka ba'na ban ka na' potona ba'na sopaja daddiya andhi'na ba'na ban na' potona saterrossa. Bi' Sengko' ba'na eberri'ana na' poto se talebat bannya'na, sampe' ta' ekenneng bitong. Akantha bannya'na abu e bume, kantha jareya bannya'na na' potona ba'na. Sateya kassa' entare bagiyonna nagara reya kabbi, sabab tana jareya bi' Sengko' ebagiya ka ba'na." sapaneka para tretan, Ibrahim odhi' le-ngalle dhari kenengan setong ka kenengan se laen.

Nangenge badha setong masala se raja, gepaneka kantos yuswana se sepo, Ibrahim ban Sara gi' ta' kaagungan pottra. Karena ampon sepo ta' kera Sara bisa andhi' pottra. Nangenge ane, Allah janji apareng pottra, benne pera' setong...nangenge banya' kantos ta' ekenneng bitong orenge. Manabi janji

paneka eparengagi ka kaula, kaula same paste ta' parcaja ka janjina Allah paneka. kadiponapa tanggebna Ibrahim, ponapa Ibrahim parcaja?

Ponapa Ibrahim parcaja ja' Allah bakal neptebi janjina paneka? kitab socce notoragi: "*Ibrahim parcaja ka Allah, ban lantaran kaparcaja'anna jareya, Allah narema Ibrahim menangka oreng se alampa'agi kasokanna Allah.*" Lantaran ganeka Ibrahim esebbut "*Sobadda Allah*". Ajib onngu. Alla ajanjiagi parkara se metorot okorana manossa ta' kerra kelakon.... Kadiponapa metorot Ibrahim? Ibrahim parcaja.... Kadiponapa akhera? *Allah narema Ibrahim menangka oreng se alampa'agi kasokanna Allah.* Ibrahim etarema menangka oreng se bendher e ajunaNa.

Ajib onngu, Ibrahim etarema menangka oreng se bendher e ajunaNa, benne karena kalakoana... sabab kalakoana same bi' reng-oreng laena, Ibrahim andhi' sala ban dusa keya. Ibrahim etarema menangka oreng se bendher lantaran kaparcaja'anna ka Allah, Ibrahim parcaja ka sadaja se edhabuagi Allah. Bakto Allah ajanji, Ibrahim ngoca': enggi, paneka leres, kaula parcaja da' ka pangandika Panjenengan,... paneka artosepon "Amin" se segut e oca'agi sareng kaula ban panjenengan same.

Daddi tore aehteyar pagu-onngu kaangguy parcaja ka Allah, akadi Ibrahim se parcaja ka Allah. Kaula kodu parcaja ja' Allah bisa apareng kaajiban. Ban lantaran kaparcaja'anna paneka kaula bisa alampa'agi kasokanna Allah. E ajunana Allah sobung parkara se mohal. Tantiepon kaula sami terro bisa alampa'agi se daddi kasokanna Allah akadi Ibrahim. Namong settong se kodu elampai gepaneka parcaja ka bu-dhabuna Allah. Kalaban sapaneka Allah bakal apareng kabendheranNa se samporna. Kitab socce notoragi: "*Mon ta' gadhuwan iman, tadha' oreng se bisa masenneng panggaliyanna Allah.*" Saongguna kaula sami epasalamat karena iman parcaja ka Allah, kasalameddanna kaula same paneka paparengnga Allah, banne ollena kaula dibi', banne polana kalakowana kaula se sae.

Samangken pertanya'ana ponapa kaula same tamasok omat se parcaja ka Allah? Banne pera' parcaja ja' Allah paneka badha otaba Allah paneka settong...., sabab mon coma' sapaneka, kitab socce notoragi ja' tan-setan parcaja keya, la-mala katako'en. Parcaja se etanya'agi e ka'dhinto ponapa kaula same parcaja ban ta'at da'ka dhabuna Allah? Kaula same kodu ta'at ka sadaja dhabuna Allah karena paneka se dadi kasokanNa. Ban akadi kaparcajaanna Ibrahim, kaparcajaan kaulasame bakal e uji, ponapa kaula ta'at ka bu-dhabu se segut gerasa berra'... akadi Ibrahim se kodu adinggallagi nagara ban tan-tretana..... para tretan, epaonggu parcaja ka Allah, ja' kantos gu-ragu....lantaran kaparcaja'anna, Allah narema Ibrahim menangka oreng se alampa'agi kasokanna Allah." Lantaran ganeka Ibrahim esebbut "*Sobadda Alla.* Ban manabi kaula mele alampa'agi se daddi kasokana Allah, akadi Ibrahim, kaula bakal eparengi kabendherranna Allah se samporna paneka.

Saampona geneka, tore arenungagiya ayat ketab socce se notoragi ja' Ibrahim parcaja ka Allah, ban lantaran geneka Ibrahim etarema menangka oreng se bendher e ajunaNa. Dhalem siaran se dhateng kaula bakal nerosagi pangajaran bab Ibrahim sobad Allah.

Para tretan, mator sakalangkong ampon merengagi siaran kaula. Manabi panjenengan kaagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 20

Ibrahim ban Ismail

Para pamereng sadajana.....

Tarema salam kaula edhalem Asmana Allah se maha taresna sarta kakaseh. Allah samanina ngandhi' pangaterrowan dha'ka sadaja manossa ngenal tor tekun dha'ka jalan kasalameddan, jalan se nojhu ka Sowarga se ampon e siapaghi Allah. E jalan kaissa' Allah se maha kakaseh sarta taresna karsa sadaja manossa odhi' e dhalam restuepon, saniyab lebat jalan kasalameddan, manossa bisa'a dhepa' ka karatonah, dhalem kataremteman se sajete. Dhalam acara jalan kasalameddan paneka, **kaula sadaja bekal areng sareng nalete tab-ketab se etoles sareng para Nabbi se ajarna'agi jha' jalan molja se ampon e teptepagi Allah saengga ommat manossa ngaolle edhadiagi oreng bandher e ajunana Allah.**

E dhalem pangajaran sabeluna kaula sami ampon arembag bab nabbi Ibrahim, ban e are mangken kaula badhi nerosagi arembag bab nabbi Ibrahim paneka, gepaneka parkara anapa Allah ngoba asmaepon daddi Ibrahim. E bagiyon pertama kaula bakal ngoladi caretana sedhi, sebab Ibrahim nglakone apa se ta' ekasokani bi' Allah, kasala'an se madhateng kasossa'a neka gepaneka Ibrahim se ta'sabbaran.

Para tretan kaula same ampon oneng ja' Allah ampon adhabu, ban ajanji bakal mabadha parkara se ce' bagussa ka Ibrahim ban toronana. Na' potona Ibrahim bakal daddiya bangsa se raja... tape nyatana... kantos yuswa sepo Ibrahim ban Sara gi' ta' kagungan potra. Samangken kaula bakal ngedingagi caretana Ibrahim aehteyar sopaja janjina Allah paneka kalakon.....

Para tretan.... Ibrahim paneka manossa biasa akadi kaula sareng panjenengan sami, maske daddi nabbina Allah ta' lopot dari kakorangan ban kasala'an. Kitab socce notoragi: sobung manosa se samporna ban ta' dusa.... Tape karena kakorangan paneka kaula same bisa ngaandhi' pangareban Bisa ngoladi Ja' Allah paneka gu-onggu Maha Mora ban sanggup apareng kabebasan. Abali pole ka Ibrahim. Saampona abit anante' janjiepon Allah ta' duli dhateng...., Ibrahim ta' sabar pole. Enga' Ibrahim ta' sabar banne ta' parcaja! Karena Ibrahim ta' sabar anante' janjina Allah paneka nyebabagi masala e budhi are....

Apa se elakone Ibrahim? Ibrahim ban rajina aehteyar "abanto" Allah neptebi janjiNa ka Ibrahim. E dhalem Taurat ecaret'agi sapaneka: Sarai, rajina Ibrahim, ta' kaagungan pottra, tape kaagungan dunor babine' dhari Messer, Hagar nyamana. Sarai mator ka Abram, "Sampeyan oneng, bi' Allah kaula ta' eparenge ana'. Daddi langkong sae sampeyan asaren sareng dunor kaula saos. Pasera

oneng pola dunor kaula ganeka pas gadhuwan ana' dhari sampeyan." Ibrahim cocok ka panemmona Sarai jareya. Ibrahim asaren ban Hagar, Hagar laju ngandhung....

Ra-kera apa badha babine' se akadi Sarai paneka? ponapa badha babine' se nyoro lakena tedung ban babine' laen?... paneka ampon sala.... Laju, apa badha dunor se ta' sombong, manabi tao ja' aba'na ngandhung ana' dhari lakena lora bine'na jareya? Hagar laju atengka akadi lora, aba'na ta' parduli ka Sarai. Tanto Sarai duka ... ban neka dadi masala. Lebi sara pole Sarai nyala'agi Ibrahim.... padahal sakabbiyanna neka osolana Sarai dibi'.... daddi dhari adha' sadajana ampon sala, kasala'an paneka atamba raja ban salbut. Ngadhebbi parkara geneka Ibrahim bingung, Ibrahim ngedine sarai nglakone sasoka'na dhibi', epabaramma'a bai Hagar bi' Sarai Ibrahim ta' duka ka Sarai. Sarai pas ce' kejjemma ka Hagar, sampe' Hagar buru.

Para pamereng, nyara egateagi ja' saampona Ibrahim ban Sarai aehteyar ngaole janjina Allah ngaangguy carana dibi' ... kaodhi'anepon posa' kalaban sake' ate, ere, peggel, ban ate baji'. Sadajana ealame karena banne paneka se ekasokane Allah. Allah ta' arencana'agi se sapaneka. Allah ta' marloagi bantolan pasera'a bisaos kaangguy neptebi janjina ka Ibrahim. Para tretan, Allah paneka esto..... mojudagi janjina Allah paneka banne orosana kaula, se bisa elakone namong sabar ban massra'agi sadajana ka Allah, Allah bakal ngator sadajana parkara kantos ngasellagi barang se sae.

Bhakto Hagar buru. Malaekadda Allah manggi'i Hagar e seddi'na settong sumber e sagara beddhi, e jalan ka ra-ara Syur. Malaekat paneka adhabu sopaja Hagar abali ka lorana, pas ngladine seteppa', Hagar esoro narema maske eseksa. Malaekat paneka adhabu pole, ja' Hagar eberri'ana na' poto se talebat bannya'na, sampe' ta' ekeneng bitong. Hagar bakal rembi'a lalake'; ana' jareya esoro nyamae Isma'il, se artena "Allah ampon meyarsa". Sabab e bakto Hagar nanges Allah meyarsa tangessana. Allah apareng oneng ja' Ismael jareya bakal odhi'a akantha hemar alasan; bakal alabana ka sakabbinna oreng, Odhi'na bakal tapesa'a dhari la-balana.

Daddi Hagar laju abali ka Sarai, lorana... pas rembi' lalake', ban enyamae Isma'il. E bakto Hagar rembi' jareya yuswana Abram ballung polo ennem taon. Nangeng Isma'il paneka banne ana' se bakal eangguy Allah neptebi rancanana. Saampona Isma'il laher, 13 taon abitepon Allah ta' madateng dhabuna ka Ibrahim.

E bakto yuswana Abram sangang polo sanga' taon, Allah ngaton sarta adhabu ka salerana, mategas pole sadaja janiNa ka Ibrahim, gepaneka Ibrahim bakal epadaddiya bangatowana bangsa sabannya'na.

Para tretan, mator sakalangkong ampon merengagi siaran kaula. Manabi panjenengan kaagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 21

Ancora kottha Sodom ban Lahirra Ishak

Para tretan nyara ajar pole caretana nabbi Ibrahim..... caretana se ajib ongggu. Caretana paneka emolae kalaban dhatenga tamoy ka kemahna Ibrahim. Badha oreng katello dhateng ka kemahna Ibrahim, tamoy geneka banne tamoy biasa karana se katello geneka Allah ban dhuwa' malaekadda. Tantonana panjenengan ker-pekeran ban atanya ma' bisa Ibrahim tatemo bi' Allah se abujud manossa.... Para tretan, kaemodi Allah paneka Maha Kobasa ban bisa alako gabay apa'a bisaos kajaba alako se ta' socce. Aoba daddi manossa banne parkara se mohal monggu ka Allah. E bakto jareya are ce' panassa, Ibrahim teppa'na agi-lenggi e adha'na labangnga kemahna. E bakto adhanga, Ibrahim oneng pasera se ngadek e jadhiya. Ibrahim laju ngadek pas ngendhing nyander ka reng-oreng jareya. Ibrahim mator, "Guste, ngereng padha eatorana lenggi ka kemah abdidalem; junandalem padha eladinana sareng abdidalem. Ngereng sareng abdidalem engala'agiya aeng sopaja junandalem padha kengenga abacco. Ngereng bu-ambu lessu e babana kajuwan ka'dhinto. Sareng abdidalem junandalem eatorana dha'ar sakadarra, sopaja junandalem padha'a cengngar pole, kaangguy nerrossagi parjalanana. Manabi junandalem alenggi ka kemah abdidalem, ka'dhinto padha sareng manabi junandalem apareng kahormadan ka abdidalem. Daddi ngereng ja' nolak, eatorana lenggi." Dhabuna se katello jareya, "Iya, mara, sengko' nyepperra. Apa se ekakarep ba'na, la mara, lakone." Daddi Ibrahim ngajak tamoya ka kemahna laju ngladinana tamoy se molja geneka.

E bakto gi' da'ar, Sala settonga tamoy se katello jareya adhabu, "Sangang bulan aggi' Sengko' dha' enna'a pole. E bakto jareya Sara bakal andhi'a ana' lalake'." E bakto jareya Sara meyarsa'agi dhari budhina labangnga kemah se badha e budhiyanna tamoy jareya. Ibrahim ban Sara jareya la ce' seppona, ban Sara la ambu se dhateng kotorra. Daddi Sara agella' e dhalem atena, sambu apekker, "Sengko' la towa ban kero', dhu dhimma se gi' bisa'a terro apolonga tedhung ban tang lake? Apa pole tang lake la seppo keya." Allah oning apa se epekeragi Sarai, laju adhabu ka Ibrahim, "Arapa Sara me' agella' ban ta' parcaja ja' aba'na gi' bisa andhi' ana' maske omorra la towa? Sara tako', daddi ta' ngako, atorra, "Abdidalem ta' agella'." Tape Allah adhabu, "Enja', ba'na gella' pajat agella'."

Saellana jareya Allah laju adhabu ka Ibrahim, ja' Allah ngeding kabar parkara Sodom ban Gomora, ban dusana talebat berra'na. Daddi Allah torona dha' essa', mareksa'a, apa se ekaedhing jareya bendher apa

enja'. Akadi kebiasaan kaula sami, Saellana tamoy se katello gella' gubar. Bi' Ibrahim eaterragi sampe' gan settong kennengngan. Ibrahim jalan areng-sareng tamoya geneka.... Se kadhuwa' langsung tomoju Sodom ban Gomorah... nangeng Allah gi' jalan asareng bi' Ibrahim sambu acatoran.

Ibrahim oneng ja' Allah bakal ngokoma Sodom ban Gomora karena dusana talebat berra'na, namong Ibrahim oneng ja' e kottha geneka gi' badha reng-oreng se bendher.... Panjenengan tantona engu' ja' keponakana Ibrahim se anyama Lud eneng e seddi'na kottha Sodom. Daddi sambu ajalan Ibrahim atanya ka Allah: "Ponapa sareng Junandalem reng-oreng se ta' sala badhi epateyana epasarengnga reng-oreng se sala? Manabi e kottha ka'dhissa' badha oreng se sae saeket oreng, ponapa kottha ka'dhissa' sareng Junandalem paggun epaancora? Ponapa sareng Junandalem ta' eparengngana sapora sopaja se saeket oreng salamedda? Ampon ja' sapaneka, Guste. Sabab manabi sapaneka reng-oreng se ta' sala tanoro' eokom epasareng reng-oreng se sala. Ka'dhinto barang se mohal. Kadi ponapa hakimma dunnya me' aparenga potosan se ta' adil?"

Dhabuna Allah, "Mon e Sodom badha oreng saeket se ta' sala, kottha jareya bi' Sengko' esapora'a kabbi lantaran oreng se saeket jareya." Nangeng Ibrahim ta'tao berempa jumлана oreng bendher e kottha jareya. Daddi Ibrahim mator pole, "Junandalem ja' duka, Guste. Abdidalem matora sakaleyan aggi' saos. Kadi ponapa manabi se sae namong badha sapolo oreng?" Dhabuna Allah, "Mon badha sapolo oreng, kottha jareya bi' Sengko' burung ta' epaancora." Saellana mare se abu-dhabu ban Ibrahim, Allah laju adinggalagi Ibrahim, ban Ibrahim laju gubar.

E bakto malaekat se kadhuwa gella' napa' ka Sodom e baja asar e are jareya, Lud teppa'na ju'-toju' e labang sakethengnga kottha. E bakto nangale'e malaekat se kadhuwa jareya, Lud manjeng, laju nyander ka seddi'anna. Sanapa'na ka seddi'anna, Lud laju asojud, pas mator, "Ngereng eatorana lenggi ka compo', guste. Diggal abdidalem se aladinana. Junandalem abacco e compo', pas kelem e ka'dhissa'. Lagguepon kengeng abungo gu-laggu, pas nerrossagi parjalanan." Malaekat se kadhuwa jareya adhabu, "Enja', sakalangkong. Dina sengko' ngenebba e lon-alon bai."

Lud ce' maksana, daddi dhi-budhina se kadhuwa jareya nyepper ka bengkona Lud. Lud nyoro la-kabulana agabay roti se ta' eragi'i. Saellana mare eparanta, tamoy se kadhuwa jareya laju adha'ar.

Sabellunna tamoy se kadhuwa jareya maso' asareya, reng-oreng Sodom ngeppong bengkona Lud. Sakabbinna lalake'an, towa ngodha tadha' se ceccer padha noro' ngeppong. Reng-oreng jareya aera' ka Lud, oca'na, "Kemma tamoyya ba'na se ngenep e dhinna' rowa? Mara duliyan pakalowar, passra'agi, ekapolonga tedhung bi' sengko' kabbi, ekambuliyana." Raja onggu sa-dusana reng-oreng Sodom geneka, paneka sababba Allah terro maancor kottha jareya. Karena sa-dusana talebat raja. Lud kalowar, tape

labangnga bengkona eparapet dhari lowar, pas ngoca' ka reng-oreng Sodom jareya, oca'na, "Tan-taretan, ampon ja' sapaneka. Kaula andhi' ana' babine' kadhuwa, gi' padha paraban. Diggal ana' kaula ganeka bai bi' kaula ebagiya ka sampeyan, epakadiya ponapa sareng sampeyan, kasokanna. Tape tamoy kaula ja' le'-ole', sabab kaula wajib ajaga kasalameddanna reng-oreng ka'issa'."

Tape reng-oreng jareya tamba ngamo' ban ngoca' ka Lud, "Mara menggir! Ba'na reya neng e dhinna' oreng manca, me' nya'-bannya' caca. Mara menggir! Mon enja', ba'na eajara epalebbya berra' dhari tamoyya rowa!" Lud pas ejungka'agi. Reng-oreng jareya laju arebbu'an se narja'a labang. Tape bi' tamoy se kadhuwa gella' Lud etaja' epakadhalem. Labangnga bengkona pas ekanceng dhari dhalem. Reng-oreng se badha e lowaranna labangnga epabuta kabbi, daddi padha ta' nangale'e e dhimma labangnga.

Laju malaekat se kadhuwa geneka nyorro Lud, ana' lalake'an ban babine'an, manto ban la-bala laenna se badha e kottha reya, e ajak kabbi, yengga dhari Sodom. Karana e pajar lagu kottha reya bakal epamosna'a bi' Allah. Daddi Lud pas entar ka bakalla ana' babine'na se kadhuwa, oca'na, "Mara jaga, duli nyengga dhari kottha reya, sabab kottha reya epamosna'a bi' Allah." Tape bakalla ana'na se kadhuwa jareya padha nyangka Lud pera' agaja'. Lud gi' mangmang. Tape Allah nesor ka Lud jareya; daddi bi' tamoyya se kadhuwa gella' Lud ban binena sarta ana' babine'na se kadhuwa padha etonton egiba ka lowarra kottha jareya. Sadaja esorro duli berka' adinggallagi kottha Sodom, tak'olle a' atole, ban ta' olle ambu. Saampona Lut jau dhari kottha Allah laju matoron ojan balirang se rabbang ka kottha Sodom. Sadajana ancor tadha' karena. Tape emana e sa'at sadajana gi berka' bine'na Lud atole, laju aoba daddi cangga dhari buja, anangeng Lud ban na'-ana'na salamet, daddi Lud laju etolong epaburu sampe' salamet. Akadi Allah se merengagi du'ana Ibrahim kaangguy reng-oreng e Sodom. Sapaneka jugan Allah karsa merengagi du'a kaula kaangguy taretan sareng ca-kanca kaula sami. Saongguna Allah ta' akarsa maancor otaba nompes manossa, anangeng dusa se talebat raja e dhalem kaodhi'ana manossa masossa atena Allah se Maha Socce, Allah ta' bisa narema dusa e ajunanNa.

Pangajaran se bisa epondhut dari caretana Sodom ban Gomora gapaneka; norotdi hawa nafsu dusa bakal madhatengnga kaancoran. Allah ngaonengin ja' manossa ta' kera bisa aoba ban adinggallagi dusa kalaban kakowadanna dhibi', paneka sebabba Allah nyadhiyaagi jalan kabendherran sopaja manossa bisa epabebas dhari sa-dusana. Paneka se emaksod dhabuna nabbi Isa, e bhakto salerana dhabu: ba'na kabbi kodu elahirragi pole, se emaksodtagi gepaneka lahir sacara rohani, erroh kaula sami epaanyar kalaban kobasaepon Allah se Maha Kobasa. Enggi namong lantaran sapaneka: errohna kaula bisa lahir anyar, kalaban sapaneka kaula bisa andhi' kakowadan alaban kakowadana dusa.

Sakejja' agi kaula bakal ngaonengin kadi ponapa Allah neptebbi janjina, gepaneka pareng potra ka Ibrahim. Laju Allah aberkadi Sara, noro' janjina se edhabuwagi ka Ibrahim. Sara bubut, pas babar lalake'. Bi' Ibrahim pottrana jareya enyamae Ishak. Nyama Ishak artena agella'. Sebab madhateng kagumbira'an ka Ibrahim ban la-balana. E bakto pottrana jareya aomor ballung are, bi' Ibrahim esonnat, menorot se edhabuwagi Allah ka salerana. Para tretan paneka ongggu kaajiban. E bakto Ishak lahir Ibrahim yuswa 100 taon ban sara yuswa 90 taon, tape monggu Allah paneka ta' daddi masala kaangguuy neptebbi janjina ka Ibrahim ban sara. Allah paneka esto.

Namong badha se ta' seneng da' ka lahirra Ishak. E setong are baja Ibrahim ajang-onjang Hagar abanto Sara, hagar ngena Ishak.. ban Sara nangale'e. paneka daddi lantaranna Sara menta sopaja Ibrahim nondhung Hagar sareng Isma'il. E bakto meyarsa jareya panggaliyanna Ibrahim arassa rekong, sabab Isma'il pottrana keya. Monggu pasera'a bisaos parnyo'onan geneka ta' gempang e tarema. Tape Allah adhabu ka Ibrahim, ja' Hagar ban Isma'il pajet kodu ngalle, sabab toronan se ejanjiyagi bakal lahira dhari Ishak. Tape Isma'il bakal eberkaddi keya bi' Allah, sabab Isma'il jareya ana'na Ibrahim keya. Saellana jareya Hagar ban Isma'el esoro ondur. Daddi Hagar laju ondur. Kitab socce notoragi ja' Isma'il eneng e r-ara Paran, daddi panganjur se penter. Isma'il akabin sareng oreng messir ban daddi eppa'na bangsa Arab. Sapaneka jugan Ishak dadi eppa'na bangsa Yahudi. Saterosepon toronana Ishak ban Isma'il paneka laju amosowan, la-mala kantos samangken toronana se kadhuwa' geneka pagun amosowan. Saongguna Allah taresna ban ta' ada'bida'agi antarana Ishak ban Isma'il sarta akarsa sopaja Ishak ban Isma'il ban toronana noro' jalan kabendherran se ampon e sadiyaagi Allah.

Para tretan, mator sakalangkong ampon merengagi siaran kaula. Manabi panjenengan kaagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 22

Pangurbanan Ibrahim

Para tretan e are paneka kaula bakal arembaga pangajaran se penting dhari kaodhi'anepon Ibrahim. Careta sejate parkara pangurbanan Ibrahim, kadaddiyen se eraya'agi saben taon dhalem are raja Idul Adha. Tantonu kaula emot jugan caretana Hagar ban Isma'il kodu adinggallagi Ibrahim ban sara, ban neptep e Mesir. Samangken namong Ishak se apolong bi' Ibrahim. E setong are Allah nyorro Ibrahim ajalannagi parkara se talebat berra' . Sapaneka caretana menorot ketab socce;

Ta' saapa abidda dhari jareya Allah nyoba' Ibrahim. Ibrahim edikane. "Ibrahim! Ibrahim!" dhabuna. Saodda Ibrahim, "Ka'dhinto, Guste!" Allah adhabu, "Kassa' ba'na entar ka tana Moriya. Giba Ishak, ana'na ba'na se pera' settong rowa, se talebat ekase'e bi' ba'na. Ana'na ba'na jareya gabay kurban obbaran menangka tor-ator ka Sengko', e settong gunong se dhaggi' eduduwagiya bi' Sengko'." Oh, ma' bisa Allah menta' se kadi paneka. 25 taon abitepon Ibrahim anante' lahira Ishak, nangeng Allah parenta ka Ibrahim sopaja Ishak ekagabay kurban obbaran menangka tor-ator ka Allah. Ma' bisa? E dhalem kabadha'an se ka'dhinto apa panjenengan bakal alaban ka Allah? Ponapa panjenengan bakal nolak parentana Allah ban aberonta'? ponapa Ibrahim nolak parentana Allah? Sapaneka caretana ketab socce:

Kalagguwanna gu-laggu Ibrahim thok-ngetthok kaju se epangobbara kurbanna. Kaju jareya ebuwa' e hemarra. Ibrahim pas mangkat ka kennengngan se edhabuwagi Allah, asareng ban Ishak sarta kabulana kadhuwa.

Para tretan, nyatana Ibrahim Ta'at ka Allah. Saampona telo are Ibrahim ban Ishak sarta dunora se kaduwe' ajalan, sadajana napa' ka kenengan se etoduagi Allah, kenengan se ka'dima Ishak kodu e kurbanagi mengangka tor-ator ka Allah. Atena Ibrahim masthe sossa, parentana Allah paneka nako'e ban masossa ate. Kaula se ngeding careta geneka, oneng ja' Ibrahim eoji Allah, nangeng Ibrahim ta' tao pa-apa.

Panjenengan bisa bajangagi kadiponapa kabadha'ana manabi kaula nerosagi careta se etoles e dhalem ketab socce paneka, saneka: *Saellana olle tello are, kennengngan jareya la katon ka Ibrahim. Ibrahim pas adhabu ka kabulana se kadhuwa gella', "Ba'na anante' e dhinna' bai; hemarra reya edina'a e dhinna'*

keya. Sengko' ban tang ana' entara dha' essa', abakteya ka Allah. Dhaggi' mon la mare, sengko' abaliya dha' enna'."

Kajuna bi' Ibrahim epapekol ka Ishak, dineng salerana dibi' abakta ladding ban mardha. Se kadhuwa pas alomampa asareng. Ca'na Ishak, "Pa'." Saodda Ibrahim, "Apa, Na'?" Ishak atanya, "Kaju ban mardhana ampon badha. Ka'imma budhu'na dumbana se ebadhiya kurban?" Saodda Ibrahim, "Allah dibi' se nyadhiya'agiya budhu'na dumbana jareya." Se kadhuwa pas terros alomampa.

Sanapa'na ka kennengngan se edhabuwagi Allah gella', Ibrahim pas abadhi kennengnganna kurban. Kajuna etata e attasanna; pottrana etale'e, esaba' e kennengnganna kurban gella', e attasanna kajuna. Saellana jareya Ibrahim laju mondhut laddingnga epanyambelliya pottrana. Tape Ibrahim laju meyarsa sowarana malaekadda Allah dhari langnge', "Ibrahim! Ibrahim!" Saodda Ibrahim, "Ka'dhinto, Guste!" Dhabuna Allah kalaban parantara'anna malaekat gella', "Ja' pate'e kana' jareya, ja' pama-baramma. Sabab sateya Sengko' tao ja' ba'na tako' ka Allah, ban ta' eman massra'agi ka Sengko' ana'na ba'na se pera' settong tadha' pole jareya." Ibrahim atole ka bara' ka temor, ka dhaja ka lao', laju ngoladi badha dumba lake' settong, tandhu'na tacangke' ka but-ombut. Ibrahim mondhut dumba jareya, laju ebadhi kurban ka Allah menangka gantena pottrana. Bi' Ibrahim kennengngan jareya enyamae "Allah nyadhiya'agi". Daddi sampe' sateya oreng ngoca', "E attassa gunongnga Allah nyadhiya'agi se ekaparlo."

Careta paneka penting sanget ban parlo ejelasagiya sabab careta bab kurban tor-atora Ibrahim paneka, bisa eabes dhari tello bagiyan: dhari sejarana, simbola, ban nobuwadda. Daddi sopaja bisa ngaonengin arte kurban Ibrahim, kaula kodu ngarte tello bagiyan geneka: 1) apa se kadaddiyan, 2) apa artena kurban geneka 3) apa se enobuwatagi bi' Ibrahim bab kadaddiyan se bakal kalakon e budhi are.

E tenggu dari sejarah, apa se ekedingagi kaula e are paneka, gepaneka iman kaparcaja'ana Ibrahim se eoji bi' Allah ban Ishak ta' dadi ekurbanagi sabab la egante dumba. Careta paneka kadaddiyan ra-kera 4000 taon tapongkor e kenengan se samangken esebut Yerusalem, ban e raya'agi bi' tan-tretan Muslim, Kristen ban Yahudi.

Mon e tenggu dhari gambaran otabe simbolisa careta neka, Allah adhabu ka kaula same ja' kaula paneka akadi pottrana Ibrahim, ban hakim Agung ampon motosagi ja'Ishak kodu eokom pate. Tape Hakim se Agung paneka Allah se Ar-Rahman ban Ar-Rahim, salerana nylametagi pottrana Ibrahim dhari okoman pate. Akadi paneka, saongguna kaula paneka manossa se ampon narema potosan mate, nangeng gi' bisa ngaole kasempadan bebas dhari okoman paneka. apa jalan kasalameddan paneka? dhari caretana Ibrahim paneka, kaula bisa ajar ja' jalan kasalameddana Allah paneka kurban se samporna.

Ponapa panjenengan gi' emot, ja' Allah ampon nantoagi badha settong cara panebbusan otabe pambebassan e sa'at Adam ban Hawa adusa? Leres, kodu badha dhara se ngalocor... dharana keban se soce. Keban paneka kodu esambeli, laju eobar menangka kurban obaran ka Allah. Are paneka kaula epaenga'pole parkara geneka, sa'at Allah nyadiya'agi kurban (dumba) menangka gentena Ishak. Tape kaula kodu enga' da' ka apa se etotoragi ketab socce parkara kurban keban paneka... paneka menangka gambaran dhari apa se bakal dhateng, bajangan dhari sabarang se bagus se bakal dhateng, banne kanyata'an se saongguna kadaddiyan.

Sabab mohal dharana keban bisa malebbara sa-dusana manossa.

Daddi kurbana Ibrahim paneka agambaragi kurban se samporna se alebi'i kurban keban. Gapaneka panyalamed se socce. daddi kurbana Ibrahim paneka mojudagi gambaran dari panyalamed se eotos bi' Allah sopaja mabebas sadajana manossa se dusa dhari okomana Allah.

Badha tello parkara se parlo ekaonengin dhari kurbana Ibrahim paneka. kaula ampon arembag dhu parkara. Mangken kaula arembaga se katello', gepaneka bab nobuwadda. Ponapa panjenengan enga' ebakto onggga ka gunong, jawabanna Ibrahim ka Ishak, *"Allah dibi' se bakal nyadhiya'agiya dumbana kaangguy kurban."* Saampona Ibrahim nyambeli dumba menangka gantena Ishak, Bi' Ibrahim kennengngan jareya enyamae "Allah nyadhiya'agi". Bi-lebi pole nabbi Mosa se noles ketab taurat, negasagi: Daddi sampe' sateya oreng ngoca', "E attassa gunongnga Allah nyadhiya'agi se ekaparlo." Anapa Ibrahim ngoca' "se bakal nyadhiya'agiya"? saampona ngatoragi kurban dumba menangka gantena Ishak koduna Ibrahim ngoca': "Poji syukur ka Allah, se ampon apareng dumba menangka kurban?" para tretan partanya'an paneka penting, sabab jawaban kaangguy partanya'an paneka ngaandhi' KABAR BAGUS dhari pangandikana Allah se kodu engarteni ban e parcaja.

Anapa kenengan paneka bi' Ibrahim enyamae Allah nyadhiya'agi? Paneka sababba, sabab bakto genekka Ibrahim aomomagiya kadaddiyan se bakal kalakon, e kenengan jareya, e ka'imma dumba ampon agenteyagi potrana. Artena e bakto geneka Ibrahim anyata'agi: "sengko' mamoji Allah, sabab salerana ampon nyadiya'agi dumba kaangguy agenteyagi tang ana'. Tape are reya sengko' abala ka ba'na ja' pagi' e setong are, e atasa gunong reya, Allah bakal nyadiya'agi kurban se laen. Paneka kabar bagus se dhatenga dari Allah ban e atoragi Ibrahim ka sadajana oreng, ponapa se eatoragi Ibrahim paneka, mojudagi janjina Allah, seka'imma dunya bakal nangaleyana panyalamedda manossa dhari sa-dusana.

Sabelua, para pamereng kodu ngarte ja' ra-kera 2000 taon saampona Ibrahim notorrage Nobuwadda bab panebus agung paneka, Allah gu-onggu neptebi janjiNa. Panjenengan se kenal ka Injil tantoepone oneng caretana Isa Almasih. Isa Almasih paneka lahir dhari paraban se asala dhari toronana Ibrahim, akadi se

ampon e janjiagi Allah. Panjenenganepon ta' adusa, socce, paneka sebabba Isa Almasih patot seda akadi dumba se tadha' calena, ban daddi kurban se samporna, menangka gentena otaba tebbusanna toronana Adam.

E dhalem pangajaran paneka bekal e rembag kadiponapa sa oreng se anyama Yahya, eotos Allah sopaja nyiapagi jalan sabellunna Isa Almasih dhateng. E setong are Yahya ngoladi Isa rabu sarta nyander ka Salerana. Yahya laju adhabu, "Abas, wa, arowa' dumbana Allah se matadha' dusana dunnya." Anapa Yahya kodu nyebut Isa menangka dumbana Allah? Sadajana paneka sabab Isa lahir menangka kurban tebbusan dusana manossa. Akadi dumba se e sambeli menangka gentena Ishak, Isa Almasih seda kaangguy nebbus dusa toronana Adam. Isa paneka kurban se samporna ban se dhi-budhi kadibi' akadi dhabuna nabbi Ibrahim:" Allah dibi' se nyadhiya'agiya dumbana."

Para tretan, oninga panjenengan e ka'dima Isa Almasih seda menangka kurban? Padha bi' kennengnganna Ibrahim e sa'at nyaosagi dumba kurban se eparengngagi Allah menangka gentena Ishak potrana. E ka'dhima kennengngan geneka? Leres... e Yerusalem.

Para tretan, Allah ngonjang pasera'a bisaos panjenengan sopaja adinggallagi jalan se jahat ban parcoma, ban massra'agi badanepon panjenengan ka Jalan kasalameddan se ampon esadiya'agi Allah. E are paneka kaula sami bisa ngoladi kadiponapa sennengnga Ibrahim ban Ishak, ngaonengin ja' Allah amponnyadiya'agi dumba kurban menangka gentena Ishak saengga Ishak bisa teptep odhi'. Kadiponapa panemmo panjenengan? Ponapa panjenengan karsa narema dumba kurban se ampon esadiya'agi Allah menangka gentena panjenengan?

Para tretan, mator sakalangkong ampon merengagi siaran kaula. Manabi panjenengan kaagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 23

Caretana Esau ban Yakub

Polana kaagungan iman Ibrahim ngatorragi Ishak menangka kurban e bakto eoji sareng Allah. Allah apareng janjina ka Ibrahim, nangeng Ibrahim ehlas massra'agi pottrana se namong settong tadha' pole. Allah ampon adhabu ka Ibrahim.

Dhalem lema' pangajaran se dhi-budhi, kaula arembaga careta kaodhi'anna nabbi Ibrahim. Karana bakto se tabates banya' careta kaodhi'anna nabi Ibrahim se ta' sempat eajari. Tape sabeluna kaula nelaragi caretana nabbi Ibrahim, badha setong parkara se kodu ekaonengin, e setong are Allah adhabu ka Ibrahim bab se bakal kadaddiyan da'ka toronanna. Allah adhabu: "Kaenga'e, ya, na' potona ba'na bakal daddiya oreng manca e nagara laen; e nagara jareya na' potona ba'na bakal epadaddiya dunor sarta bakal eseksa'a odhi'na sampe' pa' ratos taon abidda. Tape bangsa se nyeksa na' potona ba'na jareya bi' Sengko' eokoma, ban e bakto na' potona ba'na jareya ondura dhari nagara jareya bakal ngeba'a arta sabannya'na."

Apa "nagara manca" se emaksod Allah neka nagara Messer, e dhimma bangsa Isra'il dedi dunor 400 taon abidda, padha bi' se edhabuwagi Allah. E dhalem empa' pangajaran se dhateng, kaula bakal nangale'e kadiponapa saneyap apa se edhabuwagi Allah paneka eteptebbi, tadha' settonga se enja'.

Bi' Ibrahim sakabbinna dhi'-andhi'na eparengngagi ka pottrana se anyama Ishak, Ibrahim seda e bakto la ce' seppona, yuswana saratos pettong polo lema' taon. Bi' tra-pottrana se anyama Ishak ban Isma'il laju esareyagi e Guwa Makhpela se kennengnganna e teggal e temoranna Mamre. Gi' lamba'na teggal jareya andhi'na Efron ana'na Zohar, oreng Het, tape bi' Ibrahim la epondhut dhari oreng Het jareya. Sara, rajina Ibrahim, ekoburragi e jadhiya keya Ibrahim sobad Allah geneka akhera ngadheb ka ajunana Allah e sowarga.

Pangajaran apa se bisa ekala' dhari careta kaodhi'anna Ibrahim paneka? Ame' bisa ejelasagi ngaangguy dhu partanya'an ban jawaban paneka. se kapeng settong: anapa Allah parenta ka Ibrahim sopaja adinggallagi nagarana? Jawabanna karana Allah gadhuwan rancana Ibrahim epadaddi bagatowana bangsa se raja, se kaima bakal dateng sa oreng pambebas dari bangsa paneka. partanya'an se kadhuwe': Anapa Allah menangka Hakim anyata'agi Ibrahim bendher eajunana Allah? Jawabanna karana Ibrahim

parcaja da'ka apa se edhabuwagi Allah, moskepaneka ta' gampang. Ibrahim bisa bebas dhari okomanna Allah karena parcaja ka sadaja se ejanjiyagi Allah, banne polana tengka otaba usahana dibi'. paneka se emaksod dhari ketab socce notoragi:" Ibrahim parcaja ka Allah, ban polana kaparcaja'anna jereya salerana etarema bi' Allah menangka oreng se masenneng panggaliyanna Allah. Lantaran ganeka Ibrahim esebbut sobadda Allah."

Dhalem ketab kadaddiyen 25, ketab socce notoragi ka kaula, caretana toronana Ibrahim. Nyara nerosagi pangajaran kaula kalaban maca caretana Ishak ban dhu potrana se kembar.

Yuswana Ishak pa' polo taon e bakto akabin ban Ribka, ana'na Betuwel, oreng Mesopotamia; Ribka jareya taretanna Laban. Ishak nyo'onnagi Ribka ka Allah, polana Ribka jubeng. Parnyo'onanna ekabbuli bi' Allah. Ribka bubut. Bubudda kembar. Ban sabellunna babaji' se dhadhuwa' jareya lahir, e dhalem gandhu'anna ebuna akeket. Ca'na Ribka, "Arapa sengko' me' kodu nyandhang se kantha reya?" Ribka laju nyo'on petodu ka Allah. Dhabuna Allah ka babine' jareya, "E dhalem tabu'na ba'na badha bangsa dhadhuwa'; bangsa se dhadhuwa' jareya amosowan; se settong akowadan dhari settonganna; se towa'an bakal daddiya abdina se ngodha'an."

Para tretan, Saellana napa' baktana, Ribka babar kembar lalake' kabbi dhadhuwa'. Se sareyang kole'na abak mera, akantha juba se ekagabay dhari kaen se abulu, daddi kana' jareya enyamae Esau. Saellana jareya pas kalowar se ngodha'an. E bakto babaji' se nomer dhuwa' jareya kalowar, tanangnga neggu'i tombedda Esau ce' sekkenna, daddi kana' jareya laju enyamae Yakub. E bakto kana' se kadhuwa jareya lahir, yuswana Ishak sabidak taon.

Esau ban Yakub jareya kembar, nanging para tretan,..... . saampona raja na'-kana' se kadhuwa geneka bidda, Esau daddi panganjur, ce' penterra ababurun, lebur enneng e lon-talon ban e ra-ara. Dineng Yakub orengnga anteng ban aleburan enneng e bengkona. Esau seneng ka sabarang se kadunyan se asifat sabatara, aba'na ta' parduli ka rancana Allah da'ka la-balana. Sabaligga Yakub aleburan enneng e bengkona, ajar caretana Allah ban parjanjiyanna Allah ka la-balana. Yakub seneng ka sabarang se dhari Allah, parkara se langgeng sanimanina.

Para tretan Esau paneka ana' se se towa'an, daddi Esau ngaandi' ha' sareyang. Sadaja janjina Allah ka Ibrahim ban toronana badha e dhalem ha' sareyang paneka. Nangeng Allah la adhabu ka Ribka ja' se towa'an bakal daddiya abdina se ngodha'an. Artena Allah ampon oneng ja' Yakub se bakal narema'a sangkolan dari janjina Allah ka Ibrahim, ban daddi sumber otaba bangatowana bangsa se anyar, banne Esau.

Kadiponapa carana Yakub narema ha' sareyang se saongguna andhi'na Esau geneka? Caretana sapaneka: E settong are, teppa'na Yakub aola kacang mera, Esau dhateng dhari ababurun. Tabu'na lapar. Bisa ebajangagi, baktu panjenengan lapar, pas badha se masak kakanan se ekasenengen panjenengan masthe panjenengan terro. Sapaneka jugan Esau. **Esau** ngoca' ka Yakub, "Sengko' ce' laparra. Mara, ra, sengko' menta'a kacang merana sakone'." Yakub paneka oreng se penter. Saodda Yakub, "Iya, mara, tape bagi ka sengko' gallu ha' sareyangnga ba'na." Ca'na Esau, "Iya, mara. Sengko' ce' laparra, kantha se mateya rassana. Apa gunana ha' sareyang jareya ka sengko'?" Oca'na Yakub, "Mara asompa gallu." Esau asompa, ha' sareyangnga ebagi ka Yakub. Bi' Yakub Esau eberri'i roti ban essop kacang merana. Esau ngakan ban ngenom, saellana jareya laju ondur. Daddi Esau nganggep ha' sareyang jareya tadha' gunana.

Para tretan, apa artena kalakowana Esau neka? Dibi'na la ajuwal ha' sareyanga kalaban roti ban essop kacang mera. Esau ta' argai ha' sareyang. Ha' paneka ta' pera' narema dhu bagiyan dhari kasogiyana bangatowana, nangeng narema ji-janjina Allah keya. Janji bakal epadaddi bangsa se raja, ban sabarang se laena se bakal kalakon sanimanina. Kalaban ajuwal ha' sareyanga kalaban kakanan, saongguna Esau la ngena ban ta' argai bangatowana ban Allah. Budhu onggu Esau reya..... coma karena kakanan la ngocol apa se paleng aji se ekaandhi' menangka ana' sareyang.

Nangeng ja' kaburu ahakime Esau, sabab manabi kaula nale'te dan kaula dhibi', ponapa kaula ta' sapaneka jugan? Ponapa kaula same ban Esau, se lebi argai pa-apa dhari dunnya, ebandhingngagi parkara Ilahi, bi-lebi pangandikana Allah? Paratretan, langnge' ban bume bakal mosna'a, tape pangandikana Allah bakal teptebba salanjangnga.

E setong are, Isa Almsih atanya ka red-moredda, Apa ontongnga oreng se ngaandhi' saantero dunnya tape kaelangan odhi'na? Ba' ekennenga odhi' reya eporop bi' apa'a bai? Geneka Partanya'an se bagus. Ba' badha'a sabarang e dhalem kaodhi'an neka se bisa ebandhingngagi kalaban odhi' asareng Allah samanina e kraton sowarga? Nabbi se laen ampon maenga': Jaga ja' kantos badha se alako ma'seyat odhi'na otabana ta' ngargai ra-parkara se rohani, akadi se elakone Esau. Esau ajuwal ha'na menangka ana' sareyang coma polana terro kakanan satobung. Esau kaelangan berkadda Allah, karena ta' ngargai pa-apa se dhari Allah. Para tretan Allah maenga' da'ka kaula same sopaja ta' noro' jalana Esau, ja' kantos ta' ngargai berkad se ampon e sadhiya'agi kaangguy kaula.

Saterosepon apa se kadaddiyan ka Esau? Lagguna kaula bakal ngataowe careta saterosepon. E are paneka cokop ekaonengin ja' akhera Esau laju arassa kasta ka sadaja kalakowanna, ban aehteyar bisa narema pole ha' sareyanga, nangeng ta' bisa. Allah apareng karsa, pangaterrowan ban ngargai peleyan

se daddi karebba bang-sebang. Allah jugan apareng tanggung jawab da' ka peleyan kaula. Esau ta' ngargai berkadda Allah ban e budhi are dibi'na nanggung okomanna.

Paratretan, ja' kaburu motossagi ra-parkara se langgeng. Maske Allah ngargai peleyanna kaula, kaula kodu mele kalaban bicaksana.

Kadiponapa panjenengan? Ponapa panjenengan terro narema berkadda Allah? Allah aparenga panglepor sareng kakowadan ka panjenengan, sopaja panjenengan kengenga alampa'agi sadajana se sae. Sabab panjenengan sareng kaula ekaase'e Allah, ban lantaran kasaeyanna, panjenengan sareng kaula sadaja bi' Allah epasabbar sareng epangarep sabarang se sae. Tape e dhalem kaodhi'an panjenengan, panjenengan kodu ngotama'agiya Allah. Ngargai pangandikana lebi dhari kakanan ban obang. Allah karsa nyapora dusa kaula sadaja, ngoba ate kaula se jahat, nyocceagi ban ngese kaodhi'an kaula kalaban kasseNa, kasaeyan, kataremtaman ban kapastheyen. Kat-berkadda paneka namong badha e sangkolan se bakal eparengagiya ka sadajana toronana Ibrahim. Kalaban gu onggu kaula sadaja kodu aehteyar parkara se langgeng. Pasera'a se ta' poron aehteyar kalaban gu-onggu ta' kera bisa narema sangkolanna Allah paneka.

Sopaja pangajaran kaula paneka lebi lengkap. Kaula bakal maosagiya bagiyen pertama dhari ketab Jabur, sapaneka pangandikana Allah se etoles e dhalem ketab Jabur:

Bajjra oreng se ta' atoro' ka babala'anna oreng jahat, se ta' nerowe tengkana oreng se bannya' dusana, sarta ta' akompol ban reng-oreng se ya-nyeya Allah, se lebur ajalannagi papakonna Allah, sarta mekker parkara papakon jareya malem ban seyang. Oreng jareya olle hasel e dhalem saneyap ehteyarra, akantha kajuwan e penggir songay, se abuwa mon teppa' mosemma ban ta' tao elop dhaunna. Sabaligga, oreng jahat, padha ban sekkem se eabber angen. Oreng jahat bakal eokoma bi' Allah, hakimma ban epesa dhari ommat laenna. Sabab oreng se ta'at etonton ban eaobi Allah, tape oreng jahat bakal ancora odhi'na.

Kadiponapa panjenengan? Samangkem badha e jalan se kema? E jalan kabendherran, jalana reng-oreng se nganggeb berkadda Allah menangka arta se aji? Otaba gi' badha e jalanna Esau se ajuwal berkadda Allah kalaban parkara dunya? Kema se lebi penting ban aji monggu panjenengan?

Para tretan, mator sakalangkong ampon merengagi siaran kaula. Manabi panjenengan kaagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.

Pangajaran sejate

Pangajaran 24

Yakub daddi Isra'il

Dhalem pangajaran tapongkor kaula ampon ngedingagi caretana ana' kembarra Ishak, Esau ban Yakub. Yakub gu-onggu panepo. Ketab socce notorrage kadiponapa Yakub nepo Esau kaka'na sopaja narema ha' sareyanga Esau. Sadajana nyebabagi Esau sake' ate, ban arencana'agi mateyana Yakub. Tape Ribka oneng ka rencanana Esau geneka, saengga nyoro Yakub buru ka bengkona majadhi'na se anyama Laban e Haran. Sapaneka caretana Ketab socce:

Yakub pas mangkat ka Haran dhari Bersyeba. (Haran geneka nagarana Ibrahim sabeluna Allah marenta sopaja adinggallagiya) E bakto compet are napa' ka settong kennengngan, pas ngenep e jadhiya. Yakub ngala' bato, pas marobbu, batona ekabantal.

Teppa'na tedhung laju amempe nangale'e andha se manjeng e bume; konco'na andha jareya napa' ka langnge'. Kat-malaekat onggga toron e andha jareya. Allah ngadek e erenganna, pas adhabu, "Sengko' reya PANGERAN, Allahna Ibrahim ban Ishak. Tana se ekatedhungge ba'na jareya bi' Sengko' ebagiya ka ba'na ban na' potona. Na' potona ba'na bakal bannya'na akantha bannya'na beddhi e bume ban bakal mencara ka bara' ban ka temor, ka dhaja ban ka lao'; ban lantaran ba'na ban na' potona, Sengko' aberkadana sakabbinna bangsa e bume. Mon ba'na entar dha' emma'a bai, bi' Sengko' terros ebarengngana ban elindhungana. Ban pole, bi' Sengko' ba'na epabaliya pole ka nagara reya. Sengko' ta' adina'agiya ba'na, ban sabarang se ejanjiyagi Sengko' ka ba'na bi' Sengko' eteptebbana kabbi." Yakub ngedhing, pas ngoca', "Allah badha e dhinna', e kennengngan reya, sengko' buru tao!" Yakub arassa tako', laju ngoca', "Marengessa kennengngan reya! Tantona reya kalenggiyanna Allah, labang sakethengnga sowarga." Kalagguwana Yakub jaga gu-laggu. Batona se ekabantal ekala', pas epamanjeng menangka bato parengeddan. Bato jareya eserame mennya' jaitun menangka tandha ja' bato jareya eatorragi ka Allah. Kennengngan jareya laju enyamae Betel. Se artena Romana Allah.

Para tretan, sapaneka se ecareta'agi ketab socce Ja' Allah bakal dhateng, ngaton ka Yakub e dhalem mempe ban apareng janji akadi se ejanji'agi ka Ibrahim ban Ishak eppa'na, gepaneka toronana bakal epadaddi bangsa se raja . daddi ha' sareyang se ekeco' dhari Esau, akhera eparengagi dibi' bi' Allah ka Yakub, saongguna Yakub ta' pantes narema berkad geneka, nangeng Allah Maha bellas ase ban neserran mareng berkad papareng da'ka sadaja se ta' pantes narema.

Akadi se ampon ecareta'agi, Yakub amempe nangale'e andha. Paneka banne andha biasa, nanging andha se tenggi, konco'na andha jareya napa' ka langnge' kantos ka Firdaus. Apa artena? Kalaban noduwagi andha ka Yakub, Allah apareng oneng ja' Salerana terro ngaandhi' hubungan se akrab bi' Yakub. Ban agambaragi ja' sang panebus neka akadi andha se nyambungagi Allah ban manossa.

Kantos samangken banya'oreng se nganggab dibi'na bisa ngaanguy andha paneka, onga ka sowarga kalaban usahana dibi', kalaban amal ban agamana. Tape ketab socce apareng oneng ka kaula ja' namong badha settong andha se bisa nyambungagi Allah banmanossa, andha paneka toron dhari lange', banne dhari bume onga ka lange'. Kaula sadaja toronana Adam, ta' bakal bisa onga ka atas ban maso' ka ajunana Allah (Firdaus) kalaban kakowadanna dibi'.

Anapa ma' saneka? Sabab kaula paneka manossa se dusa ban ta' sanggup masenneng panggaliyanna Allah se Maha Socce..... nangeng Allah paneka Maha bellas ase, karena taesnana ka ommada Allah ampon mokka' jalan kasalameddan kaanguy toronana Adam. jalan kasalameddan paneka se emaksod ketab socce se notoragi:"namong badha settong Allah ban settong parantara antarana Allah kalaban manossa sopaja pa'-sapa'a se parcaja ka Salerana ta' sampe'a mate, tape olle odhi' se saongguna tor langgeng. Bab paneka ketab socce ampon notoragi kalaban Teggas ban terrang:" Tadha' oreng se bisa entar ka Allah mon ta' lebat parantara se Kodus se eotos Allah dhari sowarga."

Samangken nyara ngoladi apa se kadaddiyan ka Yakub saampona napa' ka kenengana Laban, oca'na ketab socce, Ponapa se etamen, ganeka se epolong. Dhalem pasal 29 etoles: saampona sabulan abidda Yakub apolong ban Laban, laban ngoca' ka Yakub: "Ba'na ta' olle alako ka sengko' ta' kalaban olle bajaran maske ba'na reya tang bala. Ba'na menta'a bajaran barampa?" Laban andhi' ana' babine' kadhuwa, se towa'an nyamana Liya, se ngodha'an nyamana Rahel. Liya orem matana, tape Rahel bagus badanna tor raddin robana. Yakub terro ka Rahel, daddi laju ngoca', "Kaula poron alako pettong taon manabi kaula eedine abine Rahel." Sambidda Laban, "Lebbi becce' Rahel bi' sengko' ebagi ka ba'na etembang ka oreng laen. Ba'na la enneng dhinna' ban sengko'." Yakub alako pettong taon abidda polana terro ka Rahel; bakto se pettong taon jareya ekarassa pera' pan-barampan are amarga kataesna'anna ka Rahel. Yakub laju ngoca' ka Laban, "Baktona ampon napa'. Samangken kaula nyo'ona edi akabina sareng pottrana sampeyan." Daddi Laban pas ajang-onjang ce' bannya'na. Oreng padha eonjang kabbi. Tape se egiba ka Yakub e malem jareya Liya, banne Rahel. Daddi Yakub apolong tedhung ban Liya. Buru kalagguwana Yakub tao ja' se ekapolong tedhung jareya Liya. Yakub laju entar ka Laban sarta ngoca', "Aponapa kaula me' epacara paneka bi' sampeyan? Kaula alako polana terro abineya Rahel. Aponapa sampeyan me' congoco?" Sambidda Laban, "Noro' adad e dhinna' ana' se ngodha'an ta' olle alake ajangadha'i se towa'an.

Nante' gallu sampe' jang-onjangan se samenggu abidda reya la mare. Rahel bi' sengko' ebagiya ka ba'na mon ba'na endha' alako pettong taon aggi'." Yakub ngenggi'i, ban saellana jang-onjangan se samenggu abidda jareya la mare, bi' Laban Rahel ebagi ka Yakub menangka binena. Yakub tedhung apolong ban Rahel keya, ban kataresna'anna ka Rahel alebbiyan dhari kataresna'anna ka Liya. Saellana jareya Yakub alako ka Laban pettong taon aggi'.

Para tretan, kaula bisa ngoladi kadiponapa Laban co-ngoco ponakanna dibi'. apa se elakone Laban banne kalakowan se sae, nangeng sadajana kodu e alame Yakub, astana Allah badha eatasa, ban Allah bisa ngaangguy sabarang se mapeggel paneka daddi bab se sae monggu Yakub. Sabab akhera, yakub andhi' putra 12 oreng lalake'. 20 taon abidda Yakub apolong ban Laban, saabidda paneka Allah ngeparengngagi Yakub ngalamen kasossaan. Lebat lalakon paneka Allah ngajari ban mamorne imanna Yakub, akadi emas se epamorne bi' apoy.

E setong are..... Allah ngaton ka Yakub laju adhabu, "Kassa' ba'na abali ka nagarana eppa'na ban ka la-balana ba'na. Sengko' se abarengngana ba'na." Yakub laju akes-rengkes, moleya ka eppa'na e nagara Kana'an. Ne-binena ban na'-ana'na epaongga ka ontana, embi' ban dumbana egiba kabbi, epajalan e adha'anna, bariya keya sabarang dhi'-andhi'na se ekaolle e Mesopotamia. Mangkat ka kottha Kana'an tana se ejanjiyagi Allah bakal daddi andhi'na Ibrahim, Ishak, ban Yakub sarta toronana.

E sa'at Yakub ban la-balana ajalan ka kana'an, Allah ngaton ka Yakub kalaban cara se ajib ban nyamana Yakub eoba.sapaneka oca'na ketab socce:" Yakub dibi' gi' nyeccer e budhi, kadibi'an, ta' noro' alengka songay jareya. O-tao pas badha oreng lalake', oreng jareya laju akeket ban Yakub sampe' para' seyang. E bakto oreng jareya arassa ja' ta' kera bisa'a makala Yakub, Yakub laju epokol epateppa' e bangkongnga, sampe' tolangnga bangkongnga jareya locot dhari cacopona. Oreng jareya adhabu, "Mara, sengko' ocol, sateya la para' moncara are." "Bunten, junandalem ta' eocola, kajabana manabi abdidalem eberkadi dhimen," atorra Yakub. "Sapa nyamana ba'na?" dhabuna oreng jareya. "Yakub," saodda. Dhabuna oreng jareya, "Molae sateya nyamana ba'na banne Yakub pole. Ba'na la akeket ban Allah sarta ban manossa, ban ba'na mennang; daddi nyamana ba'na sateya oba daddi Isra'il." Atorra Yakub, "Samangken ngereng abdidalem parenge oneng pasera asmana junandalem." Tape oreng jareya adhabu, "Ba'na ta' osa tao ka tang nyama." Saellana jareya Yakub laju eberkadi. Ca'na Yakub, "Sengko' nangale'e Allah, dhelp-adhebban, tape sengko' gi' odhi'." Daddi kennengngan jareya bi' Yakub enyamae Peniel.

Para tretan, pangajaran e are mangken penting ban possa' kalaban petodu. Dhari tolesana ketab socce e atas kaula ngaonengin ja' Allah ngaton ka Yakub abujud manossa ban akeket ban Yakub. Bakto Allah akeket ban Yakub, Allah karsa sopaja Yakub sadar ja' e ajunana Allah manossa paneka ta' andhi'

kakowadan pa-apa. Allah karsa sopaja Yakub ngaonengin ja' sadaja kabicaksana'an ban kakowadan paneka asala dhari Allah diri'.

Allah ngagungin rancana se agung kaangguy Yakub, tape berkad kasaeyanna Allah paneka ta' bisa ekaandi' ngaangguy kakowadana dibi'. Yakub gi' buru oning ja' e ajunana Allah aba'na ta' andhi' kakowadan. Bi' Allah malem neka nyamana Yakub se artena tokang tepo egante Isra'il se artena pangeran. Akadi se ampon ekaonengin, bangsa Isra'il asala dhari 12 potrana Yakub, ban dhari bangsa Isra'il paneka meyos sang panebus.

Mi' badha se atanya, anapa Allah mele tokang tepo akadi Yakub ban madaddi bangatowana bangsa se bakal ngeba panebus ka dunya? Paneka jawabepon ketab socce: "Allah mele se eanggep budhu sareng dunnya paneka, sopaja reng-oreng se penter daddi todhus. Ban Allah jugan mele se eanggep ta' gadhuwan kakowadan sareng dunnya paneka, sopaja reng-oreng se gaga' parjuga daddi todhus."

Dha'-adha'na yakub pajat tokang tepo, e dhalem dibi'na sobung se sae, kajaba settong parkara: YAKUB PARCAJA KA DHABUNA ALLAH. Monggu Yakub se paleng penting e dhalem kaodi'anepon namong janji berkadda Allah. Mila dhari paneka Allah ngaton ban atena Yakub eoba dari tokang tepo daddi abdina Allah.

Kadiponapa monggu panjenengan? Ponapa panjenengan oneng ja'manossa ta' bakal bisa maseneng panggaliyanna Allah kalaban kakowadana dibi'? ketab socce notoragi: Pojur oreng se apangrasa ta' bisa apa-rapa ban pera' agantong ka Allah malolo; oreng jareya sengaandhi' karatona Allah! Allah nangtang oreng se sombong, tape sabaligga neser ka oreng se andhap asor. Mila dhari paneka, nyara atoro' ka dhabuna Allah sopaja panjenengan epasalamet bi' Salerana.

Para tretan, mator sakalangkong ampon merengagi siaran kaula. Manabi panjenengan kaagungan pertanyaan bab ponapa'a se ampon eperengagi, toles pesan dha'ka pangajaran sejate. Kalaban nomer WA 081-333-777-386. Mator sakalangkong.